

परेरितन केर कामु

यीसु सरगे चले गए

1 ए थियफिलस हम अपनी पहली किताब मा उन सब बातन क्यार हवाला लिखा है, जौनु यीसु अपनी सेवा केर सुरुआत मा कीन करति रहै।²जिन चेलन का उन चुनन रहिन उनका वहि दिन तक सिखावत रहे जब तक वे पवित्तर आतमा केर आग्या केर ऊपर उठा न लीगे।³दुखु उठावे केर यीसु बहुत पक्के परमानन तेरे उन लोगन पर अपने केर परगट करति रहे।⁴एकु दफे जब वै उनके साथ खाना खात रहै तब उनका आग्या दिहिन ‘कि यरुसलेम का न छोडेव पर बाप केर परतिग्या पूरा होय केर बाद जोहति रहौ, जेहिकी चरचा हमते सुनी हौ’⁵यहुन्ना तौ तुमका पानी तेरे बपतिसमा दीन हईन, मुला थोरे दिनन बाद तुम पवित्तर आतमा तेरे बपतिसमा पइहौ।

⁶जब वै सब जमा भये तब यीसु ते पूछेन, ‘का परभु तुम यही समय मां इसराएल का राज केर देहौ?’

⁷यीसु वहिते कहिन, ‘उन समय अउर कालन क्यार जरपव, उनका काम नहीं वह, जिनका बाप अपने ही अधिकार मां रखा रहइ।⁸मुला जब पवित्तर आतमा तुम पर आई तब तुम ताकत पइहौ, अउर यरुसलेम यहूदिया परदेस अउर सामरिया परदेस अउर धरती केर छ्वार तक तुम हमार गवाही होइहौ।

⁹या बात कहै केर बाद यीसु उनके द्याखति— द्याखति सरग पर उठा लीन गे बदले केर कारन उनकी आंखिन तेरे छिपिगे।

¹⁰जब वै यीसु केर जायेका आसमान तरफ ताकति रहै, तब दुइ मनई सफेद कपड़ा पहिने भए उनकी तीर आ कइहां ठाढ़ होइगे।¹¹वहिते कहहेन ‘हे गलीली मनइन तुम काहे खड़े सरग केर तरह ताकि रहे हौ? यही यीसु जौनु तुम्हरी तीर तेरे सरग पर उठा लीन गै हैं, उसी तरह फिर अइहैं।

यहूदा केर जगह पै मत्तियाह क्यार चुना

¹²तब चले जैतून पहारु तेरे यरुसलेम कइहां लौटि

आए जौनु करीब एकु सबत केर दिन केर दूरि पै होई।¹³जब वै यरुसलेम नगर मा आए तब वे याक मकान केर अटारी पर गे, वाहं वे ठहरि रहै। हुवां पर पतरस, यहुन्ना, याकूब आन्द्रियास, फिलिप्पुस, थोमा, बरतुलमई, मत्ती, हलफई क्यार बेटा याकूब, सिमौन जेलोतेस अउर याकूब क्यार बेटा यहूदा मौजूद रहै।¹⁴यहि सब चेला अउरी तमाम स्त्रियन के साथ महतारी मरियम अउर उनके भाइन केर साथ एक मनु होइके लगातार पराथना करै मां लागि रहै।

¹⁵उनी दिनन मां पतरस भाइन (जौनु करीब एकु सौ बीस लोग रहै) केर बीच मां, खड़े होइगे कहै लाग।¹⁶‘भाइयौ, यह बात जरूरी रहै पवित्तर किताब क्यार अगुआ रहै, केर बारे मां पहिले तेरे कहा रहिस’।¹⁷ऊ हमका गिना गवा अउर ई सेवा मां सहभागी भवा।’

¹⁸‘ऊ अधरम केर कमाई ते एक खेत खरीदिस उहु खोपड़ी बल गिरा, वहिका पेटु फटि गवा, अउर वहिकी सब आतैं बाहेर निकरि आई।¹⁹यहि बात कइहां सगरे यरुसलेम वाले जानिगै। हिंया तक कि वहि खेतु क्यार नाव उनकी बोली मां “हलकदमा” यानी “खून क्यार खेतु” पड़ि गवा।

²⁰पतरस अउर आगे कहिन कि भजन संहिता मा लिखा हवै कि “वहिका घर उजरि जाय” अउर “वहिमा कउनउ न बसै”। अउर वहिका पदु कउनउ दूसरि लइले’।

²¹यहि कारन जितने दिनन तक परभु यीसु हमरे साथ आवति जाति रहै यानी कि यहुन्ना केर बपतिसमा ते लइकै, हमरे पास ते ऊपर उठाये जाए तक, जउन लोग हमरे साथ रहे हैं।²²उनमा तेरे एकु जन हमरे साथ यीसु के जी उठै क्यार गवाह होई जाए।

²³तब उन दुई जन कइहां खड़ा कीन्हेन, एकु यूसुफ जउन बरसवास कहा जाति है (जेहिका दूसर नाम युस्तुस रहे) अउर दूसर मत्तियाह कइहा।²⁴तब उन यह पराथना करेन कि “परभु तुम सबके मन

क्यार हालु जानति हौ अब यू परगट करौ कि इन दोनों मते केहिका चुना हौ।²⁵जो ई सेवा काम मां अउर परेरितन क्यार पद ले, जेहिका यहूदा छोड़ि कइहां अपनी जगह पर चला गवा है।²⁶तब उइ उनके नामन पर चिट्ठी डारेन, अउर चिट्ठी मत्तियाह केर नाम पर निकरी, सो वे उन ग्यारह परेरितन केर साथ गिना गे।

पिन्तेकुस्त केर दिन पवित्तर आतमा क्यार उतरब

2पिन्तेकुस्त केर दिन सब यीसु अनयायी याक जगह जमा रहे।²अचानक आसमान तेरे बड़ी आधी केर अस सनसनाहट केर सहद मां जेहिते पूरा घर, जहां मइहां लोग बइठे रहै गूजि गवा।³उनका आगे केर जैसी जीमै फटी-फटी देखाई परी, अउर हर जने पर वी आकै ठहरि गई।⁴वे सब पवित्तर आतमा तेरे भरिगे। जउनी तरह तेरे आतमा उनका ब्वालै केर ताकति दीहेसि वै फरक-फरक भासा मा ब्वालै केर ताकति दीन्हेसि वै फरक फरक भासा मा ब्वालै लागे।

⁵संसार केर सम्पूरन देसन केर यरुसलेम नगर मां रहि रहे थे।⁶जब युह सबद भवा, तब भीड़ लागि गै, अउर लोग घबराइगै। काहे ते हरि कोई कइहहां यहै सुनि परि रहा रहे कि ई हमरि भासा मां बोलि रहे है।⁷वे सब अचरज मां पड़ि कै पूछै लाग “का जौनु ई लोग बोलि रहे हैं का सब गलीली नाई हवै”?⁸तौ फिर हम सब जनें अपनी जन्म भूमि केर भासा कैसे सुनि रहे हवै? ⁹हममा पारथी मेदी एलामी लोग हैं, कुछ मिस्रपुटामिया, यहूदा कॅपदूकिया, पुन्तुस आसिया क्यार हवै।¹⁰फ्रूगिया पमफूलिया अउर लिबुआ देस जउन कुरे केर पास हवै। इन सब देसन क्यार रहै वाले हवै। कुछ रोमी (यहूदी अउर यहूदी मत मा आवे वालै) करेती अउर अरबी हवै।¹¹मुला हम सब अपनी अपनी भासा मा परमेसुर केर बड़े-बड़े कामन केर चरचा सुनि रहे हन।¹²वे सब अचरज मां परिकै अउर घबरा कइहां याक दूसरे तेरे कहै लागे “येहिका का मतलबु है”?

¹³मुला कुछ लोग चेलन क्यार मजाक उड़ाए अउर कहै लागे कि “ई सब तौ दारु केर नसे मां हवै”।

पतरस क्यार भीड़ कइहां उपदेसु

¹⁴पतरस ग्यारहों चेलन केर साथ ठाड़ भये अउर ऊँची आवाज मां भीड़ तेरे कहै लाग “औ यहूदियों अउर यरुसलेम केर रहै वले मोरि बात ध्यान तेरे सुनौ अउर समझौ”।¹⁵ई लोग नसे मां नाई हवै जइस तुम

समझि रहे हौ। काहे तेरे अबै तौ सबेरे क्यार नवे बजे है।¹⁶मुला यह वह बात जउन योएल नबी केर जरिया तेरे कहि गै रहै।

¹⁷परमेसुर कहति है कि अन्त केर दिनन मां अइस होई, “हम अपन आतमा सब मनई न पर उड़लिहौ, तुम्हारि लोगन कै लरिका अउर बिटिया भबिसवानी करि हैं। तुम्हार जवान दरसन देखिहैं अउर बुढ़वै लोग सपना देखिहैं।

¹⁸अपने सेवक अउर सेविकन पर उन दिन मां अपन आतमा उड़ेलव अउर वे भबिसवानी करि हैं।

¹⁹हम ऊपर असमान मां अदभुत काम, अउर नीचे धरती पर चिन्ह आगि अउर धुवां क्यार बादल दिखइवै।

²⁰परभु केर महान अउर परसिद्ध दिन केर आवै केर पहिले सूरज अधियारु होइ जाई चन्दरमा खून-खून होइ जाई।

²¹अउर जउन कउनो परभु क्यार नाव लेई, वहै उद्धारु पाई।

²²हे इसराएलिन सुनौ, “यीसु नासरी एकु मनई रहै, ऊ परमेसुर केर तरफ तेरे आए रहै। इन बातन क्यार परमान उनके सामरथ अउर ताज्जुब वाले काम, अउर चिन्हन ते परगट हवै। जिनका परमेसुर तुमरे बीच मां उनके द्वारा रहिन, जउन तुम खुदे जानति हौ।”²³उनहीं कइहां जब परमेसुर केर पहिले केर योजना अउर होनी केर ग्यान तेरे वो पकड़वाए हैं तब तुम अधरमिन केर हाथे तेरे सलीब पर जड़वा कइहां मारि डारेव।²⁴मुला उनहिन कइहां परमेसुर मिरतु केर बन्धनन ते छुड़ा कइहां जिलाएन, काहे तेरे यू असम्भव रहै कि ऊ मो केर बस मां रहतौ।²⁵दाउद उनके बारे मां कहिसि कि हम परभु कइहां हमेसा अपने सामने देखित रहन”। काहे तेरी वी हमरे दाहिनी तरफ हवै।” हम कबहूँ न डिगिहों।

²⁶यही कारन हमार मनु परसन्न भवा, “अउर मोर जीभ मगन भइ”, अउर मोर आसा मां जीवत रही।

²⁷काहे तेरे तू मेरे परानन कइहां अधोलोक म न छाड़ि है अउर न अपने पवित्तर जन का सड़इहै।

²⁸तुम मोहिका जीवन केर राह बताए है, तुम अपने दसरन केर आनन्द ते भरि दे हौ।

²⁹हे भाईयो, हम वी कुलपिता दाऊद केर बारे मा तुमते हियाब करे साथ कहि सकति हन कि “दाउद तो मरा अउर गड़ा गवा” अउर वहिकी कबर आज लो हमरे हियां बनी हवै।³⁰ऊ तौ नबी रहै, अउर जानित रहे कि परमेसुर वहिते कसम खाये हैं कि तुमरे बंस तेरे याक जने कइहा तुमरे सिंहासन पर बइठइ हौ।³¹ऊ तौ ई होनी का पहिले तेरे देखि

कइहां मसीह केर जिन्दा होई उठै केर भबिसवानी कीहेन कि “न तो उनका परान अधोलोक मां छोड़ा गवा, अउर न उनकेर द्याह सरे पाई”।³²यही यीसु कइहां परमेसुर जिलाइन जेहिके हम सब गवाह अहिन।³³ई तरह ते उन परमेसुर केर दहिने हाथे तेरे सबसे ऊँचउ पाएन, अउर बाप तेरे वह पवित्तर आतमा पाइकइहां जेहिका वादा कीन गवा रहै हम पर उड़ैलि दिहिन, जेहिका तुम द्याखति अउर सुनति हो।³⁴दाऊद तौ सरग पै नाई चढ़े मुला वी कहति है, “परभु मोरे परभु ते कहिन कि

³⁵मोरे दहिने हाथे पर बड़ौ, जब तब तुमरे दुसमन कइहां तुमरे पांव केर चौकी न बना देई।

³⁶अब पूरा इसराएल देस मा बात पक्की तरह जान लेव केर “परमेसुर वही यीसु कइहां जेइका तुम सलीब पर चढ़ा दीहेव, परभु भी ठहराइन अउर मसीह भी।”

³⁷तब सगरे सुने वालेन क्यार दिल छिद गै अउर वे पतरस अउर बाकी चेलन तेरे पूछै लाग, “हे भाइयो हम का करी?”

³⁸पतरस वहिते कहिन “अपने—अपने पापन तेरे मन फिराव अउर तुममा तेरे हरि एकु जन अपने—अपने पापन खातिर यीसु मसीह केर नाम तेरे बपतिसमा ले, तब तुम पवित्तर आतमा क्यार दान पइहौ”।³⁹यह परतिग्या तुमरे अउर तुमरे सन्तान खातिर अउर उन सब दूरि—दूरि लोगन केर लिए हवै, जिनका हमारा परभु परमेसुर अपने तीर बुलइहै।

⁴⁰पतरस अउरी बहुती बातन तेरे गवाही देई—देई केर समझाइन कि वी अपना कहां ई टेढ़ी जाति ते बचाए राखै।⁴¹जउने—जउने पतरस केर बाति मानिन उन—उन बपतिसमा लीन्हेन, अउर वहि दिन करीब तीन हजार लोग उनका मिलिगै।

बिसवासिन केर सहभागिता

⁴²वी परेरितन तेरे सिखा पावै, उनके साथ संगति राखै अउर रोटी तोड़न अउर परभु अउर पराथना करै मा लवलीन रहै लागे।⁴³सब लोगन पै बड़ा डेरु छा गवा रहै, परेरितन तेरे बहुत चमत्कार चिन्ह अउर अदभुत काम होत रहै,⁴⁴अउर उइ सब बिसवासु करै वाले यकट्टे रहत रहिन अउर उनकरि सब चीजै साझे केर रहै।⁴⁵वी सब अपनि—अपनि सम्पति अउर समान बेचि—बेचि कइहां जेहिकी जइसी जरुरति होति रहै याक दूसरे कइहां बाँटि देति रहै।⁴⁶की रोज एकु मन होइ के मंदिर मां यकट्टा होति रहै, अउर भोज केर रोटी तोड़ति आनन्दि अउर निसकपट हिरदय तेरे भोजन करति रहै।⁴⁷वे परमेसुर केर अस्तुति करति

रहै, सब लोग वहिते खुस रहै अउर जउन उद्धार पावति रहै परभु उनका रोज उनमा मिला देति रहै।

पतरस लंगड़े भिखारी कइहां चंगा करति है

3याक दिन पतरस अउर यहुन्ना तीसरे पहर पराथना केर समय मंदिर कइहां जा रहे रहै वही समय²कुछ लोग याक जनम केर लंगड़े कइहां लाय रहे वी लोग रोज वहिका मंदिर केर सुनदर फाटक पर बइठा देति रहै “कि ऊ मंदिर मां आवै जावै वालेन ते भीख मांगय”।³जब ऊ पतरस अउर यहुन्ना कइहां मंदिर मां जात देखिस तो वहिते भी मांगिस।⁴पतरस यहुन्ना वहिकी तरफ ध्यान ते देखिन, अउर कहिन, “हमरी तरफ देखु”।⁵ऊ वहिते कुछ पावे केर उम्मीद ते उनकी तरफ ताकै लाग।

⁶पतरस कहिन, चांदी अउर सोना तौ हमरे तीर है नाई मुला जउन कुछ है ऊ तुमका देइत हन, यीसु मसीह नासरी केर नाम ते चलौ—फिरौ”।⁷पतरस वहिका दाहिने हाथ ते पकरि कइहां उठाएन, अउर तुरतै वहिका लंगड़े कर पाएन अउर टखनन मां बल आ गयवा।⁸उइ उछति कइहां खड़ा होइ गवा, अउर चलै—फिरै लाग। उइ उछलत—कूदत अउर परमेसुर केर स्तुति करति भए उनके साथ मंदिर मां गवा।⁹सब लोग वहिका चलति—फिरति अउर परमेसुर केर स्तुति करति देखिन।¹⁰अउर वहिका पहिचानि लीन्हेन कि यू वहै आय, जउन मंदिर के सुन्दर फाटक पर बैठ कइहां भीख मांगा करति रहै। वहिके साथ घटी घटना कइहां देखि कय सब बहुत चकित रहि गए।

पतरस भीड़ तेरे बातें करत है

¹¹जब ऊ भिखारी पतरस अउर यहुन्ना कइहां पकरे रहै, तब सब लोग बहुत ताज्जुब करत भए सुलेमान केर बरामदा मां उकरे तीरे दउरि आये।¹²जब पतरस इ देखिसि तौ लोगन ते कहिन, “हे इसराएलियो तुम यहि मनई कइहां देखि कय ताज्जुब काहें कई रहै हौ? अउर हमरी तरफ देखि रहै हौ मानौ हमहीं अपनी ताकति अउर भक्ती ते यहि का चले—फिरै लायक करि दीन है।¹³अबराम, इसहाक, याकूब केर परमेसुर, हमरे पुरखन केर परमेसुर अपने सेवक यीसु केर महिमा कीन्हेन जिनका तम पकरवा दीहेव। जब पिलातुस उनका छोड़ि दे, क्यार विचार बनाएन तब तुम वहिके सामने यीसु क्यार इनकार कीहेव।¹⁴तुम उइ पवित्तर अउर धरमी क्यार इनकार कीहेव अउर पिलातुस तेरे विनती कीहेव कि याक हतरे कइहां तुमरी खातिर छोड़ि दीन जाय।¹⁵तुम जीवन केर

करता कइहां मारि डारेव, जेहिका परमेसुर मरे हुएन ते जियाएन अउर ई बात कयार हम सब गवाह हन।¹⁶वही केर नाम ते अउर वहि बिसवासु तेरे जउन वहिके नाम पर है, यू मनई जेहिका तम देखि रहे हौ। अउर जानतो हौ कि ठीक कीन गवा है निश्चय वहीं बिसवासु ते यहिका तुम सबके सामने बिलकुल चंगा कइ दीन हइन।

¹⁷“भाइयो, हम जानित हौ कि यू काम तुम अउर तुमरे अगुवन अनजाने मां कीन हौ।¹⁸मुला जिन बातन कइहां परमेसुर नबी केर मुंहि ते पहिले ते कहावा रहिन यही तरह ते पूरा करा हइन।¹⁹यही कारन ते अब अपने पापन तेरे मन फिराव अउर परमेसुर केर पास लउटि आवौ कि तुम्हार पाप मिटाये जाएँ जेहिते परभु केर सामने खुसहाली क्यार दिन आवै।²⁰अउर उइ उन यीसु मसीह कइहां भेजे जउन तुमरे खातिर पहिले तेरे ठहरावा गया है।²¹यह बात जरूरी है कि उइ सरग मां वहि समय तब रहे जब तक कि सब बातन क्यार सुधार न करि लेव, जेहिकी चरचा परमेसुर अपने नबियन केर मुख ते कहाइन हइन, जउन जगत केर सुरुआत तेरे होति आये हैं।²²जइसे मूसा कहा हइन “कि परभु परमेसुर तुमरे भाइन में ते तुमरे खातिर मोरे जइस एकु नबी पैदा करी जऊन कुछ वह तुमते कहे उहिकी सुनव।²³मुला हर एकु मनई उइ नबी केर बात न सुने ऊ लोगन मते नासि कीन जाय।

²⁴समूएल नबी तेरे लइके वहिके बादि आवै वालेन नबियन तक जितने नबिन परमेसुर केर वचन कहे हइन उइ यही दिनन खातिर है।²⁵तुम नबी केर सन्तान अउर वहि वाचा क्यार भागीदार हौ। जउन परमेसुर तुमरे पुरिखन ते कायम कीन रहति उन अबराम तेरे कहिन क “तुमरे कुल के द्वारा दुनियां क्यार सगरे देस आसीस पइहै”²⁶परमेसुर अपने सेवक कइहां जिन्दा करिके पहिले तुमरे पास भेजिन कि तुम मा ते हरि याक जने कइहां वहिके बुरे रास्ता तेरे फेरि कइहां आसीस दे।

धरम महासभा केर सामने पतरस अउर यहुन्ना

4 जब पतरस अउर यहुन्ना लोगन तेरे बातें करि रहे तब पुरोहित अउर मंदिर क्यार अधिकारी अउर सदूकी उन पर चढ़ि आये।²उइ बहुत झुंझलाये भये काहे ते पतरस अउर यहुन्ना लोगन कइहां मरे हुयेन तेरे जी उठे क्यार परचार करि रहे रहै।³उइ पतरस अउर यहुन्ना कइहां पकरि के जेल मां दुसरे दिन तक बन्द राखेन काहे तेरे सांझ हुइ गै रहे।⁴मुला

जउने—जउने परमेसुर केर बात सुनेनि बहुतेन बिसवासु कीन्हेन अउर उनकी गिनती बढ़ि कै पांच हजार मनई हुइगै।

⁵दुसरे दिन अधिकारी पुरनिये अउर धारमिक बातन क्यार सिखावै वाले यरुसलेम मां यकट्टा भये।⁶हुआँ पर महापुरोहित हन्ना अउर कइफा, यहुन्ना सिकन्दर अउर महापुरोहित केर घरौ क्यार लोग रहै।⁷उइ पतरस अउर यहुन्ना कइहां बीच मां खड़ा करिके पूछे लागे कि यहु काम तुम कहिके नाम तेरे करतिहौ।

⁸तब पतरस पवितर आतमा तेरे भरपूर हुइकै वहिते कहिन कि “हे जनता केर अधिकारिव अउर पुरनियो”।⁹यहि दुखल मनई केर साथ जउन भलाई कीन गै है यदि वहिके बारे—मां हमते पूछ—ताछ कीन जाति है कि यह कउनी तरीके तेरे अच्छा भवा है।¹⁰तौ तुम अउर सगरे इसराएली लोग जानि ले कि यीसु मसीह नासरी केर नाम तेरे जेहिका तुम सब लोगन सलीब पर चढ़ा दीन रहौ जेहिका परमेसुर मरे हुएन मा ते जियायेन, यहु मनई तुमरे सामने भला चंगा खड़ा है।¹¹यहु वहय पाथर आय जेहिका तुम राज मिस्त्रन तुच्छ जानेन मुला वहय कोने केर सिरे क्यार पाथरु हुइ गवा।¹²कउनेव दुसरे ते उद्धार नाई है। काहे तेरे सरग केर नीचे मनइन मइहां कोई अउर नाम नाई दीन गवा है। जेहिते हम उद्धार पा सकी।

¹³जब उइ लोगन पतरस अउर यहुन्ना क्यार हिसाव देखिन तौ उनका यह बात पता चली कि यी अनपढ़ अउर साधारन लोग हैं तब ताजुब कीन्हेन। मुला बादि मां उनका पहिचानेन कि ई लोग यीसु केर साथी रहे हैं¹⁴वै वहि मनई केर कारन जउन अच्छा भवा रहे उनके साथ खड़े देखि कइहां कुछ विरोध मइहां बातें न कइ सके।¹⁵उइ लोगन पतरस अउर यहुन्ना कइहां धरम महासभा ते बाहर कई दीहेन अउर आपस मां मसविरा करि लागे।

¹⁶हम इन लोगन तेरे का करी? काहे तेरे यरुसलेम क्यार रहै वाले सब जानित हैं कि उनते एकु बड़ा चमत्कारी चिन्ह देखावा गवा है।¹⁷परन्तु यह बात लोगन मा अउर न फइलि जाय यहिके मारे हम उनका धमकाई कि ई नाम तेरे फिरि लोगन तेरे बातें न करै।

¹⁸तब उन लोगन पतरस अउर यहुन्ना कइहां बोलायेन अउर चितौनी देई कै कहिन “यीसु केर नाम तेरे न कुछ कहेव न लोगन कइहां सिखाएव”।¹⁹मुला पतरस यहुन्ना उनका जवाब दई कै कहेसि तुम खुदै नियाव करौ का परमेसुर केर निगाहन मां यह बात उचित है “कि हम परमेसुर केर बात तेरे बढ़ि कै तुम्हारि बात भइ।”²⁰यहु तौ हमते होई नाई

सकति है कि जउन दीख अउर सुना है वहु न कहीं।
²¹तब उइ लोगन उनका अउर धमका कइहां छोड़ि दिहिन। लोगन के कारन उनका दण्ड देवे क्यार कउनौ दाव नाही मिला, काहे ते जउनि घटना में वहिके मारे लोग परमेसुर केर स्तुति करै लाग रहै।²²वह मनई जउन चमत्कारी ढंग ते चंगा भवा रहै चालीस साल तेरे ज्यादा उमर क्यार रहै।

बिसुवासिन केर पराथना

²³पतरस अउर यहुन्ना हुंवा ते छूटि कइहाँ अपने साथिन केर पास आये, अउर जउन कुछ महापुरोहित अउर धारमिक पुरनियन वहिते कहै रहिन वहु सब बताएन।²⁴यह सुनिके उनके साथी एक चित्त हुइ के ऊँचे सबद ते परमेसुर ते पराथना करेन। “हे स्वामी तुम वही हौ जउने सरग अउर धरती, समुंदर अउर जो कुछ वहिमा है अनावा हौ।”²⁵तुम पवित्तर आतमा तेरे अपने सेवक अउर हमरे पुरखा दाऊद केर मुंहि ते यहु कहे रहै। “दुसरी जातिन हुल्लड़ काहे मचायेन?” देस देस केर लोगन काहे बेकार केर बाते सोचिन? ²⁶परभु अउर वहिके अभिसिक्त केर विरोध मां धरती क्यार राजा यकट्टे हुइ के खड़े हुई गये हैं।

²⁷सचमुच मइहां तुमरे सेवक यीसु केर विरोध मां जेहिका तम अभिसेक कीन्हेव हेरोदेस अउर पुत्तुस, पिलातुस दूसरी जातिन अउर, इसराएलिन को साथ मिलि के यहि नगर मां यकट्टा भये।²⁸ताकि जउन कुछ पहिले तेरे तुमरी सामर्थ अउर इच्छा तेरे ठहरावा गा रहै वहय करै।²⁹अब हे परभु उनकी धमकिन कइहां दयाखौ अउर अपने सेवकन कइहां यह वरदान देवो कि तुमरे वचन क्यार बड़े हियाव तेरे सुनावै।³⁰चंगाई केर खातिर अपने हाथे कइहां बढ़ावा जेहिते चिन्ह अर अनोख काम तुमरे पवित्तर सेवक यीसु के नाम ते कीन जाय।

³¹जब वह पराथना करि चुके तब वह जगत जहां वहि यकट्टा रहै हाली गवा अउर सब पवित्तर आतमा तेरे मारग अउर परमेसुर क्यार वचन हियाव तेरे सुनावति रहै।

बिसुवासिन के सामुहिक जीवन्

³²बिसुवासिन केर मंडली मा एकु चित अउर एकु मन रहब ईया तकु कोऊ अपन सम्पति क आपन न कहब मुला सबे कछु साझे केर रहिन।³³परेरितन बहुतु सामर्थ ते परभु यीसु केर “फिर ते जी” उठन केर गवाही देत रहे अउर उन सबै पइ बहुत अनुगरह

रहब।³⁴उन म ते कौनो गरीब न रहब। काहे ते उन्हीन केर पासु जमीन अउर घर रहब। उइ क बेची केरि उइ चीजन दाम लाइ केरि परेरितन केर पावों मा राख दिहीन।³⁵अउर उन केर जैसी जरूरत रही उई केर मुताबिक उन्हीन मा बाँट दी जात रहब।

³⁶यूसुफ नाव केर एकु मनई रहब जऊन साइपरेस केर रहन वाला एकु लेवी रहब। जऊन केर नाव परेरितन ते बरनबास रखब (अर्थात सान्ती केर बेटवा)
³⁷उइ केर कछु जमीन रहीन जोउन उइ ते बेची अउर दाम लै केर परेरितन केर पावों मा राखे दीन।

हनन्याह अउर सफीरा

5हनन्याह नाम क्यार एकु मनई रहै वहु अउर वहिकी मेहरारु सफीरा कुछ जमीन बेचिन।²ऊ वहिके दाम ते कुछ रुपया अपने पास छिपा कइ राखि लीन्हि, यह बात वहिकी मेहरारु जानत रहै, हनन्याह बाकी रुपया लइके चलन केर पायेन केर आगे राखि दिहिस।

³तब पतरस कहेन “हनन्याह सैतान तुमरे मन मां यह बात काहे डारिसि कि तुम पवित्तर आतमा तेरे झूठ ब्वालै अउर मीन केर दाम तेरे कुछ छिपा कइहां राखि लेव।⁴जब तब जमीन तुम्हरे रहै तब तक का वह तुम्हारी नाई रहै? अउर जब वह विकिगै तब का वह तुमरे अधिकारन नाई रहै? तुम अपने मन मा यह बात काहे सोचेव? तुम मनइन तेरे नाई बल्कि परमेसुर तेरे झूठ बोले हौ।

⁵ई बाते सुनिके हनन्याह गिरि गवा अउर मरि गवा अउर जउने—जउने यह बात सुनि उन सब पर बड़ा भय छाय गवा।⁶फिर नौजवानन वहिकी अरथी बनायेनि अउर बाहेर लइ जा कइहां दफन करि दीन्हेनि।⁷लगभग तीन घंटा के बाद वहिकी मेहरारु पतरस के पास घर केर भीतर आयी अउर जउनि घटना घटि चुकी रहै वह वहिते अन्जान रहै।⁸पतरस वहिते कहेन मोहि ते बताव का वह जमीन तुम लोगन इतने मइहां बेचि रहौ? उन केहनि हा इतने मा।

⁹पतरस वहिते कहिन यह का बात है? कि तुम दोनों लोगन परभु केर आतमा केर परिच्छा ले खातिन एका कीन हौ दयाखो तुमरे आदमी क्यार दफन करै वाले लोग दुआरे ही खड़े हैं। अउर वही तुमको बाहेर लइ जइहैं।

¹⁰तब वह तुरन्तै वहिके पायेन पर गिरी अउर मरिगै। नौजवान भीतर आये अउर वहिका मरा भवा पायेनि अउर वहिकी लास बाहर लइ जा कइहां

वहिके आदमी के पास दफन करि दीन्हेनि।¹¹सगरी बड़ा भय छा गवा।

चेलन रोगिन कइहां चंगा करति है

¹²चेला लोग बहुत चिन्ह अउर अदभुत काम लोगन केर बीच मां करि रहे रहै। वहि सब एक चित्त हुइकै सुलेमान केर बरामदा मां यकड़ा हुवा करति रहै।¹³मुला अउर लोगन केर हिम्मति नाई परति रहै कि वै उनमा सामिल हुइ जाय जबकि लोग उनकी तारीफ करति रहै।¹⁴बिसवासु करे वाले बहुत मनई अउर औरतिया परभु केर मंडली मां सामिल होति रहै।¹⁵हियां तक की लोग बीमारन कइहां सड़क पर लाय—लाय खटियन अउर चटाई पर लेटा देति रहै। जेहिते पतरस जब आवै तौ उनकी परछाई ही केहि पर परि जाय।¹⁶यरुसलेम केर आसपास के नगरन ते बहुत लोग बीमारन कइहां अउर भूत—चुड़ैलन केर सतायेन हुएन कइहां लावति रहै अउर उई सब अच्छे हुइ जात रहै।

पेरितन केर सतावा जावे

¹⁷तब याजक अउर वहिके सब साथिन जउन सदूकिन के पन्थ क्यार रहै जलन ते भरि गै।¹⁸उन लोगन क पकरि के जेलखाने मां बन्द करि दीन्हेनि।¹⁹मुला राति कइहां परभु क्यार एक सरग दूत जेल क्यार द्वार खोलि कै उनका बाहर लै आवा अउर वहिते कहेकिस।²⁰जाओ मंदिर मां खड़े होइके जीवन केर सन्देश कइहां सबका सुनाव।

²¹जइस वहिते कहा गवा रहै वै सबेरा होतै मंदिर मां जाके उपदेसु करै लाग याजकन अउर उइके साथी आये वे धरम महासभा केर सदस्यन अउर इसराएल केर सब धर्मिन पुरनियन कइहां यकड़ा कीहिन अउर जेल मां सन्देशु भेजिन कि पतरस अउर यहुन्ना कइहां पेस कीन जाय।²²जब सिपाही जेल मां पहुँचे तब हुवां उनका पतरस अउर यहुन्ना नाई मिले। सिपाहिन लउटि कइहां खबरि दीन।²³जेल सावधानी ते बन्द रहै, पहरेदार दरवाजन पर खड़े रहै मुला जब हम दरवाजा खोलें तब हमका अन्दर कउनउ नाई मिला।²⁴यह बात सुनिकै मंदिर क्यार सरदार अउर याजक उनके बारे मां भारी चिन्ता मा परिगै कि का होय वाला है।

²⁵वही बेरिया कउनउ आ कइहां वहिते बताइस कि, दूयाखौ जिनका तुम जेल मां बन्द कीन रहौ वै मनई मंदिर मां खड़े हुइकै लोगन कइहां उपदेसु दे रहे हैं।²⁶तब मंदिर क्यार सरदार सिपाहिन कइहां साथ

लइकै गवा अउर पतरस अउर यहुन्ना कइहां लै आवा। मुला जबरियां नाई काहेते उइ डेरति रहै कि लोग उन पर पत्थर बाजी न करै लागै।

²⁷उन लोगन महाधरम सभा केर सामने उनका खड़ा किहिन, महापुरोहित वहिते पूछिस।²⁸का हम तुमका चितौनी दइकै आदेसु नाई दीन रहै? कि तुम यहि नाम ते उपदेसु न दिहेव। तउनउ दूयाखौ तुम सगरे यरुसलेम कइहां अपने उपदेसु ते भरि दीन हो, अउर वहि मनई केर हतिया क्यार दोसु हमरी गरदन पर लावा चाहति हो'?

²⁹तब पतरस अउर दुसरे चेला जवाबु दीहेन, “मनइन केर आग्या ते बड़ि कै परमेसुर केर आग्या मानव हमार करतब्य है”।³⁰जवन यीसु कइहां तुम सलीब पइ चढ़ावै कइहां मारि डारा रहौ।³¹वहीं कइहां परमेसुर ने परभु अउर उद्धारकरता ठहरा कइहां अपने दाहिने हाथ तेरे सबते ऊँच राखेन हन जेहिते ऊ इसराएल कइहां उनके पापन ते मन फिराव केर सकती अउर माफु देई।³²हम इन सब बातन क्यार गवाह हन, अउर पवितर आतमा गवाह है जेहिका परमेसुर उन लोगन कइहां दीन हइन जउन उनकी आग्या मानति है।

³³यह सुनि कै उइ करोधु तेरे आग बबूला होइगे अउर चेलन का मार डारा चाहिन कइहां थोरी दूयार खातिर बाहर जाय केर आग्या दीन।³⁴मुला उहां गमिलिएल नाव केर एक फरीसी रहै।³⁵वौ कहेसि हे इसराएलिन जउन कुछ तुम इन लोगन केर साथ करा चाहति हो सोचि समझि केर करेव।³⁶थोरे दिन पहिले थियूदास यू कहति भये उठा रहै कि हमहूँ कुछ हन अउर लगभग चार सौ मनई वहिके साथ हुइगे रहै। परन्तु मारा गवा अउर जितने वहिका मानति रहै सब तितर—बितर हुइगे, अउर मिटिगै।³⁷वहिके बादि जनगनना के दिनन मइहां गलील परदे क्यार यहूदा उड़ा। अउर वहाँ कुछ लोगन कइहां अपनी ओर करि लीन्हेसि परन्तु वहाँ नास हुइगै, अउर जितने लोग वहिका मानति रहै सब तितर—बितर हुइगै।³⁸मुला अब मोरि सलाह मानो अउर इन मनइन ते दुरिही रहौ अउर इतने कुछ मतलब न राखौ काहे ते उनका यू धरम क्यार कामु अगर मनइन केर तरफ तेरे होई तौ खुदि ही मिटि जाई।³⁹मुला अगर परमेसुर केर ओर ते होई तौ तम इनका नाई रोकि पइहौ अउर तुम केवल परमेसुर तेरे लड़ै वाले ठहरिहौ।

⁴⁰तब उन लोगन गमलीएल केर बात मान लीन अउर चेलन कइहां बुलाए केर उनका पिटवायेन अउर उनका यू हुकुम दइकै छोड़ि दीहिन कि “यीसु केर

नाम तेरे फिरि बातें न करेब।’

⁴¹चेले यहि बात ते खुसी भये कि उइ यीसु के नाम खातिर निरादर होय केर जोग तौ ठहरे वै आनन्द मनावति भये धरम महा सभा तेरे बाहर चले गये। ⁴²मुला वहि मंदिर मा रोजाना अउर घर-घर मां उपदेसु करै अउर यहि बात केर खुसखबरी सुनावै ते कि यीसु ही मसीह है नाई रुके।

सात क्यार चुनाव

6उन दिन मां जब चेलन केर गिनती बहुत बढ़ि रही रहे, तब यूनानी चेला इबरानिन केर सिकायत करै लागे कि रोजाना केर सेवा मां हमारी विधवन केर सुधि नाई लीन जाति है। ²कतब उन बारह चेलन नये चेलन केर मंडली कइहां खिलवै-विलावै वाली सेवा मां लागी। ³यह कारन भाइयों अपने मत हते मनइन क जउन पवित्तर आतमा अउर बुद्धि ते भरपूर होय चुनि लेव कि उनका हम यदि काम पर लगा देई। ⁴हम तौ पराथना अउर बचन सेवा मां लगा रहिबे।

⁵यह बात पूरी मंडली कइहां नीक लागि, अउर उन स्तिफनुस नाम केर याक जन क जउन बिसवासु अउर पवित्तर आतमा ते भरपूर रहे चुनेनि, वहिके अलावा उन फिलिप्पुस, पुरुखुरुस, निकानोर टीमोन, परमिनास अउर अन्ताकी वाला नीकुलाउस को जउन हूदी मत मा आ गए रहैं, चुनि लिहिन। ⁶उन लोगन इनका परेरितन के समुहे खड़ा कीजिन, अउर परेरितन उन पर हाथु रखि के पराथना किहिन।

⁷यही तरह ते परमेसुर क्यार बचन फैलति रहा, अउर यरुसलेम नगर मां चेलन केर गिनती बहुत बढ़ति गै। पुरोहित भारी तादत मां ई मत के माने वाले बनिये।

स्तिफनुस क्यार गिरिफतारी

⁸स्तिफनुस अनुगरह अउर सामरथ ते भरपूर होइके लोगन मां बड़े-बड़े अद्भुत काम अउर चिन्ह देखावा करति रहै। ⁹तब लिविरतीनों केर मंदिर मते कुरैनी अउर सिकन्दर अउर किलिकिया, अउर आसिमा के लोगन मते कइयौ जने उठिके स्तिफनुस ते वाद-विवाद करै लागे। ¹⁰मुला वहि इस अउर आतमा क्यार जेहिते भरपूर होइके स्तिफनुस बातें करति रहै, वे सामना न कइ पाए।

¹¹यहि पर उन कइयों लोगन कइहां उभारेनि जउन यू कहै लागे, “हम उका मूसा अउर परमेसुर केर विरोध मा निन्दा केर बातें करति सुना हवै”।

¹²वे लोगन कइहां अउरधरमी पुरनियन कइहां अउर सास्त्रियन क भड़का कै वहि पर चढ़ि आएँ उन लोगन स्तिफनुस कइहां पकरिन अउर वहिका धरम महासभा मा लइगे। ¹³उइ लोगन झूठे गवाह खड़े कीहेन जउन यू कहेन, “यहु मनई ई पवित्तर स्थान अउर बेवस्था केर खिलाफ बोलबु नाई छवाड़ति है। ¹⁴हम यहिका यू कहति सुना हवै, कि यीसु नासरी ई जगह क ढा देई, अउर उन रीति रिवाजन कइहां बदलि डारी जउन मूसा हमका सौंपनि है।

¹⁵तब सभा मां बैठे सब लोग स्तिफनुस केर तरफ ताकेन अउर देखिन कि वहिका चेहरा सरग दूत क्यार जइस है।

धरम महासभा केर सामने स्तिफनुस क्यार भासन

7तब मापुरोहित पूछेसि का तुम पर लगाये गये आरोप सही है।

²स्तिफनुस कहेनि “भाइयों अउर बापुन सुनौ हमार कुल बाप अबराम हारान देस म बसे के पहिले मिसपुतामियां मा रहति रहैं जब तेजोमय परमेसुर उनका दरसन दीन। ³परमेसुर अबराम ते कहेनि “तम अपने द्यास अउर कुटुम्ब ते निकरि कै वहि देस मां चले जाओ। जउन तुमका देखइबे”।

⁴तब ऊ कसादयन के दे ते निकरि कइहां हारान मां जा बसा अउर वहिके बाप केर मउत केर बादि परमेसुर वहिका हवां ते लइ कइहां, यहि देस मां बसायेसि, जेहिमा अब तुम रहति हो। ⁵अउर वहिका कुछ जायदाद बरन पांव धरे भरे केर जगह हवां पर नाई दीनि, मगर परमेसुर यह परतिगा करेनि कि यहु देस तुमरे अउर तुमरे बंस के अधिकार मां करि देवे। जबकि उइ समय वहिके कोई बेटा नाई रहे। ⁶परमेसुर यहि तरह कहेनि कि “तुमरी सन्तान क्यार लोग पराये देस मां परदेसी हुई है। वै तुमे बंस कइहां गुलाम बनइहैं, अउर चार सौ साल तक दुख द्याहैं।”

⁷फिन परमेसुर कहेनि “जेहि जाति क्यार उइ गुलाम हुइहैं। वहिका हम दंड दयाहूँ। वहिक बादि उइ हुंवा ते निकरि करि यही जगह मां मोरि सेवा करिहैं।

⁸परमेसुर अबराम के खतने केर बाचा बांधेनि अउर यही दसा मा इसहाक उनते पैदा भवा, वहिके जन्म केर आठवें दिन वहका खतना कीन गवा, इसहाक ते याकूब अउर याकूब ते बारह कुलपति पैदा भे।

⁹अउर कुलपतिन यूसुफ तेरे डाह करिकै वहिके मिसर देस जाये वालेन केर हाथे मां बेचि दिहिन, मुलौ परमेसुर वहिके साथ रहै। ¹⁰परमेसुर वहिका वहिके सब कस्टन ते छोड़ा कइहा मिसर केर राजा

फिरौन केर आगे अनुग्रह अउर बुद्धि दीहेन अउर उन, वहिका मिसर पर अउर अपने सारे घर पर हाकिम ठहरायेनि।

¹¹तब मिसर कनान देस म अकाल पड़ा जेहिमा लोगन कइहां भारी तललीफ भै अउर हमरे पुरिखन कइहां अजान नाई मिला। ¹²हमरे पुरिखा याकूब जब यह सुनेन कि मिसर देस मां अनाज है तक ऊ हमरे कुल पतियन कइहां पहली बार हुवां भेजिन। ¹³दुसरी बार यूसुफ अपने भाइन पर परगट हुइ गवा अउर यूसुफ केर जाति फिरौन कइहां मालुम हुइगै। ¹⁴तब यूसुफ अपने बाप याकूब अउर अपने सगरे कुटुम्ब कतइहां जेहिमा पचहत्तर जने रहै। मिसर देस मां बोलाय लीन्हेनि। ¹⁵याकूब मिसर देस मा गये अउर हुबयं वह अउर हमार कुलपति मरे। ¹⁶अउर वे सेकेम नगर मां लाये गये वहि कबर मा रखा गए जेहिका अबराम चांदी इद कै सेकेम मां हुमोर केर सन्तान ते मोल लीन रहितन।

¹⁷जब वह परतिग्या केर पूरे होय केर समय नजदीक आवा जउन परमेसुर अबराम ते कीन रहितन तौ मिसर देस मां उनकी संख्या बहुत बढ़िगै अउर उइ बहुत हुइगै। ¹⁸मिसर देस मां दूसर राजा भवा जउन यूसुफ कइहां नाई जानति रहै। ¹⁹उसने हमरी जाति के लोगन ते छल—कपट किहिस अउर उन पर ऐसे अतयाचार किहिस कि उनका अपने नए जनमें बच्चन क फेंकि देक परा जेहिते ऊ जिन्दा न रहै।

²⁰उइ समय मूसा पैदा भये जउन बहुत सुन्दर रहै उइ तीन महीना तक अपने बाप के घरमा पाले पोसे गए। ²¹मुला जब फेंकि दीन गै तब फिरौन केर बेटी उनका उठा लाई अउर अपन बेटवा बना के पालिसि। ²²मूसा कइहां मिसर जाति केर सगरी विधि पढ़ाई गे वह बातन अउर कामन मां सामरथी रहै।

²³जब उइ चालिस बरस क्यार भये, तब उनके मन मां आवा कि वै अपने इसराएली जाति भाइन ते भेंटि करे। ²⁴मूसा याकू अपने जाति भाई पर अन्याय होति देखि कइहां वहिका बचाएन अउर मिसर निवासी कइहां मारि कहां सताए हुए क्यार बदला लिहिन। ²⁵मूसा सोचिन कि मोर जाति भाई समझिहै कि परमेसुर मोरे हाथेन ते उनका उद्धार करी। मुला उन ई बात नाई समझेन। ²⁶दुसरे किदन जब वै आपस मा लड़ति रहै तब मूसा हुवां पै आए। मूसा उनका मेलि केर खातिर समझाइन—बुझाइन कि लोगों तुम तो भाई—भाई हौ, तुम याकू दूसरे का काहे नुकसान पहुचावा चाहित हौ?

²⁷मुला जउन इसराएली अपने पड़ोसी पर अन्याय

करति रहा रहै, ऊ मूसा कइहां धकिया कइ अलग करि दीन्हिसि, अउर कहेसि तुमका हमरे ऊपर कउने हाकिम अउर न्यायी नियुक्त किहिन दीसि? ²⁸का जइसे कल तुम याकू मिसरी कइहां मरि डारे रहेव, वइसेहें मोइ मो मारि डारा चाहति हव। ²⁹यह बात सुनि कै मूसा भागिस अउर मिद्यान देस मां परदेसी होइके रहै लागि। हुंवा उनके दुइ बेटा पैदा भये।

³⁰जब पूरे चालिस बरस बीति गये, तब एक सरग दूत सीनय पहारु केर पास जंगल मां जलती भई झाड़ी केर ज्वाला मते दरसन दीन्हिसि। ³¹मूसा वहि दरसन देखि कइहां अचरज कीन तब परभु केर यह आवाज सुनेनि। ³²हम तुमरे पुरखन अबराम, इसहाक अउर याकूब क्यार परमेसुर हव, यह सुनिके मूसा डर के मारे कापें लागि, हियां तक कि उनका द्याखे तक का हियाव न भय।

³³तब परभु मूसा ते कहिन अपने पयन ते जूती उतारि लेव, काहे ते जउनी जगह पर तुम खड़े हव, वह पवित्तर जगह है। ³⁴हम सचमुच मिसर देस केर अपने लोगन केर दुरदसा देखिहै अउर उनकी आहें रोवाब, अउर चिल्लाव सुना है, यहि कारन हम उनका छोड़ावै खातिर नीचे उतरि आएन है। अब आओ हम तुमका मिसर देस मां भेजव।

³⁵जउने मूसा कइहां उन लोगन यू कहिके नकार दीन रहिन कि तुमका कउने हम पर न्यायी अउर हाकिम ठहरावा इहन, वहिके परमेसुर अउर हाकिम छुड़ावे वाला ठहरा कर उस सरग दूत के द्वारा जउन वहिका झाड़ी मां दरसन दीन रहेन भेजा। ³⁶यहि मूसा उन लोगन कइहां मिसर देस लाल समुंदर अउर जंगल केर चालिस बरस तक अद्भुत काम अउर चिन्ह देखाय देखाय के निकारि लाये।

³⁷यह वही मूसा है, जउने इसराएली ते कहा रहिन कि परमेसुर तमरे भाइन मते तुमरे खातिर हमरे अइस एकु नबी भेजिहै। ³⁸यह वही मूसा है जउने जंगल मां मंडली के बीच ऊ सरगदूत के साथे सीनै पहारु पर वहिते बातें करिन, वह हमरे पुरिखन साथ रहै, उन्हीं मूसा कइहां परमेसुर क्यार जीवित वचन मिले कि उनका वी हम तक पहुंचावै।

³⁹परन्तु हमरे पुरिखन मूसा केर बात माना न चाहेनि उन मूसा कइहां हटा कर अपन मन फिरि ते मिसर देस केर तरफ फेरिन। ⁴⁰उइ लोगन हारुन ते कहेनि हमरे खातर अइस देवता बनाव जउन हमरे आगे—आगे चलै। काहे ते तूसा जउन हमका मिसर देस ते निकारि लाये है। हम नाई जानित है किउनका का भवा? ⁴¹उइ दिनन मां इन लोगन याकू बछड़े केर

मूरति बनाएनि अउर वहि मूरति केर आगे बलि चढ़ायेनि अउर यहि तरह तेरे अपने हाथन के कामन ते मगन रहै लागे।⁴²मुला परमेसुर मुंह मोड़ि कै उन लोगन के छोड़ि दिहिन कि उइ तारागन केर पूजा करै। जइस कि नबिन केर किताब मा लिखा है कि हे इसराएल के घराने, का तू जंगल मां चालिस बरस तक पसु बलि अउर अन्न बलि मोहि के चढ़ावत रहे।⁴³नहीं तुम मोलेक केर तम्बू अउर रिफान देवता के तारे कइहां लेहे फिरति रहौ। उन मरतिन कइहां जिनका तुम पूजे करतिव बनाए रहेव यहि कारन हम तुमका बेविलोन के पार लइ जाइ कइहां बसइहौ।

⁴⁴गवाही क्यार तंबू जंगल मां हमरे पुरिखन केर बीच मा रहति रहै, परमेसुर मूसा तेरे कहिन जउन नमूना तुम दीखै हो वही तरीके ते मोहिका बनाएव।⁴⁵यहि कारन वही नमूने क्यार तंबू बनावा गया। वहि तंबू क हमार पुरखा पुराने दिनन मां यहोसू केर साथ हियां लइ आए, जउने समय उन लोगन दुसरी जाति के देख पर अधिकार पाएन, जिनका परमेसुर हमरे पुरखन के सामने ते निखारि दीनेन, वह दाऊद केर समय तक रहा।⁴⁶दाऊद पर परमेसुर अनुग्रह कीन्हेन उन विनती कीन्हेन हम याकूब केर परमेसुर केर रहय खातिर एकु घर बनइहौ।⁴⁷मुलौ सुलेमान परमेसुर खातिर एकु घर बनाएन।

⁴⁸परन्तु परम परधान परमेसुर हाथ के बनाए घर मां नाई रहति जइस कि नबी कहति हैं।⁴⁹परभु कहति हैं, “सरग मोरे सिंहासन अउर धरती मोरे पायन की चौकी है, मोरे खातिर तुम कउनी तरह घर बनइहौ” मोरे आराम केर कउनी जगह होई⁵⁰का ई सब चीजें मोरे हाथ केर बनाए भई नाहीं है? “ए हठीले मन वालेन अउर कान केर खतना रहति लोगों, तुम हरदम पवित्तर आतमा क्या सामना करति रहति हैं।

⁵¹जइसे तुम्हार पुरखा करति रहै, वइसहै तुमहू करति हव।⁵²नबियन मते किनका तुमरे पुरखन नाहीं सताएन? उन वही धरमी केर आवे के खबर देवे वालेन कइहां मारि डारेन, अब तुमहू वहिका पकड़ावै वाले अउर मारि डाले वाले भए हव।⁵³तुम सरग दूतन ते ठहराई भई बेवस्था तौ पाएव, मगर वहिका पालन नाहिन कीन्हेव।

स्तिफनुस पर पथरवाही

⁵⁴ई बातें सुनिके वै तेरे आगि बबूला होइगै, अउर वहिपर दांत पीसै लागे।⁵⁵मुला उन पवित्तर आतमा ते भरपूर होइके सरग के तरफ देखिस अउर परमेसुर

के महिमां कइहां परमेसुर केर दाहिनी तरफ खड़े भए देखेन।⁵⁶उन कहने “दयाखौ भइ सरग कइहां खुला भवा अउर मनई के बेटवा कइहां परमेसुर केर दाहिनी तरफ खड़ा भवा देखि रहने।

⁵⁷तब उइ आवाज मइहां चिल्लाएन अउर अपन कान बन्द करि लीहेन अउर वै सब उन पर टूट परे।⁵⁸अउर वहि उनका पकड़ि केर नगर केर बाहर लैगे अउर हुंवा पर उन पर पत्थरवाह करै लागे। गवाहन अपन कपड़ा साउल नाम केर याक जवान के पास उतारि कै राखि दीन रहने।

⁵⁹“वै स्तिफनुस इहां पत्थरवाह करति रहे स्तिफनुस यह कहकर पराथना करति रहा कि हे परभु यीसु मोरी आतमा कइहां कबूल करौ”।⁶⁰फिरि ऊ घुटना टेकिन अउर ऊचे सबद ते पुकारेसि “हे परभु यह पाप उन न लगायेव अउर यह कहि कर सोय गवा। वहिकी हतिया मां साउल केर सहमति रहै।

कलीसिया क्यार सताव अउर तितर—बितर हुइ जाबु

8वही दिन यरुसलेम केर मंडली पर बड़ा उत्पातु भवा परेरितन कइहां सब बिसवासी यहूदिया अउर सामरिया परदेसन मा तितर—बितर हुइगै।²भक्तन स्तिफनुस केर लास कइहां कबर मा रखेनि अउर वहिके खातिन बड़ा बिलाप किहिन³साउल मंडली कइहां उजारि रहै अउर घर—घर घुसि केर मनई अउर औरतन कइहां खइचि खइचि केर जेल मां डारि रहै।

फिलिपु सामरिया मा

⁴जउन बिसवासी तितर—बितर भये रहै यीसु केर खुसखबरी सुनावति भये नगर—नगर मा गाँव—गाँव घुमे लागे।⁵फिलिपुस सामरिया नगर मा गवा। अउर हुवा लोगन मां मसीह क्यार परचारु करै लाग।⁶अउर जउनी बातें फिलिपुस उतने कहति रहे उनका सुनिके अउर जउन चिन्ह वहि देखावति रहे उनका देखि—देखि लोगन एक चिन्ता हुइके मनु लगायेनि।⁷काहे तेरे बहुतेन मते भूत—चुड़ैल बहुते आवाज तेरे चिल्लाति भई निकरि गयीं अउर बहुत लकवा क्यार रोगी ठीक हुइगे अउर लंगड़ेव अच्छे कीन गै।⁸अउर वै नगर मां बड़ा आनन्द भवा।

सिमौन जादूगर

⁹यहिते पहिले उई नगर मां सिमौन नाम क्यार एकु मनई रहति रहै ऊ जादू टोना करिके सामरिया केर

लोगन कइहां चकित कीन करति रहै अउर खुद कइहां महान मनई कहत रहै।¹⁰सब छोटें तेरे बड़े तक वहिका मानति रहै अउर कहति रहै कि यहि मनई कइहां परभु केर उइ सक्ति हय जउन महान कहलावती हय।¹¹ऊ बहुत दिनन तक अपने जादू टोना केर कामेन ते उनका चकित करि रखा रहनि अहिके मारे उई वहिका बहुत मानति रहै।¹²उन लोगन फिलिप्पुस केर बात पर बिसवासु कीन्हैनि जउन परमेसुर केर राजु अउर यीसु केर नाम केर खुस खबरी सुनावति रहै तब सब मनई अउर औरते बपतिसमा ले लागे।¹³सिमौन बिसवासु कीन्हैसि अउर बपतिसमा लइकै फिलिप्पुस केर साथ रहै लाग वह चिनह अउर बड़े-बड़े सामरथी काम देखि कइहां चकित होति रहै।

¹⁴जउन चेला यरुसलेम मा रहै जब उन सुनेनि कि सामरिया केर लोगन परमेसुर केर वचन कइहां मानि लीन हइनि तब पतरस अउर यहुन्ना कइहां उनके पास भेजेनि।¹⁵उई सामरिया नगर मां आये अ उनके खातिर पराथना किन्हैनि कि उई पवित्तर आतमा पावै।¹⁶काहे ते वह अबग लौ कहिव पर नाई उतरै रहै। उन तौ केवल यीसु केर नाम मा बपतिसमा लीन रहनि।¹⁷तब पतरस अउर यहुन्ना उन पर हाथ धरिन अउर उन पवित्तर आतमा पायेनि।

¹⁸जब सिमौन देखिसि कि परेरितन केर हाथ धरै तेरे पवित्तर आतमा दीन जाति हय तब वह उनके पास रुपया लई आवा अउर कहैसि।¹⁹“यू अधिकार हमका देव क जेहि पर हाथ धरी पवित्तर आतमा पावै”।

²⁰पतरस वहिते कहिन “तुम्हार रुपया तुमरे साथ नासु होय काहें ते तुम परमेसुर केर दान कइहां रुपयन तेरे खरीदे क्यार विचार कीन हौ।²¹यदि बात मा न तो तुमार हिस्सा है न बांटा काहे ते तुमार मन परमेसुर के आगे सीध नाई है।²²यहि कारन अपनी यहि बुराई ते मन फिराव अउर परभु ते पराथना करौ हुइ सकत है उइ तुमरे मन का विचार माफु करि दे।²³हम देखित हन कि तुम पित्त केर अइसन कइवाहट अउर अधरम केर बन्धन मा जकड़ा हव।

²⁴सिमौन जवाबु दिहिस “तुम हमरी खातिर परभु ते पराथना करौ कि जउनी बातें तुम कहिहौ उनमा ते कउनव मोहि पर न आ पड़े।”

²⁵पतरस अउर यहुन्ना गवाही दै कै अउर परभु क्यार बचन सुना कै यरुसलेम के लउटि गै। जात समय वे सामरियन के कई गाँवन मां खुसखबरी सुनावति गये।

फिलिप्पुस अउर इथोपियायी

²⁶परभु के याक सरग दूत फिलिप्पुस ते कहिन “उतु अउर दक्खिन के तरफ वहि जंगली रास्ते पर जाव जउन यरुसलेम ते गाजा कइहां जाति है।²⁷वहु उठि के चल दिहिस अउर देखिस कि इथोपिया देस क्यार एकु मनई आय रहा है। जउन नपुंसक रहै इथोपिया देस केर रानी कन्दा क्यार मंत्री अउर खजांची रहै वहु भजन करै खातिर यरुसलेम कइहां आवा रहै।²⁸वह अपने रथ पर बइठे यसायाह नबी के किताब पढ़ति भये अपने देस कइहां लउटि रहै।²⁹तब आतमा फिलिप्पुस ते कहिन “पास जाइकै यहि रथ केर साथ हुइ लेव”।

³⁰फिलिप्पुस वहिकि तरफ दउरे उन वहिका यसायाह नबी के किताब पढ़ति भये सुनेन, वहिते पूछेन तुम जउन पढ़ति हव का वहिका समझतौ हौ।

³¹ऊ कहिसि “जब तक कोई हमका न समझावै तब तक हम कैइसे समझी?” ऊ फिलिप्पुस ते विनती किहिस “रथ मा चढ़ि कै मोरे पास बइठि जाव।

³²पवित्तर सास्त्र क्यार जउन अध्याय वहु पढ़ि रहा रहै वहु यू रहै, “वहु भेंडी के नाई बलि होय खातिर पहुंचावा गवा।” जइसे मेमना अपनी ऊ कतरै वाले के सामने चुप रहति है वइसेइ वह अपन मुह नाई खोलिस।³³वहिकी दीनता के कारन वहिका नियाव नाहीं होइ पावा वहिके समय के लोगन क्यार बखान कउन करी? काहे ते वहि क्यार परान धरती परते उठावा जात है।

³⁴ऊ नपुंसक फिलिप्पुस ते पूछिन “हम तुमते विनती करति है कि हमका बताव कि नबी यह बात केहिके खातिर कहति है। अपने या कउनेउ दूजे केर खातिर।”

³⁵तब फिलिप्पुस बात सुरु किहिस अउर सास्त्र के यही अध्याय ते सुरु करि ते यीसु क्यार संदेस सुनाइसि।

³⁶राह मां चलति-चलति उइ याक अइसी जगह पहुंचे तब ऊ नपुंसक कहै लाग द्यारखौ हिया तौ पानी है अब हमका बपतिसमा ले मइहां का रूकावट हुई सकति है? ³⁷फिलिप्पुस कहिन, “यदि तुम पूरे मन ते बिसवास करति हो तो यू हुइ सकति है। व जवाबु दिहिन कि “हम बिसवास करति हौ कि यीसु मसीह परमेसुर क्यार बेटवा है।³⁸तब वै रथ खड़ा करै क्यार हुकुम दिहिन फिलिप्पुस अउर नपुंसक दोनों पानी मा उतरि परे अउर फिलिप्पुस वहिका बपतिसमा दिहिसि।³⁹जब वह पानी ते निकरि कइहां ऊपर आये तब परभु क्यार आतमा फिलिप्पुस कइहां

उठा लई गवा। अउर नपुंसक फिर वहिका न देखि पायेसि। अउर वहि खुसी मनावत भये अने रास्ते पर चला गवा।⁴⁰फिलिप्पुस असदोद नगर मां देखाई पड़ा अउर जब तक ऊ कैसरिया नगर मां नाई पहुंचा तब तक नगर-नगर खुसखबरी सुनावति रहा।

साउल क्यार मन बदलब

9साउल अब तक परभु केर चेलन कइहां डेरावै धमकावै अउर उनका मारि डारै केर धुन मां रहै। ऊ महापुरोहित केर पास गवा।²ऊ दमिस्क नगर के आराधनालय केर नाम यदि आसय केर चिट्ठी मांगेसि कि जिन मनइन अउर औरतन कइहां ई पन्थ पर पावै उनका बाधि कइहां यरुसलेम ले आवै।³जब ऊ चलति चलति दमिस्क के नजदीक पहुंचा तब अचानक आकास ते वहिके चारों तरफन जोति चकमी।⁴वहु जमीन पर गिरि पड़ा अउर यह आवाज सुनेसि “हे साउल हे साउल तुम मोहिका काहे सतावति हौ।

⁵वह पूछेसि हे परभु तुम कउन हौ? उन कहेनि हम यीसु हन जेहिका तुम सता रहे हौ।⁶मुला अब उठौ नगर मां जाव जउन तुमका करेक है।

⁷तउन आवाज तौ सुनेनि मुला देखिन केहू का नाई।⁸साउल जमीन पर ते उठा मुला जब आंखी खोलनि तौ वहिकी कुछ न देखा परा वचै उनका हाथ पकरि कै दमिस्क मां लैगे।⁹उनका तीन दिन तक कुछ देखाइ न परा अउर न कुछ खायेनि पीईसि।

¹⁰दमिस्क नगर मा हनन्याह नाम क्यार एकू चेला रहै परभु वहिते दरसन मां कहेन हे हनन्याह ऊ कहेसि हां परभु।

¹¹परभु वहिते कहिन “उइव अउर सीधे गलियारे तेरे चले जाव हुंवा यहूदा के घर मां साउल नाम के याक तरसी मनई कइहां पूछि लेव देखु ऊ तौ पराथना करि रहा हवै”¹²वहि दरसन मा हनन्याह नाम केर याक मनई के घर के भीतर आवति अउर अपने ऊपर हाथु धरति देखिस जेहिते ऊ फिर ते द्याखै लागै।

¹³हनन्याह जवाबु दिहिन “परभु यहि मनई के बावत मां बहुतेन ते सुना है कि यहि यरुसलेम मां तुमरे पवित्तर लोगन पर बड़ा अत्याचार कीन हय।¹⁴हिया दमिस्क मां यहिका महापुरोहितन केर तरफ ते अधिकार मिला कि जउन तुम्हार नाम लेति है उनका सबका बन्दी बनाकर यरुसलेम लइ जाएं।

¹⁵परभु वहिते कहिन “तुम जाव काहे ते ऊ दीगर जातिन, राजन, अउर इसराएलिन केर समूह म्बार

नाम परगट केर खातिर चुना भवा बरतन है।¹⁶हम बतइहौं कि वहिका मोरे नाव खातिर केतना दुख उठायै क परी।

¹⁷तब हनन्याह उठि कै घरे गवा हुंवा उन साउल पर हाथु धरेनि अउर कहिन हे भइया साउल परभु यानी यीसु जउन वहि रास्ते मां जेहिते तुम आये हौ तुमका देखाई परा रहै उनहिन मोहिका भ्याजा हइन कि तुम फिर द्याखै लागौ अउर पवित्तर आतमा तेरे भरि जाओ।¹⁸तुरन्तै साउल केर आखिन ते छिलका अइस गिरे अउर वे द्याखै लाग वै उठि कै बपतिसमा लीन्हेन फिर खाना खा कर ताकति पायेन।

दमिस्क अउर यरुसलेम नगर मा साउल

¹⁹साउल कइयों दिन तक उन चेलन केर साथ रहे जउन दमिस्क नगर मा रहै।²⁰वहि तुरतै सभाघरन मां यीसु क्यार परचारु करै लाग कि उइ परमेसुर क्यार बेटवा हवै।²¹सब सुनौ बालेन चकित हुइ कै कहै लाग “का यू वहय मनई नाई आय जउन यरुसलेम मा यीसु क्यार नाम ले बालेन कइहां तबाह करति रहै अउर हियो यही खातिर आवा रहै कि उनका बन्दी बना कइहां महापुरोहितन केर तीन लइ जाय।²²मुलौ साउल लगातार सामरथी होति गवा यहि बात क्यार परमान दइ कै कि मसीह यहै यीसु हैं दमिस्क केर रहै वाले यहूदियन क्यार मुँह बन्द करि दीन्हेसि।

²³बहुत दिनन बाद यहूदिन मिलि कै साउल कइहां मारि डारे क्यार सडयन्त्र रचेनि।²⁴मुलौ उनके सडयन्त्र केर बात साउल कइहां मालूम हुइ गै यहूदी साउल कइहां मारि डारे खातिर दमिस्क केर फटकन पर पहरा लगा कइहां बइठति रहै।²⁵मुला एक रात कइहां साउल केर चेलन उनका टोकरे मां कइ केर अउर चाहर दीवारी तेरे लटका कइहां यरुसलेम नगर केर बाहर उतारि दिहिन।

²⁶साउल यरुसलेम मां पहुंचे उइ चेलन के साथ मिलै केर कोसिस किहेन। मुलौ उइ सब वहिते डेरात रहै। काहे ते उनका यकीन नाई होति रहै कि वहउ यीसु क्यार चेला है।²⁷मुला बरनवास उनका अपने साथ चेलन तीर लइगे अउर उनका बताएन कि साउल कउनी तरह राह मां परभु कइहां देखिन अउर परभु वहिते बाते कीन फिर दमिस्क मां साउल केतनी हिम्मत ते यीसु क्यार परचारु किहिन।²⁸साउल उनके साथ यरुसलेम मां आवति जाति रहे।²⁹उइ निडर हइके परभु के नाव क्यार परचारु करति रहे। वह यूनानी भासा बोले वाले यहूदिन के साथ बातचीत

अउर वाद—विवाद करति रहै। मुला उइ उनकी हतिया केर कोसिस करै लागे।³⁰जब भाइन कइहां यू मालूम भवा कि वै उनका कैसरिया लइगै, अउर हुवाँ ते तरसुस नगर कइहां भेजि दिहिन।

³¹तब पूरे यहूदा परेदेस गलील परदेस अउर सामरी परदेस मा कलीसिया केर चैन मिला, अउर वहिकी तरक्की होति गै, वह परभु केर भय अउर पवित्र आतमा केर सान्ती मां चलति गै अउर वहिकी बढ़ती होति गै।

एनियास अउर दोरकास

³²अइस भवा कि पतरस हर जगह ते फिरति भये उन पवित्र लोगन तीर पहुंचे जउन लुद्दा नगर मां रहित रहै।³³हुवां पतरस कइहां एनियास नाम क्यार एकु लकवा क्यार मारा भवा मनई मिला ऊ आठ बरस ते खटिया पर परा रहै।³⁴पतरस वहिते कहिन 'ऐ एनियास यीसु मसीह तुमका चंगा करति है। उठौ अपन बिछौना ठीक करौ ऊ तुरन्तै उठि खड़ा भवा।³⁵लुद्दा अउर सारोन क्यार सब रहै वाले वहिका ठीक देखि कइहां परभु केर ओर लउटे।

³⁶याफा मां तबीता यानी दोरकास नाम केर याक बिसुवासनी रहति रहै। वह हरदम भले—भले काम कीन करति रहै। अउर हमेसा गरीबन केर मदद कीन करति रहै।³⁷उन्हीं दिनन मां वह बीमार परी अउर मरि गै ऊ वहिका नहवा कइहां अटारी पर धनि दीन्हिन।³⁸लुद्दा नगर याफा केर तीर रहे चलन सुनेन कि पतरस हुवां है उ दुई मनई भेजि कइहां पतरस तेरे बिनती करिन कि "हमरे पास जल्दी आव"।

³⁹तब पतरस उठि कइहां उनके साथ याफा कइहां गै उइ हुवां पहुंचे तौ पतरस कइहां अटारी पर लइगे सब विधवाएँ, रुवाति भये पतरस के पास खड़ी हुई गयी। अउर जउन कुरता अउर कपड़ा दोरकास उनके साथ रहत भय बनाये रहिस वहि पतरस कइहां देखावै लागि।

⁴⁰तब पतरस उनका सबका कमरा ते बाहेर कइ दीहिन, अउर घुटना टेकि कइहां पराथना करेनि।⁴¹पतरस वहिका हाथ बढ़ा कइहां उठाएन, उन पवित्र लोगन अउर विधवन कइहां बुलाएन अउर उनके सामने वहिका जीवित हाजिर करि दिहिन।⁴²यह बात सगरे याफा मां फैलि गै अउर बहुत लोगन परभु पर बिसवास किहिन।⁴³पतरस याफा मां समौन नाम के मनई के हियां बहुत दिन तक रहे समौन चमड़े क्यार धन्धा करति रहै।

कुरनिलयुस पतरस कइहां बोलउवा भ्याजति है

10कैसरिया मा कुरनिलयुस नाम क्यार एकु मनई रहै, ऊ इतालियानी नाम केर सेना क्यार सूबेदार रहै।²वह परमेसुर क्यार भक्त रहै अउर पने पूरे परिवार केर साथ परमेसुर क्यार डेर मानति रहै ऊ गरीब यहु दिन कइहां बहुत दान देति अउर परमेसुर ते लगातार पराथना करति रहै।³याक दिन ऊ करीब तीन बजे दिन मां एक दरसन देखिसि कि परमेसुर क्यार एक सरग दूत वहिके पास आवा है। अउर कहि रहा है "हे कुरनिलयुस"।

⁴उइ वहिका ध्यान ते देखिस तौ डेराय गवा ऊ बोला "कि परभु का आग्या है"? उन वहिते कहेन तुमरी पराथनाएं अउर दान परमेसुर के सामने यदि कीन गै है।⁵अब याफा मेते कउेउ मनई कइहां भेजि कै सिमौन कइहां जउन पतरस कहा जाति है बोलवा लेव।⁶ऊ सिमौन चमड़ा क्यार धन्धा करै वालेन के हियां पाहुन है, जेहिका घर समुंदर के किनारे है।

⁷जब वहिते बातें करै वाला सरगदूत चला गवा तबऊ दुई सेवक अउर जउन सिपाही वहिके सामने मौजूद रहति रहै। वहिमा तेरे याक भक्त सिपाही कइहां बोलाएनि।⁸अउर उनका सब बातें समझाई केर याफा नगर कइहां भेजि दिहिन।

पतरस क्यार दरसन

⁹दुसरे दिन जब उइ चलति—चलति नगर के पास पहुंचे तब लगभग दुपहर कइहां पराथना करै खाति छत पर पहुंचे।¹⁰उनका भूख लागि उइ कुछ खावा चाहति रहै मुलौ उतनी बेरिया खाना नाई तैयार रहै तब पतरस बेसुद्ध हुइगे।

¹¹उइ एकु दरसन देखिन कि आकास खुलि गवा है अउर एकु चद्दर चारिब कोनेन ते लटकति भई जमीन की तरफ उतरि रही है।¹²वहिमा धरमी क्यार सब चउपाए रेंगे वाले जीव अउर आसमान क्यार पंछी रहै।¹³तब याक आवाज सुनाई परी कि पतरस उठौ मारौ, अउर खाव।

¹⁴पतरस कहिन नाई परभु हम कबहूँ अपवित्र या असुद्ध बस्तु नाई खाइन।

¹⁵कि पतरस कइहां दुसरी दफा यहै आवाज सुनाई परी "जउन कछु परमेसुर सुद्ध ठहरावा हइ वहिका असुद्ध न कहेव।"

¹⁶तीन दफा अइसे भवा तब वह चद्दर ऊपर आसमान मां उठि लीन गे।

¹⁷तब परतस दरसन क्यार मतलब सोचि रहा रहै तब तीन मनई जिनका कुरनिलयुस भेजा रहिन सिमौन

के घर का पता लगा कइहां डेवढ़ी पर ढाढ़ हुइगै।
¹⁸ऊ पूछेनि “का सिमौन जउन पतरस कहा जाति है, हिये पाहुन हैं”?

¹⁹पतरस, अब तक उइ दरसन पर सोचि ही रहे रहिन तौ आतमा वहिते कहिन, “दयाखौ तीन मनई तुमका ढूढ़ि रहे हैं”। ²⁰उठि कै नीचे जाव अउर निसा खातिर हुइकै उनके साथ चले जाएव, काहे ते हमकी उनका भेजा है।

²¹तब पतरस नीचे उतरि कइहां आये अउर उन मनइन तेरे कहिन “दयाखौ जेहिका तुम ढूढ़ि रहे हो वहु हम ही आहिन।” तुमरे आवे क्यार का कारनु है?

²²ऊ कहेन “हमका सूबेदार कुरनेलियुस भेजा हइ उइ धरमी अउर परमेसुर तेरे डेराय वाले अउर पूरी यहूदी जाति मां उनका बड़ा सम्मानु हैं उनका एकु पवित्तर सरगदूत तेरे यू हुकुम मिला कि तुमका अपने घर मां बोलाइ केर परवचन सुनै। ²³तब पतरस उनका घर केर भीतर बोलाएवि अउर उनकी आव भगति कीन्हिन। दुसरे दिन उनके साथ गे याफा तेरे कई भाई उनके साथ गै।

पतरस कुरनेलियुस केर घर मां

²⁴दुसरे दिन वे केसरिया मां पहुंचे हुंवा कुरनेलियुस अपने नाते—रिस्तेदारन अउर दोस दारन के साथ उनकी राह देखि रहे रहैं। ²⁵जब पतरस भीतर आवा तौ कुरनेलियुस वहिते भेंट किहेन अउर उनके पायेन पर गिरि केर परनाम किहेन। ²⁶पतरस नका उठाएनि अउर कहिन, “खड़े हो हमहूँ तो तुम्हरेहि तरह मनई ही आहिनु”।

²⁷पतरस उनके साथ बातचीत करति भए घर के भिरि गे, हुंवा बहुत लोगन कइहां यकड़ा देखि कइहां ²⁸पतरस वहिते कहिन “कि तुम जानति हो कि दुसरी जातिन तेरे संगति करब अउर उनके हियां आबु जाबु यहूदिन खातिर अधरम हवै। मुला परमेसुर बतावा हइन कि हम कउनेउ मनई कइहां असुद्ध और अपवित्तर न कही। ²⁹यहिके मारे जब मोहिका बोलावा गवा तौ बिना कुछ कहे चल आएन। अब यू बतावै गवा तौ बिना कुछ कहे चल आएन। अब यू बतावै की मोहिका कउने कामे खातिर बोलावा गवा है।

³⁰कुरनेलियुस कहिन चार दिन पहिले की बात है, दिन के करीब तीन बजे जब हम अपने घर मां पराथना करति रहेन, तौ अचानक बहुत उज्जर कपड़ा पहिने एक मनई मोरे सामने आ कइहां खड़ा भवा। ³¹ऊ कहै लाग कुरनेलियुस तुमरी पराथना सूनि गै

हवै। अउर तुम्हार दान परमेसुर केर सामने याद कीन गै है। ³²अब कोई कइहां याफा नगर मां भेज कइहां सिमौन जउन पतरस कहां जाति है बोलावा लेव, ऊ समुंदर केर किनारे सिमौन चमड़ा क्यार धंधा करे वाले केर हियां पाहुन हैं। ³³तब हम तुरतै तुमरी तीर मनई भेजे। अउर तुम यू भला कीन्हव जउन आ गये। अब हम सब जने हियां परमेसुर केर सामने हन कि जौनु कुछ परमेसुर तुमते कहा हइन वहिका सुनी।

³⁴तब पतरस बोलाएव सुरु किहेन “अब मोहिका निहचय भवा है कि परमेसुर केहिव तेरे पक्षुपापतु नाई करति है। ³⁵बल्कि हर जाति मते जउन वहिका उर मानति है, अउर धरम क्यार काम करति है ऊ वहिका भावति है। ³⁶ऊ अपन वचन इसरालियन तीन भेजा हइन, अउर यीसु मसीह ते जौन सबके परभु है। उनका सान्ती क्यार सन्देसु सुनावा हइन। ³⁷यह बात तुम जानति हो कि यहुन्ना के बपतिसमा केर परचार के बाद गलील ते सुरु होइकै पूरे यहूदा परदेस मां फैल्लिगे हैं। ³⁸कि परमेसुर कउनी तरह तेरि यीसु कइहां पवित्तर आतमा अउर सामरथ तेरे अभिसेक कीहेन यीसु सब जगह भलाई करति अउर सैतान के सब सताए भए कइहां ठीक करति रे, काहे ते परमेसुर उनके साथ रहे।

³⁹हम उन सब कामन क्यार गवाह हन जउन यीसु यहूदिया परदेस अउर यरुसलेम मां कीन रहिन। अउर उन यीसु कइहां काठे पर लठका कइहां मारि डारेन। ⁴⁰मुला परमेसुर तिसरे दिन जिया दिहिन अउर उनका परकट कीहेन कि वे लोगन कइहां देखा परै। ⁴¹सब लोगन कइहां नाहीं मुला उनी गवाहन कइहां जिनका परमेसुर पहिले ते चुनि लीन रहिन यानी हमका जउने लोगन उनके मरे हुएन मते जी उठै केर बादि उनके साथ खाएन—पीएन। ⁴²परभु यीसु हमका आा दीन हन कि हम सब लोगन मां परचार करी अउर गवाही देई कि ये वही हैं जनका परमेसुर जियत अउर मुरदन क्यार नियायी ठहरावा हइन। ⁴³सगरे नबी उनकी गवाही देति है कि जउन यीसु पर बिसवासु करी वहिका यीसु के नाम तेरे पापन केर माफी मिली।

⁴⁴पतरस ई बातें कहि रहे रहैं कि पवित्तर आतमा वचन के सब सुनै वालेन पर उतरि आवा। ⁴⁵जउन खतना कीन भए बिसावासी पतरस के साथ आये रहे वी सब चकित होइगे कि दुसरी जातिन पर पवित्तर आतमा क्यार दानु उड़ेला गवा है। ⁴⁶ऊ उनका फरक—फरक भासा बोलति अउर परमेसुर केर स्तुति करति भए सुनेनि अउर देखिनि। ⁴⁷पतरस कहेन “का कउनेउ अब इन लोगन कइहां मना कइ सकती है कि

ई लोग पानी तेरे बपतिसमा न पावै? जउन हमरही तरह पवित्तर आतमा पावा हइनि।⁴⁸पतरस हुकुम दिहन कि उनका यीसु मसीह के नाम तेरे बपतिसमा दीन जाए। तब उन पतरस तेरे विनती किहेन कि वी उनके साथ कुछ दिन अउर रहै।

पतरस अपने कामे कइहां स्पस्ट करति है।

11 यहूदिया परदेस मां रहै वाले पेरितन अउर भाई लोगन य सुनने कि दूसरी ही जातिन परमेसुर क्यार वचन मानि लीहेन।²जब पतरस यरुसलेम मां आये तौ खतना कराये गये बिसावासु वहिते कहा सुनी करै लागे।³उइ कहै लाग 'तुम बगैर खतना कराए गए लोगन के हियां जा कइहां अउर उने साथ कहे खायेब पियेब?

⁴तब पतरस सुरुवाति तेरे लइके सगरी बातें उनका बताएसि।⁵हम याफा नगर मां पराथना करि रहा रहौ हम बेसुद्ध हइके एक दरसन दीख कि कुछ याक बड़ी चद्दर केर नाई चारो कोनन तेरे लटकति भवा आसमान तेरे उतरि कइं मोरे पास आवा।⁶जब हम वहि पर ध्यान दिहिन तौ द्याखौ कि वहिमा धरती क्यार चौपाएं जंगली जानवर रेंगे वाले जानवर अउर आसमान केर चिड़िया रहै।⁷मोहिका यह आवाज सुनाई परी उठौ मारौ अउर खाव।

⁸हम यू कहेव नाहीं परभु नाई कउनिव असुद्ध अउर अपवित्तर चीज मेरि मां आजु लौ नाई गै है।

⁹यहिके जवाबु में आसमान तेरे दुसरी बार आवाज आयी जउन कुछ परमेसुर सुद्ध ठहरावा हइन वहिका असुद्ध न कहौ।¹⁰तीन बार अइसे भवा ऊ सब कुछ आसमान पर खींच लीन गवा।

¹¹द्याखौ तुरंते तीन मनई जउन केसरिया तेरे मोरे पास भेजे गये रहै वहि घरमा जेहिमा हम रुके रहन आ ठाढ़ भये।¹²तब आतमा मोहिते कहिस हम उनके साथ बेखटके चा जाउं यी है छः भाई मोरे साथ गे। हम उइ मनईन के घरे गयेन।¹³वहिके हमका बताएनि 'मै याक सरगदूत कइहां अपने घर मां खड़ा भवा देखेन ऊ मोहिते कहिस याफा मां मनई भेजि के ऊ सिमौन जउन पतरस कहा जाति है बोलवा लेव।¹⁴ऊ तमते अइसी बातें कही जेहिते तम अउर तुम्हार पूरा घराना मुक्ति पायी।

¹⁵जब हम वहिते बातें करै लागै तब पवित्तर आतमा उन पर वही तरह से उतरा जउनी तरह तेरे सुरुवाति मा हम पर उतरा रहै।¹⁶तब मोहिका परभु करि यह बात यादि आयी जउन उन कहा रहिन यहुन्ना तौ तुमका पानी तेरे बपतिसमा दन हइ। मुला

तुम पवित्तर आतमा तेरे बपतिसमा पइहौ।¹⁷जब परमेसुर उनका वहय दान दीहेन जउन परभु यीसु मसीह पर बिसवास करै ते मिला रहे तौ हम कउन होइत हन जउन परमेसुर कहि सकति?

¹⁸यह सुनिकै वह चुपे हुई गये अउर परमेसुर केर स्तुति करिके कहै लाग कि परमेसुर दुसरी जाति केर लोगन कइहां मन फिरावे क्यार दानु दीन हइसि।

अंताकित मां मसीही कलीसिया

¹⁹जउन लोग उइ कलेस केर मारे जउन स्तिफनुस केर कारन परा रहै तितर-वितर उइगे रहै वहि फिरति-फिरति फीनी के साइप्रस अउर अन्ताकिया मां पहुंचे वी यहूदियन कइहां छोड़ि कइहां अउर केहू कइहां सन्देसु सुनावति रहै।²⁰वहिमा ते कुछ साइप्रस निवासी अउर कुरेनी, क्यार रहै जउन अन्ताकिया मां आ कइहां परभु यीसु केर सुभ समाचार के बाते सुनावति रहै।²¹परभु क्यार हाथ उन पर रहै अउर बहुत लोग बिसवासु करिके परभु केर तरफ फिरे।

²²तौ उनकी चरचा यरुसलेम के कलीसिया मां पहुंची उन लोगन बरनवास कइहां अन्ताकिया भेजेनि।²³उइ हुवां पहुंचे अउर परमेसुर के अनुगरह कइहां देखि कर खुसी भे उन सबका उपदेस दीन्हें कि तन-मन से परभु के साथ सच्चे बने रहो।²⁴बरनवास एक भला मनई रहे ऊ पवित्तर आतमा अउर बिसावासु ते भरपूर रहै दुसरे बहुत लोग परभु मइहां आ मिले।

²⁵तब वहि साउल दूहे खातिर तरसुस नगर केर चले गये।²⁶जब उइ वहिते मिले तौ वे उनका अन्ताकिया लै आये वै एक साल तक कलीसिया के साथ मिलति रहे अउर व बहुत लोगन क सिखावति रहे। चेले सबसे पहिले अनताकिया मां मसीही कहाइन।

²⁷वही दिनन मां कुछ नबी यरुसलेम ते अन्ताकिया कइहां आए।²⁸उनमा ते याक नबी क्यार नाम अगबुस रहै उइ खडे हइकै आतमा के अगुवायी तेरे यह बात बताएन क पूरी रोमी दुनिया पर एक बड़ा अकाल परी। (अउर यह अकाल समराट कलौदियुस के समय मां परी)²⁹तब चेलन निस्चय कीहेन कि हर एक भाई अपनी सामरथ के हिसाब तेरे यहूदिया परदेस केर रहै वाले भाइन केर मदद खातिर कुछ सहायक भ्याजै।³⁰अउर उइ अइसहै किहिन बरनवास अउर साउल के हाथन पुरनियन तीन कुछ भेजि दीहेन।

जेल ते पतरस क्यार अचरज भरा छुटकारा

12 ऊ समय मां हेरोदेस राजै कलीसिया के कई लोगन क दुख देवे खातिर उनका बन्दी

बनाएसि अउर जेल मां डारि दिहिस।²उइ यहुन्ना केर भाई याकूब केर तरवारु तेरे मरवा डारेसि।³जब उइ देखिस कि यहूदी लोग हिते खुस होत है तौ उइ पतरसौं केर पकड़वा लिहिस। उइ दिन अखमीरी रोहिन केर पर्व केर दिन रहे।⁴उइ पतरस क पकरि करि जेल मां बन्द किहिस अउर रखवाली खातिन चारि—चारि सिपाही क्यार चारि दस्ता बनाकर लगा दिहिस। ऊ चाहति रहै कि फसह पर्व के बाद पतरस कइहां लोगन के सामने लावै अउर वहि पर मुकदमा चलावै।⁵जेल मां पतरस केर रखवारी हुइ रही रहे वइसी कलीयाि उनके खातिर लौ लगा कइहां परमेसुर तेरे पराथना करि रही है।

⁶जब हेरोदेस पतरस कइहां यहूदिन के सामने लावै वाला रहे उई राति पतरस दुई जंजीरन तेरे जकड़े भये दुइ सिपाही के बीच सो रहे है। सिपाही बन्दी घर के दरवाजे पर रखवाली करि रहे रहै।⁷तौ द्याखो परभु क्यार एक सरगदूत अचानक आ कइहां खड़ा हुइगा। अउर पतरस केर कोठरी मां परकास भवा। सरगदूत पतरस केर पसली पर हाथु मारि कइहां उनका जगायेनि। अउर कहेनि उठव फुरती करौ पतरस केर हाथेन तेरे जंजीरे खुलि के गिरि परी।

⁸तब सरगदूत वहिते कहेसि। “कमर बान्धौ अउर आपन जूता पहिन लेव। पतरस वईसहे कीन्हेनि फिर उन पतरस तेरे कहनि आपन कपड़ा पहिन कइहां वहिके पीछे हुइ लीन्हेनि।⁹उइ निकरि कै वहिके पाछे हुइ लिहिस मुलौ उई नाई जानति रहै कि जउन कुछ सरगदूत करि रहा है ऊ सचमुच हुइ रहा है पतरस समझेनि कि उई कउनव दरसन देखि रहे है।¹⁰तब उई पहिले अउर दुसरे पहरा तेरे निकरि कइहां उई लोहे केर फाटक पर पहुंचे जउन जगर केर तरफ रहै फाटक उनके खातिर अपने आप खुलि गवा उई जेल तेरे निकरि कइहां याक गली तेरे हुई कै गै इत्ते मां सरगदूत पतरस कइहां छोड़ि के चला गवा।

¹¹तब पतरस सचेत हुइ कै कहेनि “अब हम सचमुच जानि लीन है कि परभु अपन सरगदूत भेजि कइहां मोहिका हेरोदेस केर हाथेन तेरे छोड़ा लीन हइनि अउर यहूदिन केर सब आसा पर पानी फेरि दीन्हेनि।

¹²युह सोचि कई हां वी यहुन्ना (जउन मरकुस कहा जाति है) केर महतारी मरियम केर घेरे आये हुवां बहुत लोग यकड़ा हुइकै पराथना करि रहे रहै।

¹³जब पतरस दरवाजा खटखटायेनि तब रुदै नाम केर एक नौकरानी खटखटाहट केर आवाज सुनि केर आयी।¹⁴उई पतरस केर आवाज पहिचानि लिन्हेसि मुला मारे खुसी केर फाटक नाई खोलेसि। दउड़ि

कइहां भीतर गै अउर लोगन कइहां बतायेसि कि पतरस दुआरे पर खड़े है।

¹⁵उन वहिते कहेनि तुम्हार दिमाग खराब है जब वा अपनी बात पर दृढ़ बनी रही तब उन लोगन कहेनि कि ऊ पतरस क्यार सरगदूत होई।

¹⁶पतरस दरवाजा खटखटौते रहै तब उन दरवाजा खोलिनि अउर पतरस कइहां देखि कइहां अचम्भे म परिगे।¹⁷तब पतरस उनका हाथे तेरे इसारा कीन्हेनि कि चुपे रहै तब पतरस उनका बतायेनि कि परभु बउनी तरह तेरे उनका जेल तेरे निकारि लावा है। तब पतरस कहेनि “याकूब अउर भाइन कइहां या बात बता देहेव तब उई दूसरी जगह चले गये।

¹⁸सबेरे सिपाहिन मां बड़ी खलबली मची कि पतरस क्यार का भवा? ¹⁹जब राजा हेरोदेस पतरस केर खोजबीन करेनि अउर उई नाई मिले तौ उन हुकुम दीन्हेनि कि पहरेदार केर जांच कीन जाय अउर उनका फांसी पर चढ़ा दीन जाय।

राजा हेरोदेस केर मऊत

²⁰यहि के बादि राजा हेरोदेस यहूदिया परदेस तेरे जा कइहां कैसरिया नगर मां कुछ समय तक रहे। उई सूर अउर सैदा केर लोगन तेरे बहुत नाखुस रहै। उई एकु हुई कै उनकी तीर आये। उन लोगन बलास्तुस कइहां जउन राजा क्यार बिसावासु योग्य करमचारी रहै। मनायेनि अउर राजा तेरे मेलु करा चाहेनि काहे तेरे राजा केर देस तेरे उनके देस क्यार भरन पोसन होति रहै।

²¹ठहराये भये दन कइहां हेरोदेस राजसी कपड़ा पहिन कइहां सिंहासन पर बइठ अउर हुंवा केर जनता केर नाम एकु सन्देसु दीन्हेनि।²²लोग पुकारि उठे “या तौ मनई केर नाई मुला याक परमेसुर केर वानी आयी।²³वही खन परभु केर एक सरगदूत वहिका मारेनि अउर ऊ किरवा परिके मरिगवा काहे तेरे उई परमेसुर केर महिमा नाई कीन रहसि।

²⁴मुला परमेसुर क्यार वचन बढ़ति अउर फइलति गवा।

²⁵जब बरनवास अउर साउल अपनी सेवा पूरी करि चुके तब यहुन्ना कइहां (जउन मरकुस कहा जाति रहै) साथ लइकै यरुसलेम तेरे लउटे।

बरनवास अउर साउल क्यार भेजे जाबु

13 अम्ताकिया केर कलीसिया मां कइयौ नबी अउर उपदेसक रहै बरनवास अउर सिमौ जउन ‘काला’ कहा जाति रहै लुकियुस कुरेनी राजा

हेरोदेस केर साथ पाला गवा मनाहेम अउर साऊल।²जब यी पंचय उपवास अउर परभु केर उपासना करि रहै तो पवित्तर आतमा कहेनि मोरे खातिर बरनवास अउर साउल कइहां उई काम खातिर अलग करौ जेहिके मारे उनका चुना गवा है।³तबु उन पराथना अउर उपवास करिके बरनवास अउर साउल पर हाथु रखेनि अउर उनका विदा किन्हेनि।

साइप्रस द्वीप मा

⁴साउल अउर बरनवास पवित्तर आतमा क्यार भेजे भये सिलूकिया गये हुंवा तेरे उई जहाज पर चएि कै साइप्रस द्वीप कइहां चले।⁵बेसलमीस मा पहुंचे अउर हुंवा परमेसुर क्यार वचन यहूदिन के सभाघर मां सुनायेनि यहून्ना उनका सेवक रहै।

⁶उई सोर द्वीप होति भये पाफुस तक पहुंचे। हुंवा उनका बार यीसु नाम क्यार एक यहूदी टोन्हा अउर झूठा नबी मिला।⁷वहु परदेस केर राज्यपाल सिरगियुस पौलुस केर साथ रहति रहै। सिरगियुस बुद्धिमान मनई रहै। ऊ बरनवास अउर साउल कइहां अपनी तीर बोला कइहां वहिते परमेसुर क्यार वचन सुनै केर इच्छा कीन्हेसि।⁸परन्तु इलीमास टोनहे (यहै वहिके नाम क्यार माने है) उन क्यार विरोध किन्हेनि अउर राज्यपाल सिरगियुस कइहां बिसावासु करै तेरे रोकेसि।⁹तब साउल जेहिका नाम पालुस हवै पवित्तर आतमा तेरे भरपूर हइके वहिकी तरफ टकटकी लगा क देखेनि अउर कहैनि।¹⁰ओ सगरे कपट अउर धूरतता तेरे भरे भये सैतान धारमिकता केर दुसमन का तुई परभु केर रास्ता कइहां टयाढ़ करबु नाई छोड़ि है? ¹¹अब देखू परभु क्यार हाथु तुमहि पर उठा है। अउर सूरज कइहां नाई देखि सकि है। तुरन्तै वहिकी आखिन केर सामने धुंधरापन अउर अधियार छा गवा अउर ऊ अईसी वईसी टयालै लाग कि कउनव वहिका हाथु पकरि कईहां लई चले।¹²तब सिरगियुस यह घटना देखेनि तब उई परभु केर उपदेस तेरे चकित भे अउर उन बिसवास किन्हेनि।

पिसदिया केर अन्ताकिया नगर मां

¹³पौलुस अउर उनके साथ पाफुस ते जहाज खोलि कइहां पम्फूलिया केर पिरगा मां आये हुंवा यहून्ना इनका छोड़ि कहां यरुसलेम लउटि गवा।¹⁴उइ पिरगा तेरे आगे बढ़े अउर पिसदिया केर अनतकिया मां पहुंचे हुवा वी सबत दिन भर सभाघर मा गये अउर हुंवा बइठ गये।¹⁵बेवसथा गरन्थ अउर नबिन केर किताब पढ़े केर बादि सभा के अधिकारिन उनके पास

सन्देसु भेजिन “भाइयों यदि जनता के उपदेस खातिर तुमरे मन मां कउनउ बात हो तो कहौ।

¹⁶तब पौलुस खड़े भये अउर उन हाथन ते इसारा करि कै कहिन। हे इसराएलियों अउर परमेसुर तेरे डेराय वालेव सुनौ”।¹⁷इसराएली रास्ट्र के परमेसुर हमरे पुरिखन कइहां चुना रहिन। जब वी लोग मिसर मां परदेसी होइके रहति रहै तब उनकी तरक्की कीन्हेन अउर अपने सामरथी हाथे तेरे उनका मिसर तेरे निकारि लाये।¹⁸ऊ चालीस बरस तक जंगल मां उनकी देखभाल करति रहै।¹⁹ऊ कानन मां रहै वाली सात जातिन का नासु कीहेन, अउर कनान देस कइहां साढ़े चार सौ सात मां हमरे पुरिखन केर मीरास बना दीन्हेनि।

²⁰यहिके बाद ऊ सैमुएल नबी तक उन पर नियायी ठहरावति रहै।²¹तब ऊ एक राजा मांगेनि, अउर परमेसुर चालिस साल खातिर निरुमीन केर कुल तेरे एक मनई यानी क्रीश केर बेटवा साउल कइहां उन पर राजा ठहरा दिहिन।²²फिर वहिका हटा कइहां दाऊद कइहां उन क्यार राजा बनाएनि। दाउद केर बारे मां परमेसुर यह गवाही दिहिन कि “मोहिका एकु मनई यिसै क्यार बेटवा दाऊद मोरे मन के मुताबिक मिल गवा हवै, ऊ मोरि मरजी पूरा करी।

²³यहि दाउद के बंस तेरे परमेसुर अपनी परतिग्या केर मुताबिक इसराएली रास्ट्र के पास एकु उद्धारकरता यानी यीसु कइहां भेजिन।²⁴यीसु के आवे ते पहिले यहून्ना बपतिसमा दे वालेन सब इसराएलिन के मन फिराव के बपतिसमा क्यार परचार किहिन।²⁵जब यहून्ना अपन उदर पूरा करै पर रहै, तब ऊ कहेन तुम मोहिका का समझति हौं? हम ऊ नाई आहिन द्यीखौ वे मोरे बादि आवे वाले है। उनके पायेन केर जूती ख्वालै के लायक हम नई हौं।

²⁶हे भाइयों तुम अबराम के सन्तान हौ अउर जउन तुम दुसरि जातिन मते परमेसुर तेरे डेराव वाले लोग हौ तुमरे तीर उद्धार क्यार बचन भेजा गवा है।²⁷काहे ते यरुसलेम क्यार रहै वालेन अउर अधिकारिन उनका नाई पहिचानेनि अउर न उन नबिन केर बात समझेन जउन हर सबत के दिन पढ़ी जाति रहै। यहि कारन उन लोगन उनका दोसी ठहरा कइहां उन बातन कइहां पूरा किहिन।²⁸हियां तक कि ऊ मारि डारै के लायक कउनउ दोसु उनका नाई पायेन तउ उनही ऊ पीलातुस तेरे यह मांग किहिन कि उनका मारि डारा जाय।²⁹जब ऊ उनके बारे मां लिखी सब बातें पूरी करि लीहिन तब उनका सलीब तेरे उतारि कइहां कबर मां रखौ।³⁰मुला परमेसुर

उनका मरे हुएन मते जिया दिहिन।³¹ वह उनका जउन गलील तेरे यरुसलेम मां वहिके साथ आये रहै बहुत दिनन तक देखाई देति रहे। लोगन केर सामने अब वही उन क्यार गवाह है।

³²हम तुमका सुभ सन्देश सुनाईति हन यू वहि परतिग्या के मुताबिक है जउन हमरे परखि ते कीन गै रहै।³³ परमेसुर यीसु कइहां लिया कइहां वहय परतिग्या हमरी सनतान के खातिर पूरी कीन हइन। जइसे भजन केर किताब दुइ सबक मां लिखा है कि तुम हमार बेटवा हौ आजु हम ही तुमका जनमावत है।³⁴ उनके ई तरह ते मरे हुएन मते जियावै के बारे मां जेहिते ऊ कबहू न सरै ऊ अइस कहा कइन, हम दाउद केर पवितर अउर अचल किरपा तुम पर करि है।³⁵ ऊ याक भजन मां असौ कहा हइन “तुम अपने पवितर जने कइहां कबहू सरै न देहौ।

³⁶दाउद परमेसुर केर इच्छा केर मुताबिक अपने समय मां सेवा करिकै सो गये अउर अपने पुरिखन मां जा कर मिलि गयेन उइ सहिरव गे।³⁷ मुला जिनका परमेसुर जियायेन इ नाइ सरै पाए।

³⁸यहि कारन हे भाइयो तुम जानि लेव कि इनहीं यीसु ते पापन केर माफु क्यार सन्देश तुमका दीन जाति है।³⁹ जिन आतन मां तुम मूसा केर बेवस्था द्वारा निरदोस नाई ठहरि सकेव उनहिन सब बातन तेरे हर एक बिसवासी उनते निरदोस ठहरति है।⁴⁰ यहि कारन सावधान रहौ अइस न होय कि जउन नबिन केर किताब मां लिखा है ऊ तुम पर आ परै।

⁴¹हे निन्दा करै वालेन द्याखौ चकित हौ अउउ मिटि लाओ। काहे ते मेरे हम तुमरे समय मां एकु काम करि रहा हौ। अइस काम कि यदि कउनउ तुमते वहिकी चरचा करै। तौ कबहू बिसवासु न करिहौ।

⁴²पौलुस अउर वरनवास जब सभा घर ते बाहर निकरे लाग तौ लोगन वहिते विनती कीहेन कि अगले सबत केर दिन ई बातें हमका फिर सुनायेव”।⁴³ जब सभा खतम हुइगै तब यहूदी अउर यहूदी मत मा आए भये भक्तन मते बहुत लोग पौलुस अउर वरनवास केर पीछे हुइ लाग। उन लोगन ते बातें किहिन अउर उनका समाएन कि परमेसुर केर अनुग्रह मां बने रहै।

⁴⁴अगले सबत केर दिन नगर क्यार करीब—करीब सब लोग परमेसुर क्यार बचन सुनै खातिर सीधा घर मां यकड्डा हुइगै।⁴⁵ यहूदी इतने लोगन केर भीड़ कइहां देखि करि जलन करै अउर पौलुस केर बात केर खिलाफ बोलै लागे।

⁴⁶तब पौलुस अउर वरनवास निधड़क हुइकै कहिन,

“जरूरी तौ यू रहै कि परमेसुर क्यार बचन पहिल तुम यहूदियन कइहां सुनावा जाते मुला तुम वहिका अपने ते दूरि करति हौ अउर अपने कइहां अन्त जीवन केर काबिल नाई ठहरावति हौ। द्याखौ यहि कारन हम दुसरी जातिन केर तरफ मुड़ि रहे हन।⁴⁷ परभु हमका यह आग्या दीन हइन कि हम तुमका अउरे जातिन खातिर जोति ठहराइत हन। उहिते तुम धरती केर छोरे लगे उद्धार क्यार कारन बनौ।

⁴⁸यहि सुनिकै गैर यहूदी जाति क्यार लोग खुस भये उइ परमेसुर केर बचन क्यार आदर किहिन। अउर जउन अनन्त जीवन खातिर ठहराए गए रहै ऊ बिसवासु किहिन।

⁴⁹तब परभु क्यार बचन उइ सारे परदेस मां फ़ैलि गवा।⁵⁰ मुला यहूदी नगर केर बड़े—बड़े लोगन अउर कुलीन अउरतन कइहां भडकायेन अउर पौलुस अउर वरनवास केर खिलाफ उपदरव करवा कइहां उनका अपनी सीमा ते बाहर निकारि दिहिन।⁵¹ तब वै उनके समुहे अपने पायन केर धूरि झारि कइहां इकुनियम कइहां चले गयेन।⁵² चेला आनन्द अउर पवितर आतमा ते भरपूर होति रहे।

इकुनियम मां

14 इकुनियम मां पौलुस अउर वरनवास यहूदिन केर सभा घर मां गे। हुवां उन अइसी असरदार बातें कहिन की यहूदिन अउर दुसरी जाति केर लोगन मते बहुतन बिसवासु किहिन।² मुला जउन यहूदी बिसवासु नाई करत रहे उइ अन्य जातिन केर मन कइहां इन भाइन केर विरोध मां भडमा दिहिन अउर मन मोटाव पैदा करि दिहिन।³ पौलुस अउर वरनवास हुवां बहुत दिन तक रहै अउर परभु केर भरोसे पर हिम्मत ते बातें करति रहे। परभु उनके हाथन ते चिन्ह अउर अदभुत काम करवा कइहां अपने अनुग्रह केर बचन कइहां कायम करति रहै।⁴ नगर केर लोगन मां फूटि परिगै कछु तौ यहूदिन केर तरफ हुइगे अउर कुछ परेरितन केर तरफ हुइगे।⁵ तब दुसरी जातिन अउर यहूदी लोगन उन क्यार अपमान करै खातिन उन पर पथरवाही करै खातिर अपने अगुवन तेरे मिलि केर सडयन्तु रचेनि।⁶ तब उइ ई बात कइहां जानि गये अउर हुंवा ते लुकाउनिया केर लुस्त्रा अउर दिखे नगर में अउर आस—पास केर इलाके मां चले गये।⁷ अउर हुवां सुभ सन्देश सुनावै लाग।

लुस्त्रा अउर दिरवै मां

⁸ लुस्त्रा मां एकु मनई बइठ रहै ऊ पांव ते अपंग

रहै ऊ जनम ते लंगड़ा रहै, अउर कबहू न चला रहै।⁹ऊ पौलुस कइहां बातें करति सुनि रहा रहै। पौलुस वहिकी तन टकटकी लगा केर देखिन लगा काहे ते वहिका लंगड़ा हुइ जाए क्यार बिसवासु रहै।¹⁰पौलुस ऊंची—आवज मां कहिन अपने पांवन केर बल खड़े हुइके जाव ऊ लंगड़ा उछलि कइहां चलै फिरै लागि।

¹¹लोगन पौलुस क्यार यू काम देखि कर लुकाउनिया केर भासा मां ऊंची आवाज ते कहें 'देवता मनइन केर रूप मां हमरे पास सरग ते उतरि आए हन'।¹²ऊ बरनवास कइहां जियूस अउर पौलुस कइहां हिरमेस कहिन, काहे ते ऊ ब्वालै, मां परधान रहै।¹³जियूस क्यार मंदिर उनके नगर केर समुहे रहै उइ मंदिर क्यार पुजारी बेल अउर फूलन क्यार तरु फाटकन पर ला कइहां लोगन केर साथ उनकी खातिर बलिदान करा चाहति रहै।

¹⁴जब पौलुस अउर बरनवास यू सुनेनि तब उइ अपन कपड़ा फारेनि अउर भीड़ मां घुसिगै। अउर पुकारि कइहां कहै लागि 'हे लोगों, तुम यू का करि रहे हो?'¹⁵हमौ तो तुमरे तरह दुख सुख भोगी मनई हन अउर हम तुमका सुभ सन्देस सुनाइति हन, तुम इन बेकार केर चीजन तेरे अलग हुइके जीवित परमेसुर केर तरफ फिरौ। जउने सरग, धरती, समुंदर जउन कुछ वहिमा है सबका बनावा हइन।¹⁶उन गुजरे समय मां सब जातिन कइहां अपनी—अपनी राह पर चलै दीन्हें।¹⁷तउनउ उइ अपने कइहां बेगवाह नाहीं छोड़िनि। मुलौ उइ भलाई करति रहै अउर असमान तेरे बरखा, अउर फलदार मौसम दइ—दइ कहां तुमरे मन कइहां भोजन अउर खुसी ते भरति रहे।¹⁸यू कहिकै उन लोगन कइहां बड़ी मुसकील ते रोकिन कि उनकी खातिर बलि न चढ़ावै।

¹⁹कुछ यहूदी अन्ताकिया अउर इकुनियुम तेरे आए अउर उन लोगन कइहां अपनी तरफ करि लिहिन। उन पौलुस पर पाथरवाहु किहिन अउर फिर उनका मरा भवा समझि कइहां सहर ते बाहर घसीटे लइगे।²⁰जब चले पौलुस केर तरफ चारो तरफ आ कइहां खड़े हुइगे तब उइ उठि केर सहर मां गए अउर दुसरे दिन बरनवास केर साथ दिरबे कइहां चले गए।

सीरिया देस केर अन्ताकिया सहर मां वापसी

²¹उइ सहर मां उन लोगन का सुभ सन्देस सुनाएनि अउर हुंवा बहुत चले बनायेनि अउर वहिके बाद उइ लुस्त्रा इकुनियुम अउर अन्ताकिया कइहां लउटि आए।

²²चेलन केर मन कइहां उइ लोग मजबूत करति रहे अउर यू उपदेस देति रहे बिसवासु मां बने रहे हमका बड़े कलेसु उठा कइहां परमेसुर केर राजि मां पहुँचे केर होई।²³उन हर कलिसियन उनकि खातिर धरमी पुरनिया ठहरायेन उन उपवास सहित पराथना करिकै उनका परभु केर हाथे मां सउपेन जेहि पर उइ बिसवासु कीन रहिन।²⁴उइ पिसदिया ते होति भये पम्फूलिया मा पहुँचे।²⁵अउर पिरगा मा बचन सुना कइहां अन्तलिया मा आए।

²⁶हुवां ते उइ जहाज मां अन्ताकिया कइहां आए, जहां ते उइ परमेसुर केर अनुगरह मां सउपे रहै। उइ काम का पूरा किहिन।²⁷हुवां पहुँचि कइ उइ कलीसिया कइहां एकट्ठा किहिन अउर लोगन कइहां बताएनि कि परमेसुर उनके साथ हुइ केर कइस बड़े—बड़े काम कीन हइस अउर दूसरी जातिन केर खातिर बिसवासु क्यार दरवाजा खोलि दिहिन।²⁸अउर उइ चेलन केर साथ बहुत दिन तक रहे।

यरुसलेम मां महासभा

15कुछ लोग यहूदिया परदेस तेरे अन्ताकिया मा आये उन भाइन कइहां सिखावै लाग 'यदि मूसा केर रीति केर मुताबिक तुम्हार खतना न होय तौ उद्धार नाई पा सकति हो।'²तब पौलुस अउर बरनवास क्यार वहिते बहुत झगड़ा अउर वाद विवाद भवा तौ यू ठहरवा गवा कि पौलुस अउर बरनवास अउर हम मा तेरे कुछ अउर मनई भी बात केर नियाव खातिर यरुसलेम कइहां पेरितन अउर धरमी पुरनियन केर पास जावें।³कलीसिया क्यार लोग उनका कुछ दूरि लौ पहुँचावै गये उन फीनीके अउर सामरीया परदेस तेरे हुई केर महतारी किन्हेंनि अउर हुंवा सब भाइन कइहां दूसरी जातिन केर मन बदलाव केर बात बतला कइहां उनका खुसी किन्हेंनि।⁴जब यी यरुसलेम पहुँचे तो कलिसिया पेरितन अउर धरमबिरधन ने उनका स्वागत किन्हेंनि पौलुस अउर बरनवास बतायेनि कि परमेसुर उनके जरिये तेरे कईस—कईस महान काम किन्हेंनि।

⁵यहि पर फरीसी दल क्यार कुछ लोग जउन बिसवासी हुइगे रहै उठि केर कहै लाग दूसरी जातिन केर बिसवासी भाइन क्यार खतना होयक चही अउर उनका मूसा केर बेवस्था पालन करैक चही।

⁶ई बात पर विचार करै खातिन पेरितन अउर धरमी पुरनिया एकट्ठा भये।⁷बहुत बात विवाद केर बादि पतरस उठिके कहेनि। 'भाइयों तुमका मालूम है बहुत दिन भये कि परमेसुर तुम मा मतेरे मोहिका

चुनि लीन्हेनि कि दूसरी जाती मोरी मुहिते सुभ सन्देश क्यार बचन सुनिके बिसवास करै।⁸मन कि जांच करै वाले परमेसुर उनकौ हमरे हे समान पवितर आतमा दई केर उन केर पच्छ मां गवाही दीन्हेनि।⁹बिसवासु ते उनके मन सुद्ध करि कइहां हम मा अउर उन का भेदु नाई रखेनि।¹⁰तौ तुम काहे परमेसुर कइहां परखति हौ? तुम चेलन केर गरदन पर अइस जुवां न रखौ जेहिका न तो हमार पुरिखा उठा सके अउर न हम उठा सकिति हन।¹¹हां यू तौ निस्चय है कि पूरी यीसु केर अनुग्रह तेरे जइसेहे हमार उद्धार होई वइसेहे उनकौ होई।

¹²यहि केर बाद सभा क्यार लोग चुपै हुइके बरनवास अउर पौलुस केर बातै सुनै लाग कि परमेसुर उनके जरिये? न दूसरी जातिन यीसु—कईस बड़े चिन्ह अउर अद्भुत काम किन्हेनि।¹³जब उन आपनि बात खतम किन्हेनि तब याकूब कहै लाग भाइयो हमारी बातै सुनौ।¹⁴सिमौन बतायेनि कि परमेसुर पहिले—पहिले दूसरी जातिन पर कईस किरपा किन्हेन कि उनका तेरे अपन निजी लोग बनावै खातिर कईयो कइहां चुनेनि।¹⁵यू नबिन केर बातन केर मुताबिक है जईस धरमसास्त्र मा लिखा है।¹⁶अहिके बादि हम फिरि लउटिहौं अउर दाउद क्यार गिरा भवा घर उठहौं वहिके खन्डहरन कइहां हम फिरि बसइहौं।¹⁷यू अहिके मारे हैं कि बाकी लोग जउन मोरे नाम क्यार कहे जाति है परभु कइहां दूढ़े।¹⁸यू वहै परभु कहित है जउन सूस्टि केर उत्पति तेरे इन बातन क्यार समाचार देति आवा है।

¹⁹अहिते म्वार विचार यू है कि जउन दुसरी जातिन तेरे परमेसुर केर तरफ लउटति है उनके खातिर हम यहिका कठिन न बना देयी।²⁰हम उनका लिखि भेजी, मूर्तिन केर असुद्धता, व्यभिचार गला घोटे हुए पसुअन केर मांस अउर लोहू तेरे दूरि रहै।²¹काहे तेरे पुराने समय तेरे नगर—नगर मां मूसा केर बेवस्था क्यार परचार करै वाले होति चले आये है अउर वह हम सबत केर दिन आराधनालय म पढ़ी जाती है।

दूसरी जातिन केर बिसवासिन कइहां महासभा केर चिट्ठी

²²तबपूरी कलीसिया परेरित अउर धरमी पुरनियन कइहां यू अच्छा लाग कि कुछ लोगन कइहां चुनै चानी यहूदा (जउन बरसब्बा कहा जाति है) अउर सीलास कइहां जउन भाइन मा मुखिया रहै उनका पौलुस अउर बरवास केर साथ अन्ताकिया कइहां भ्याजै।²³उनके हाथ एक चिट्ठी भेजेनि “अन्ताकिया,

सीरिया अउर किलकिया केर रहे वाले भाइन कइहां जउन दूसरी जातिन तेरे अये हैं उनका परेरितन अउर धरमी पुरनियन क्यार नमस्कार।

²⁴हमका सुनैक मिला है कि बगैर हमरे आदेस केर हमरे हे मते कुछ लोग हुवां आ कइहां तुमका अपनी बातन तेरे घबरा दीन हइनि अउर तुमरे मन का उलझनि म डालि दीन हइनि।²⁵यहि केर मारे हम एक चित्त हुई केर यू ठीक समझा कि चुने हुए मनईन कइहां प्यारे बरनवास अउर पौलुस केर साथ तुमरे तीर भेजि देयीं²⁶यी अइस लोग है जऊनेन हमरे परभु यीसु केर खातिर अपनी जान कइहां जोखिम मा डारि दीन हइनि।²⁷हम यहूदा अउर सीलास कइहां भ्याजा है जउन हमरी लिखी बातन कइहां मुहि ते सुना कइहां निश्चित करिहै।²⁸पवितर आतमा अउर हमका यूठीक जानि परा इन जरूरी बातन कई तुम पर अउर बोझ न डारी।²⁹मूर्तिन पर चढ़े परसाद तेरे, लोहू से, गला घोटे हुए पसुओं केर मास ते अउर वेभिचार तेरे दूरि रहौ।

विदाई

³⁰फिरि उठि विदा हुइके अन्ताकिया मा पहुंचे हुंवा कलीसिया कइहां उन यकद्दा कीन्हेनि अउर उनका वह चिट्ठी दई दीन्हेनि।³¹उन लोगन चिट्ठी पढ़ी अउर उपदेस केर बातन तेरे खुसी भये।³²यहूदा अउर सीलास जउन खुद नबी रहै बहुत बतन मा भाइन इहां उपदेस दई केर स्थिर किन्हेनि।³³उई हुवां कुछु दिन भये कि अपने भ्याजै वालेन तीर लउटि आवै।³⁴मुला सीलास कइहां हुवां रहव अच्छा लाग।³⁵पौलुस अउर बरनवास अन्ताकिया मां रहिगे उई बहुत लोगन केर साथ परभु केर बचन क्यार उपदेस करति अउर सुभ सन्देश सुनावति रहे।

पौलुस अउर बरनवास मा मतभेद

³⁶कुछ दिन केर बाद पौलुस बरनवास तेरे कहेनि “जिन सहरन मा हम परभु क्यार बचन सुनावा रहै चलो हुवां फिरि चला जाय। अउर अपने भाईन कइहां दीखा जाय कि उई कईसे हैं? ³⁷बरनवास यहून्ना कइहां (जउन मरकुस कहा जात है) साथ लईके विचार किहिस।³⁸मुला पौलुस उनका अपने साथ लई चलब ठीक नाई समझनि काहे तेरे ऊ पम्फूलियम वहिते अलग हुईगा रहै। अउर परचार केर काम मां उनके साथ नाई गवा रहै।³⁹यी बात कइहां उनमा इत्ता मतभेद भवा कि उई याक दूसरे तेरे अलग हुईगे। बरनवास मरकुस कइहां लईके जहाज

तेरे साइप्रस द्वीप कईहां चलेगे।⁴⁰मुलौ पौलुस सीलास कईहां अपने साथ लई जाय खातिन चुनेन भाईन परमेसुर केर अनुग्रह पर पौलुस कईहां सऊपेनि अउर हुवां तेरे चले गए।⁴¹उई कलीसियन कईहां बिसवासु मजबूत करति भये सूरिया देस अउर किलकिया तेरे होति भये गये।

पौलुस अउर सीलास क्यार नवा साथी तंमुथियुस

16फिरि पौलुस दिखे अउर लुस्त्रा नगर मा गये हुवां तंमुथियुस नाम क्यार एक चेला रहै बहु याक यहूदिनी बिसवासीन क्यार बेठा रहै मुला वहि क्यार बापु यूनानी रहै।²वह लुस्त्रा अउर इकुनियम नगर केर भाईन मा परसिद्ध रहै।³पौलुस वहिका अपने साथ जातना मां लई जावा चाहति रहै। जउन यहूदी उई क्षेत्र मा रहति रहै उनके मारे पौलुस वहिका खतना करवायेनि काहे तेरे उई यहूदी जानति रहै कि वह क्यार बापु यूनानी रहै।⁴नगर—नगर जावति बेरिया उई उन विभियन कईहां जउन यरुसलेम केर परेरितन अउर धरमी पुरनियन ठहराई रहनि उनका मानै, खातिन कलसिया कईहां पहुंचावति जाति रहै।⁵यी तरह तेरे कलीसिया बिसवास म मजबूत होति गे अउर गिनती मां रोजु बढ़ति गै।

पौलुस क्यार मकिदुनी केर मनई क्यार दरसनु

⁶उई फ्रूगिया अउर गलतिया परदेसन तेरे हुई केर गये मुला पवित्त आतमा उनका एसिया म वचन सुनावै तेरे मना कीन्हेसि।⁷जब उई मूसिया केर पास पहुंचे हुआ तेरे बितूनिया कईहां जावा चाहेनि मुला हुवां उनका यीसु केर आतमा उनका नाई जाए दिहिन।⁸यहि केर मारे उई मूसिया तेरे हुई केर लोआस मा आए।⁹पौलुस राति मां एक दरसन देखिन कि एक मकिदूनी मनई खड़ा है यू वहिते यू कहि रहा है पार उतर कईहां मकिदुनिया मां आवो अउर हमार मदद करौ।¹⁰पौलुस केर यू दरसन देखते हम तुरतै मकीदुनिया जाय कईहां तैयार हुइ गेन हम यू समझि गेन कि परमेसुर हमका मकीदुनिया केर लोगन कईहां सुभ सन्देश सुनावै खातिन बोलावा हइन।

फिलिपी मां लुदिया क्यार मन बदलाव

¹¹हम जो उनास तेरे जहाज कईहां सीधे सुमात्रा पहुंचेन अउर हुवां ते दुसरे दिन नियापुलिस मां आएन।¹²हुवां ते हम फिलिपी पहुंचे जउन मकीदुनिया परदेस क्यार खास सहर रहै। हियां रोमी लोगन केर बस्ती रहै हम फिलिपी नगर मां कुछ दिन रहेन।

¹³सबत केर दिन हम नगर केर फाटक केर बाहर नदी केर किनो गयेन। हम विचार कीन कि हुवां पराथना करै कउनिव जगह होई हुंवा कुछ औरतें एकट्ठा रहै। हम बैठि कईहां उते बातें करै लागेन।¹⁴उनमा लुदिया नाम केर थुआथीरा नगर केर, बैजरी कपड़ा ब्याचै वाली याक भक्तिन रहै। वह हमरी बातें सुनि रही रहै परभु कहिके मन का खोलेनि कि पौलुस केर बातन पर ध्यान दे।¹⁵तब ऊ अपने परिवार सहित बपतिसमा लीहेन अउर हमते यह विनती किहिन “यदि तुम मोहिका परभु केर बिसवासीनी समझति हो तौ चलिक्के मोरे घर मां रहौ।” वह हमका मना कईहां लै गयीं।

पौलुस अउर सीलास जेल मां

¹⁶याक दफा जब हम पराथना करै केर जगह पर जा रहे रहन तब हमका एक दासी मिली। वहिमा भबिस बतावै वाली आतमा रहै। वह दुसे कईहां भबिस बताइ क इहां अपने मालिक खातिर बहुत रुपया कमा लावति रहै।¹⁷वह पौलुस अउर हमरे पीछे आ कईहां चिल्ला—चिल्ला कइ कहै लागि कि ई मनई परमपरधान परमेसुर क्यार सेवकु आहीं ई हमका उद्धार केर रास्ता केर कथा सुना रहे हैं।¹⁸वह बहुत दिन तक अइसे करति यही यहिते बहुत दुखी भये। उइ पीछे मुड़ि केर उइ आतमा ते कहिनि “हम तोहिका यीसु मसीह केर नाम ते हुकुम देइत हन कि वहिमा ते निकरि जा अउर वह वहीं समय निकरि गै।¹⁹जब वहिके स्वामिन देखिन कि उनकी कमाई केर आसा जाति रही तब वै पौलुस अउर सीलास कईहां पकरि कईहं चौकम अधिकारिन तीन खींच कईहां लै गै।²⁰उइ उनका दण्ड दे वाले अधिकारिन तीन लइ जा कईहां कहिन “ई लोगन यहूदी हैं अउर सहर मां बड़ा हल चल मचा रखिन हइन।²¹ई अइस रीति बेवहार केर बातें बता रहे हैं जिनका मानव हम रोमिन खातिर ठीक नाई है।

²²भीड़ क्यार लोग पौलुस अउर सीलास केर विरोध मां यकट्ठा हुइ चढ़ि आए। अधिकारिन उनके कपड़ा फाड़ि कईहां उतारि डारेन अउर उन पर बेतु बरसावै क्यार हुकुम दिहिन।²³बहुत बेंत चलावै करि बाद उनका जेल मां बन्द करि दीहिन अउर जेल केर दरोगा कईहां हिदायत दिहिन कि उनकी रखवाली ध्यान ते करै।²⁴दरोगा केर हुकुम केर मुताबिक उनका भीतर केर कोठरी मां रखा गवा अउर उनके पायं काठे मां ठोकि दीन गये।

²⁵आधी राति केर करीब पौलुस अउर सीलास

पराथना करि रहे रहै। अउर परमेसुर क्यार भजन गा रहे रहै। कैदी लोग उनकी सुनि रहे रहै।²⁶इत्तेमां अचानक बड़ा हाला—डोला आ गवा हया तब कि जेल केर नींव हिलगै। अउर तुरन्तै दरवाजा खुल्लिगै अउर सब केर जरीरे खुलि गयी।²⁷दरोगा जागि उठा जेल क्यार दरवाजा खुले देखि कइहां उइ समझेसि क कैदी भागि गे। उइ तलवार खींचेसि अउर अपने कइहां मारि डाला चाहेसि।²⁸परन्तु पौलुस ऊंची आवाज मां पुकारि केर कहिन “अपने कइहां कुछ नुकसान न पहुँचाव काहे तेरे हम सब हियां हन।

²⁹तब दरोगा दिया मंगवा कइहां तुरन्त भतर गवा अउर कांपति भये पौलुस अउर सीलास केर पायेन कर गिरि पड़ा।³⁰ऊ उनका बाहर ला कइहां बोला सज्जनों उद्धार पावै खातिर हम का करी?

³¹ऊ कहेन यीसु मसीह पर बिसवास करै तौ तुम अउर तुम्हार घराना उद्धार पायी।³²ऊबहिका अउर वहिके घर केर सगरे लोगन कइहां परभु क्यार बचन सुनायेनि।³³राति कइहां वही समय ऊ उनका घरै लइ जा कइहां उनके पायें धोयेसि। अउर अपने सब लोगन केर साथ तुरन्त बपतिसमा लिहिस।³⁴ऊ अपने घरै लइ गवा उनके आगे खाना परोसि अउर अपने सारे परिवार केर साथ परमेसुर पर बिसवास करिकै आनन्द मनाएसि।

³⁵जब दिन भवा तब दन्द दे वालेन अधिकारिन सिपाहिन केर हाथ आदेस भेजेनि कि उन लोगन कइहां छोड़ देव।³⁶दरोगे ई बातें पौलुस ते कहेनि अधिकारिन तुम लोग कइहां छोड़े केर आग्या भेजी हइनि अब तुम कुसल ते चले जाव।

³⁷परन्तु पौलुस कहेनि हम रोमी नागरिक हन उन हमका बिना दोसी ठहराये लोगन केर सामने मारेनि जउन जेल मां डारेनि। अबका हमका चुपके तेरे छोड़ि दे रहे हैं? अइस नाई होई की खुदै आवै अउर जेल तेरे बाहर लइकै जाएं।

³⁸सिपाहिन यी बातें अधिकारिन तेरे कहेनि वी सुनि केर डेरा गये कि उइ रोमी नागरिक हैं।³⁹वी आए अउर उनका मनाएनि उनका बाहर लइ जा कइहां वहिते विनती किहिन कि उइ नगर ते चला जाएं।⁴⁰उइ जेल तेरे निकरि कइहां लुदिया केर हियां गये अउर भाइन तेरे मुलाकाति किहिन उनका उत्साह बढ़ायेन तब उइ चले गये।

थिसलुनी केर नगर मां

17“पौलुस अउर सीलास अम्फिपुलिस अउर अपुल्लोनिया नगर ते होति भये थिसलुनी

केर नगर मां आए हुवां यहूदिन क्यार एक सभा घर रहे।²पौलुस अपनी रीति केर मुताबिक उनके सभा घर मां गे उइ तीन सबत केर दिन उनके साथ पवित्र सास्त्र पर वाद—विवाद करति रहे।³ऊ उनका अरथ खोलि—खोलि कइहां समझावति रहे। मसीह कइहां दुख उठावै मरे हुवन तेरे जी उठवु जरूरी रहे। यहै यीसु जिनकी कथा हम तुमका सुनाइति है मसीह हवै।⁴उनमा ते बहुत लोगन अउर कइयौ यूनानी भक्तन अउर बहुत कुलीन औरतन सुभ सन्देश कइहां मानि लीहेन अउर उइ पौलुस अउर सीलास केर साथ मिलिगे।

⁵मुलौ यहूदी लोग ईस्यार तेरे भरिकै उन कइयों पेसेवर दुस्ट लोगन कइहां अपने साथ लइकै, भीड़ लगा कइहां सहर मां हुल्लड़ मचावै लाग। उइ यासोन केर घर पर चढ़ि आए अउर पौलुस अउर सीलास कइहां भीड़ मां लोगन केर सामने लावा चाहेनि।⁶जब उइ उनका नाई मिले तब उन यासोन अउर उनके भाइन कइहां नगर केर अधिकारिन केर सामने खइचिं लाये अउर आकर कहै लाग ई लोग जउन दुनियां कइहां उल्टा—पुल्टा कीन हइन हियां आए है।⁷यासेन उनका अपने घर मां ठहरावा हइन ईसव कहति हवै कि यीसु राजा हवै। ई कैसर केर आग्यन क्यार विरोध करति हैं।⁸अपनी ई बातन तेरे उन लोगन कइहां अउर सहर केर अधिकारि कइहां घबरवा दिहिन।⁹अधिकारिन यासोन अउर बाकी लोगन केर जमानत पर छोड़ि दिहिन अउर जाए दिहिन।

बिरिया नगर मां

¹⁰भाइन तुरन्तै रातिह रात पौलुस अउर सीलास कइहां बिरिया नगर मां भेजि दिहिन, उइ हुवां पहुँचि कइहां यहूदिन केर सभा घरन मां गै।¹¹ई लोग थिस्सलुनी केर यहूदी तेरे भले रहै उइ बड़ी उत्सुकता तेरे बचन कइहां स्वीकार कीन्हेसि उइ रोजाना पवित्र सास्त्र मां दूढ़ ढाढ़ि कीन करति रहै कि जउन पौलुस परचार करति है तउनी बातें अइसिही है कि नाई।¹²उनमा ते बहुतेन अउर कइयौ यूनानिन कुलीन औरतन अउर मनइन बिसावासु किन्हेन।

¹³मुलौ जब थिस्सलुनी केर नगर केर यहूदी कइहां पता चला कि पौलुस बिरियां नगर मां परमेसुर क्यार बचन सुना रहे हैं तब उइ हुवां पहुँचिगै अउर लोगन कइहां भड़कावै अउर नगर मां हुड़दंगा मचावै लागि।¹⁴तब भाइन तुरन्तै पौलुस कइहां बिदा किहेन कि उइ समुंदर केर किनारे चले जाएं मुला सिलस अउर तिमथियुस हुवै रहिगै।¹⁵पौलुस कइहां पहुँचावै वाले

लोगन उनका ऊथेने नगर तक लइगै, हुंवा पौलुस उनका सीलास अउर तिमुथियुस खातिर यू आदेस दिहिनकि उइ उनके पास बहुत जल्दी आवैं तब पौलुस कइहां पहुंचावै वालै लोग उलटि आए।

अथेने नगर मां

¹⁶जब पौलुस अथेने नगर मां सीलास अउर तिमुथियुस केर राह देखि रहे रहैं तब नगर कइहां मूर्तिन तेरे भरा भवा देखि कइहां उनका बड़ा दुख भवा। ¹⁷उइ सभा घर मां यहूदिन अउर भक्तन तेरे अउर जउन लोग चौक मां मिलति रहे वहिते रोज वाद विवाद करति रहैं। ¹⁸तब कइयों इपिकूरी अउर स्तोई की ग्यानी वहिते तरक करै लाग कुछु लोगन कहिन “यू दुसे देवतन क्यार परचारक मालूम परति है” काहे ते पौलुस यीसु क्यार अउर उनके फिरि जी उठै क्यार सुभ सन्देशु सुनावा करति रहैं। ¹⁹उइ पौलुस कइहां अपने साथ अरिपयगुस केर सभा मां लइगै। हुवां उन पौलुस तेरे पूछेनि का हम जानि सकत हन कि यू मनु जेहिका तुम सुना रहे हौं का आय? ²⁰काहे तेरे तुम अनोखी बातें हमका सुनावति हौ। हम जाना चाहित हन कि इन क्यार का मतलब है? ²¹(सब अथेने नगर क्यार रहे वाले, अउर परदेसी जउन हुवां रहति रहैं। नयी—नयी बातें कहैं अउर सुनै केर अलावा अउर कउनेव काम मां समय नाई बितावति रहैं)

²²तब पौलुस अरिपयगुस केर बीच मां खड़े हुइकै कहेन। “हे अथेने केर लोगों हम देखित है तुम्हरि बातन मां देउतन क्यार बड़े मौन वाले हौ। ²³हम धूमति तुमरी पूजन केर चीजन कइहां देखि रहा रहौ तौ मोहिका याक अइस बेदी मिली जेहि पर लिखा रहै “अनजाने इसवर खातिर” जेहिका तुम बिना जाने पूजति हौं हम तुमका वही क्यार सुभ संदेशु सुनावति हन।

²⁴परमेसुर जउने धरती अउर वहिकी सब चीजन कइहां बनावा हइन उइ सरग अउर धरती क्यार मालिक हु केर हाथे तरे बनाये मंदिरन मां नाई रहति है। ²⁵उनका कउनउ चीज केर जरूरति नाई है। अउर न कउनउ चीज केर पूर्ति खातिन उइ मनई केर हाथिन केर सेवा लेति है। काहे ते उइ सबका खुदै जीवन अउर स्वांस अउर सब कुछ देति है। ²⁶उइ याकै मनई तेरे मनइन केर सब जाति पूरी धरती पर रहै खातिर बनाई हइन, उनके खातिन समय इहरायेनि, उनके खातिन निवास स्थानन केर सीमा बांधनि। ²⁷कि उइ परमेसुर कइहां दूढ़ै। सायदि वहका टटोल

कइहां पा जाए। फिरौ उइ हमते किहेव तेरे दूरि नाई। ²⁸हम वहिमा जीवित रहति चलत—फिरति अउर कायम रहति जइस तुम कुछ कबिन कहा हइन “हमरे तौ वही क्या बंसु आहिन”।

²⁹परमेसुर क्यार बंस होइके हमका यू समझेव उचित नाई है कि इस्वर तव सोने या चांदी या पत्थर केर तरह है जउन मनइन केर कारीगरी अउर कल्पना तेरे गढ़े भये हैं। ³⁰पुराने दिनन मां परमेसुर अइसी तरह केर अग्यानता कइहां अनदेसा कीन्हेन मुला अब उइ हर जगह सब मनइन कइहां पापन तेरे मन फिरावै केर आग्या दइ रहे रहैं। ³¹उन एकु दिन जरूर कीन हइन जेहिमा वहि मनई केर जरिया वे धरम केर जगत क्यार नियाव करिहैं। जेहिका उन नियुक्त कीन हइन अउर उनका मरे भयेन तेरे जियाय कइहां यह बात सब पर परमानित करि दीन हइन।

³²जब उन मरे भयेन केर पुनुरुत्थान केर बात सुनेनि तब कुछ सुनै वालेन पौलुस क्यार मजाक उड़ायेनि, मुला अउरेनि कहिन “यह बात हम फिर कबहू सुनिवै”। ³³यहि पर पौलुस उनके बीच तेरे चले गये। ³⁴मुलौ कइयों मनई उनके साथ मिलि गये उइ बिसवासु किहिन उनमा दियनसियुस अरिचुपगी रहै अउर दमरिस नाम केर याक औरत रहै। अउर उनके साथ कइयों लोग रहै।

कुरथिस नगर मा

18 अहि केर बाद पौलुस अथेने नगर कइहां कुरथिस मां आये। ²हुवां पौलुस कइहों अक्विला नाम क्यार एकु यहूदी मिला जेहिका जन्म पन्तुस मां भवा रहै। ऊ अपवनी मेहरारु पिसकिल्ला केर साथ इटली देस ते नवा—नवा आवा रहै। काहे तेरे समराट क्लौदियुस सब यहूदिन कइहां रोम नगर ते निकरि जाय केर आग्या दीन रहनि पौलुस उनके हियां गे। ³पौलुस क्यार अउर उन कर एकुई धन्धा रहै यहि केर मारे पौलुस उनके साथ रहै उई मिलि केर काम करै लाग उनका धन्धा तम्बू बनावै क्यार रहै। ⁴पौलुस हर सबत केर दिन अराधनालय मा वाद विवाद करिकै यहूदिन अउर यूनियन कइहां समझावति रहै।

⁵जब सिलास अउर थिमुथियुस की मकिदुनियां तेरे आये तब पौलुस बचन केर परवार करै केर धुन मां लाग रहे उई यहूदिन कइहां गवाही देति रहै कि यीसु ही मसीह आही। ⁶मुला जब उई विरोध अउर निन्दा करै लाग तब पौलुस आपन कपड़ा झारि कइहां कहेनि “तुम्हार लोहू तुमरिही गरदन पर रहै हम निदोस हूं, अब हम दूसरी जानित तीर जईहौ।

7हुवा तेरे चलिकै पौलुस तितुस—युस्तुस नाम करे परमेसुर केर भक्त केर हियां आये जेहि क्यार घर अराधनालय तेरे लगा भवा रहै।⁸तब अराधनालय केर सरदार क्रिसपुस अपने पुरे परिवार केर साथ परभु पर बिसवासु किन्हेसि जब कुरन्थिस नगर केर निवासिन यू सुनेनि तब बहुत कुरन्थी लोगन बिसवास कीन्हेनि अउर बपतिसमा लीन्हेनि।

⁹परभु राति कईहां दरसन मां पौलुस तेरे कहेनि “कतई डेराव ना मुला कहे जाव अउर चुप्पे ना रहौ।¹⁰हम तुमरे साथ हौं कऊनव तुम पर हमला करिकै तुम्हारि हानि नाई करी कहे तेरे ई नगरु मां म्बार बहुत लोग है।¹¹पौलुस हुंवा डेढ़ साल तक रहे अउर कुरन्थिन कइहां परमेसुर क्यार बचन सिखावति रहे।

¹²जब गलिलयो अखाया देस क्यार राज्यपाल बना तब यहूदी एका करिके पौलुस पर चढ़ि आये। अउर वहिका कचेहरी म ला कईहां कहै लाग।¹³यी लोगन कइहां समझावति है कि परमेसुर केर उपासना अईसी तरह तेरे करै जउन धरम बेवस्था केर खिलाफ है।

¹⁴जब पौलुस बोल है जाति रहै बईसेहे राज्यपाल गलिलयो यदुदिन होरे कहेनि “ये यहूदियो या कुछ अन्याय अउर दुस्टता केर बात होति तौ उचित रहै कि हम तुम्हारि बाति सुनति।¹⁵मुला यू वाद विवाद सबदन नामान, अउर तुमरे हियां केर धर्म बेवस्था केर बारे म है तब तुमही जानौ काहे तेरे हम ई बातन क्यार न्यायी नाई बना चाहित।¹⁶उई उनका न्याय आसन केर सामने तेरे निकरवा दीन्हेसि।¹⁷तब सब लोगन अराधनालय केर सरदार सोन्थिनेस कईहां पकरि कईहां कचेहरी मा मारेनि मुला गलिलयो इन बातन केर कउनव चिन्ता नाई किन्हेनि।

प्रिसकिल्ला अक्विला अउर अपुल्लोस

¹⁸पौलुस बहुत दिन तक हुवां रहे फिरि भाईन तेरे विदा हुईकै पौलुस किखिया मा अपन मूड मुड़ायेनि काहे तेरे उन मन्नत मानी रहनि फिरि उई जहाज तेरे सिरिया कईहां चल दीन्हेनि उनके साथ प्रिसकिल्ला अउर अक्विला रहै।¹⁹पौलुस इफिसुस मां पहुँचि कईहां उनका हुवां छोड़ैनि अउर खुद अराधनालय मा जा कइहां यहूदिन तेरे वाद विवाद करै लाग।²⁰जब उन पौलुस तेरे विनती कीन्हेनि “कि हमरे साथ कुछ दिन अउर रहौ” तब पौलुस स्वीकार नाई कीन्हेनि।²¹उई यू कहिकै वहिते बिदा भये कि यदि परमेसुर चाही तो हम फिरि अईहौं।²²वह इफिसुस तेरे जहाज खोलि कईहां चल दीन्हेनि उई कैसरिया मां उतरे तब

हुवां कलीसिया कईहां नमस्कार कीन्हेनि अउर हुवां तेरे अन्तकिया मां आये।

²³कुछु दिन तक पौलुस अनतकिया मा रहे फिरि हुंवा तेरे उन कूच कीन्हेनि उई गलतिया अउर फूरिया परदेसन मां याक स्थान तेरे दूसरे स्थान मां विचनति भये सब चेलन कईहां बिसवासु म मजबूत करति रहै।

²⁴अपुल्लोस नाम क्यार एक यहूदी रहै वहिका जनम मिसर देस केर सिकन्दरि मां भवा रहै ऊ ग्यानी मनई रहै अउर पवित्तर सास्त्र कईहां ऊ अच्छी तरह जानति रहै। अउर उ इफियुस नगर मा आवा।²⁵ऊ परभु केर मारग केर सिच्छा पायी रहसि अउर मन लगा कईहां यीसु केर बारे मां ठीक—ठीक उपदेस सुनति अउर लोगन मां सिखावति रहै। मुला ऊ केवल यहून्ना केर बात जानति रहै।²⁶ऊ आराधनालय मा बेधड़क हुई कै बवालति रहै। प्रिस्किल्ला अउर अक्विला वहिकी बाते सुनिकै वहिका पने घरे लईगे अउर वहिका परमेसुर केर राह अउर ठीक—ठीक समझाएन।

²⁷जब अपुल्लोस निस्चय कीन्हेनि कि ऊई पार उतरि कईहां अरवाया जईहै तब भाईन उनका ढाढ़स दीन्हेनि। अउर चेलन कईहां। लिखेनि कि वै वहिते अच्छी तरह तेरे मिलै उई अरवाया पहुँचि कइहां उनकी बड़ी मदद कीन्हेनि जउनेन अनुग्रह तेरे बिसवास कीन रहनि।²⁸वे पवित्तर सास्त्र तेरे परमान दर्ई—दर्ई कईहां कि यीसु ही मसीह है। बड़ी परबलता केर तेरे यहूदिन कइहां सबके समहे निरुत्तर करति रहे।

पौलुस इफिसुस नगर मां

19जब अपुल्लोस कुरन्थिस नगर मा रहै तब पौलुस उपर केर पूरे देस क्यार दउरा करिकै इफिसुस नगर मा आये हुवां पौलुस कइहां कुछ चेले मिले।²पौलुस वहिते पूछेनि “का तुमका बिसवास करति बेरिया पवित्तर आतमा पावा रहौ?” उन पौलुस तेरे कहेनि “हम तो पवित्तर आतमा तेरे चरचै नाई सुनी है।

³पौलुस वहिते कहेनि “तौ तुम कहिका बपतिसमा लीन हौ?” उन कहेनि “यहुन्ना क्यार बपतिसमा”।

⁴पौलुस कहेनि “यहुन्ना तौ यू कहिके मन फिरावै क्यार बपतिसमा देति रहै कि जउन मोरे बादि आवै वा है वहि पर यानी यीसु पर बिसवास करेव।⁵यू सुनिकै उन परभु यीसु केर नाम तेरे बपतिसमा लिन्हेनि।⁶जब पौलुस उन पर हाथ राखेनि तब पवित्तर आतमा उतरा अउर उई फरक—फरक भासा ब्वालै अउर

भबिसवानी करै लाग। 7यी सब करीब बारह मनई रहे।

⁸पौलुस यहूदिन केर सभा घर मा जा कईहां तीनि महीना तक हिम्मत केर साथ ब्वालति रहे उई परमेसुर केर राजय केर बारे मा बाद विवाद करति अउर लोगन कइहां समझावति रहे। ⁹कुछ लोग कठोर हुईकै उनकी बात नाई मानेनि उई जनता केर सामने यी मारग कईहां बुरा है लाग। पौलुस उनका छोड़ि दीन्हेनि उई चेलन कइहां अपने साथ लईगे उई रोज तुरनुस केर स्कूल मां वाद विवाद कीन करति रहे। ¹⁰दुई साल तक यहै होति रहा हियां तक कि असिया क्यार रहे वाले यहूदी यूनानी सबन परभु क्यार बचन सुनि लिन्हेनि।

¹¹परमेसुर पौलुस केर हाथेन तेरे सामरथ क्यार अनेखे काम देखावति रहे। ¹²हियां तक कि लोग रूमाल अउर अंगौछा पौलुस केर देही ते छुवा कइहं बीमारन पर डरति रहे अउर उनकी बीमारी दुरि हुई जाति रहे।

¹³दुस्त आतमव उनमा तेरे निकरि जाति रहे। हुवां कुछ यहूदी रहे जउन झगड़ा फूकि करति रहे। उई भूत चुड़ैलन तेरे जकड़े भये लोगन पर परभु यीसु क्यार नाव लईकै फूक डारै लाग 'कि जउने यीसु क्यार परचार पौलुस करति है हम तुमका वहिकी किरिया देइति हन। ¹⁴रिक्वा नाम क्यार एक यहूदी महापुरोहित रहे वहिके सात बेटवा रहे जउन अइसै करति रहे। ¹⁵दुस्त आतमा वहिते कहेसि यीसु कईहां मै जानित हन अउर पौलुस कइहां पहिचानित हन मुला तुम कऊन हौ? ¹⁶अउर ऊ मनई जेहिमा दुस्त आतमा रहे उन पर लपटि परा अउर उनका कब्जे म करिकै उन पर अइस उपदरव कीन्हेनि कि उई नगें अउर घायल हुई कि उई घर ते भागि निकरे।

¹⁷यह बात जब इफिसुस केर रहे वाले यहूदिन अउर यूनानिन कइहां पता चली तब उन पर बड़ा डरू छा गवा अउर यी तरह तेरे परभु केर नाम केर महिमा भै। ¹⁸जिन लोगन बिसवासु कीन रहनि उनमा तेरे बहुतेन पौलुस केर तीर आ कईहां अपने—अपने बुरे कामन कइहां मानि लीन्हेनि अउर उनका परगट कीन्हेनि। ¹⁹जादू करै वालेन मते बहुतेन अपनी—अपनी किताबै यकड़ा कीन्हेनि अउर सब आगी मा जला दीन्हेनि जब उन क्यार दामु ज्वाड़ा गवा तौ उई किताबें करीब पचास हजार रुपया केर रहे। ²⁰यी तरह तेरे परभु क्यार बचन फईलति गवा अउर परबल होत गवा।

²¹जब भी बातें हुई चुकी तब पौलुस निस्चय कीन्हेनि कि उई मकी दुनिया अउर आखिया तेरे हति भये यरुसलेम कईहां जाय उन सोचेनि कि हुवा जाय केर बादि हमका रोम सहर जायक जरूरी होई। ²²पौलुस अपनी सेवा करै वालेन मते तीमुथियुस अउर इरास्तुस कईहां मकीदुनियां भेजि दीन्हेनि अउर खुद कुछ दिन खातिन आसिया म रहिगे।

इफिसुस मां ढेगा

²³उई समय मा ई पन्थ केर बारे म बड़ा दंगा भवा। ²⁴देनेत्रियुस नाम क्यार एक सुनार रहे ऊ अरमितिसि देवी क्यार मंदिर बनवा कईहां कारीगर कईहां बहुत काम देति रहे। ²⁵ऊ अईसेहे कारीगरन कईहां यकड़ा करिके वहिते कहेसि ऐ कारीगरौ तुम जानति हौ कि ई काम मा हमका केत्ता पईसा मिलति है। ²⁶मुला तुम ये देखि अउर सुनि रहे हौ कि केवल इफिसुस मानाई मुला पूरे आसिया मा ई पौलुस बहुते लोगन का समझावा हइ अउर भरमा दीन हईसि, ऊ यू कहति है कि जऊन हाथ केर कारीगरी है ऊ ईसवर नाई है। ²⁷अब हमका केवल यही बात क्यार डरू नाई है कि हमरे ई धन्धा केर परतिस्था चली जायी मुला महान देवी, अरमितिसि क्यार मंदिर तुच्छ जाना जाई। जऊनी देवी कईहां पूरा आसिया देस अउर दुनिया पूजति है। वहिका महत्व खतम हुइ जाई।

²⁸उई यू सुनिकै गुससान अउर चिल्ला—चिल्ला कईहां कहैलाग 'इफिसियों केर देवी अरमितिसि महान है' ²⁹पूरे सहर मा बड़ा सोर सराबा मचिगा लोगन गयुस अउर अरिस्तुस खुरस कमी दुनियन कईहां जउन पौलुस केर साथ सफर करै वाले रहे पकरि लीन्हेनि अउर एकु हुई केर नाटक घर केर तरफ दउडि पड़े। ³⁰पौलुस लोगन केर तीर भीतर जाना चहति रहे मुला चेलन उनका नाई जाये दीन्हेनि। ³¹आसिया केर अधिकारिन मते कईयौ पौलुस क्यार दसेस्त रहे। उन पौलुस कईहां खबर भेजेनि अउर विनती कीन्हेनि कि नाटक घर केर अन्दर जा कईहां अपने जान कईहां जोखिम म न डारै।

³²नाटक घर मा कउनव कुछु चिल्ला रहा रहे अउर कउनव कुछु साभा मां गड़बड़ी हुई रही है बहुत लोग तौ यहौ नाई जानति रहे कि उई कहिके मारे यकड़ा भे हैं। ³³तब उन सिकन्दर कईहां जेहिका यहूदियन अपनी तरफदारी मा खड़ा कीन रहनि भीड़ ते आगे कीन्हेनि सिकन्दर हाथ तेरे इसारा कीन्हेनि कि उई लोगन तेरे कुछ कहा चहति रहे। ³⁴मुला जब लोगन

कईहां मालूम भवा कि उई यहूदी है तो सबके सब याक आवज म दुई घंटा तक चिल्लाति रहे 'कि इफिसियों केर देवी अरतिमिस महान है'

³⁵तब नगर केर मंत्री लोगन कईहां सान्ति करिकै कहैनि हे इफिसियों कउन नाई जानति है कि हमार यू इफिसियों नगर महान देवी अरिमिस क्यार मंदिर अउर आकास तेरे गिरी मूरत क्यार सेवक है। ³⁶जब इन बातन क्यार खंडन हुई ही नाई सकति है तो उचित यू है कि तुम सान्त रहौ अउर बिन सोचे विचारे कुछ न करौ। ³⁷तुम इन मनईन कईहां लाये हौ जउन न मंदिर क्यार लूटै वाले हैं अउर न हमरी देवी क्यार निन्दक। ³⁸यहि देनत्रियुस अउर वहिके कारीगरन कईहां कऊनिव सिकाइत है तो कचेहरी खली है अउर हुवा अधिकारिव है उई याक दूसरे पर आरोप लगावै। ³⁹मुला यदि कऊनिव अउरी बात केर बारे म कुछ पछा चहति हौ तो नियमित समय फैसला कीन जाई। ⁴⁰आजु केर बलवे केर कारन हम पर दोसु लगाये जाये क्यार डेरू है। काहे तेरे यहि क्यार कउनव कारन नाई है। ई भीड़ यकट्टा होय क्यार हम कऊनव कारन नाई है। ई भीड़ यकट्टा होय क्यार हम कऊनव जवाबु नाई दे केर लायक हन। ⁴¹यू कहिके उई सभा कईहां विदा करि दीन्हेसि।

मकीदुनिया अउर यूनान केर जातरा

20 जब सोरगुल अउर उपदरव सान्ति हुईगा तब पौलुस चेलन कईहां अपने तिन बोला कईहां उनका समझायेनि अउर वहिते विदा हुई केर मकीदुनिया परदेस केर तरफ चले गये। ²उई सगरे छेतर तेरे हुई केर अउर हुवां केर रहै वाले भाईन कईहां बहुत समझा क यूनान म आये। ³उई हुवां तीनि महीना रहे उई जहाज सीरिया देस केर तरफ जा रहे हैं यहूदी उनकी घात म लागि रहै। यहि ते पौलुस यू निस्चय कीन्हेनि कि उई मकीदुनिया हुई केर लउटि जाये। ⁴उनके साथ विरीया केर मनई क्यार बेटवा सोपुत्रस थिरसलुनीकियो तेरे अरिस्त खुरी, सिक्न्दुस दिरबे क्यार गयुस तीमुथियुस आसिया क्यार तखिकुस अउर त्रुकिमुसयो सब भाई आसिया तक पौलुस केर साथ रहे। ⁵यी सब आगे बढ़िगे अउर त्रोआस मा हमारि रहा द्याखति रहे। ⁶हम अखमीरी रोटी केर दिनन केर बादि फिलिप्पी तेरे जहाज पर चढ़ि केर पांच दिन मा तो आसमा उनके तीर पहुंचेन अउर सात दिन तक हुवै रहेन।

लोआस मां युतखुस जउन मरिगा रहे कईहां जीवन दानु

⁷हफ्ता केर पहिले दिन हम परभु भोज खातिन यकट्टा भेन, पालुस लोगन देरे बातें कीहेन काहे ते उइ दुसरे दिन लोआस तरे चले जवइहां रहे। यहिके मारे उइ आधी राति तक बाते करति रहे। ⁸जउनी मंजिल पर हम जमा भे रहन हुवा बहुत दिया जल रहे रहे। ⁹युतखुस नाम क्यार एक नौजवान खिड़की पर बइठ रहै ऊ गरही नींद मां हुइगा जब पौलुस देर तक बात करति रहे तब ऊ नींद केर झोकन तीसरी मंजिल ते नीचे गिरी परा लोगन वहिका मरा भवा उठायेनि। ¹⁰पौलुस नीचे उतरत उइ वहिते लपटि गे वहिका गले तेरे लगा कईहां कहैनि 'घबराओ ना काहे तेरे यू जिन्दा है' ¹¹उइ फिर अउरी पर चलेगे उइ परभु भोज केर रोटी तोड़ि कईहां खायन अउर सबेरे तक वहिते बाते करति रहे फिर चलेगे। ¹²लोग उई नौजवान कईहां जिन्दा घर लइगे अउर बहुत सान्ती पायेनि।

इफिसियों केर पुरनियन तेरे बिदाई

¹³हम पहिले ते जहाज पर चढ़ि केर अस्सुगा कईहां चले गयेन हम हुवां पर पौलुस कईहां अपने जहाज पर चढ़ावा चाहति रहन इ कार्यक्रम पौलुस खुदै तय कीन रहन काहे ते पौलुस खुद पैदल जाय वाले रहेन। ¹⁴जब उई अस्सुस मां हमका मिले तब हम उनका जहाज पर चढ़ा कईहां मितुलेने मां आयेन। ¹⁵फिर हुवा तेरे जहाज खोलि कईहां हम दुसरे दिन सामुस मां लंगर डारा हम दुसरे दिन मिलेतुस मा आएन। ¹⁶पौलुस इफियुस तीर तेरे हुइकै जाय क्यार निस्चय कीहेन काहे तेरे अइस न होय कि आसि या मा। उनका देर दुइ जाय उइ यरुसलेम मां पहुंचे खातिर जल्दी करि रहे रहे। अउर हुई सकै तो पिन्तेकुसत केर दिन हुवा पहुंचि जाय।

¹⁷पौलुस मिलेतुस तेरे इफिसुस कईहां सन्देशु भेजनि अउर कलीसिया केर पुरनियन कईहां बोल वायेन। ¹⁸जब उइ उनकी तीर आये तब पौलुस वहिते कहैनि 'तुम जानति हौ कि पहिलहे दिनते जब हम आसिया मां पहुंचे हर समय तुमरे साथ कउनी तरह तेरे रहेन। ¹⁹बड़ी दीनता तेरे आंसू बहाय—बहाय उन परीछन मां जउनी यहूदिन केर सडयन्त्र केर कारन मोहि पर आयी रहै हम परभु केर सेवा करते रहेन। ²⁰जउनी बातें तुमरे लाभ केर रहै हम उनका बतावे तेरे कबहू नाई झिझकेव हम लोगन केर सामने परगट करति अउर घर—घर जा कईहां उनका सिखावत रहेन।

²¹हम यहूदियन अउर यूनानिन केर आगे गवाही देति रहेन कि उनका परमेसुर की तरफ मन फिरावे क चाही अउर हमरे परभु यीसु मसीह पर बिसवास लावै क चाही।

²²अब द्याखौ आतमा केर मरजी तेरे यरुसलेम कइहां जा रहे हन अउर नाई जानित हन कि उहां हम पे का का बीती ²³यह कि पवित्तर आतमा हर नगर मां गवाही दइ दइ कइहां मोहिते कहति है कि जंजीरे अउर दुख मोरे खारित तैयार हन। ²⁴मुलौ हम अपनी जान कइहां कुछ नाई समझति हन कि वहिका विचार समझी हम तो अपनी दउड़ अउर सेवा कइहां का पूरा भरा चाहति हन। जउन परमेसुर केर अनुग्रह केर सुभ सन्देश केर गवाही देखातिन परभु यीसु तेरे मोहिका मिला है।

²⁵द्याखौ हम जानति हन कि मोहिका फिरि कबहू नाई देखिहौं हम तुमरे बीच मां परमेसुर केर राज्य खातिर परचार कीन है। ²⁶यहते हम आज केर दिन तुमते गवाही दई केर कहति हन कि हम सब मनइन केर लोहू तेरे निरदोस हन। ²⁷हम परमेसुर केर मरजी कइहां तुमते बतावै मां नाई झिझकेन। ²⁸अब तुम अपने पूरे झुंड केर रखवाली करौ जेहि पर पवित्तर आतमा तुमका अध्यक्ष ठहरावा हइन। तुम—परमेसुर केर कलीसिया केर रखवाली करौ जेहिका उन अपने लोहू तेरे खरीदा हइन। ²⁹हम जानति हन कि मोरे जाय केर बाद फाड़ै वाले भेड़िया तुम मा अइहौइ उइ झुंड कइहां नाई छोड़िहैं। ³⁰तुमरे बीच मते अइस मनई उठि है जउन चेलन कइहां अपने पीछे खंडिचि ले खातिन टेढ़ी मेढ़ी बातें कहि है। ³¹अहिते जागति रहौ अउर यदि राखी कि हम तीन साल तक रति अउर बिन आंसू बहाय—बहाय हर जने कइहां सावधान करति रहे हन।

³²अब हम तुमका परमेसुर केर अउर वहिके अनुग्रह केर बचन केर हाथे मां सउपति हन वहू तुम्हार तरक्की करि सकति है अउर सब पवित्तर लोगन मां साइनी करिकै तुमका मीरास दइ सकति है। ³³हम कबहू कहिब केर चांदी सोना अउर कपड़ा लत्तन क्यार लालचु नाई कीन है। ³⁴तुम खुदै जानति हौ कि यही हाथेन मोरी अउर मोरे साथिन केर जरूरतन कइहां पूरा कीन हन। ³⁵हम तुमका सब कुछ करि केर खुदै देखावा है कि कइसे मेहनति करति भये निर्बलन कइहां संभालै क चही अउर परभु यीसु केर बातें जरूर यदि रखैक चही उन खुदै कहा हइन कि “ले तेरे देबु ज्यादा धन्य है”

³⁶यू कहि केर पौलुस घुटना टेकिन अउर उन सब केर साथ पराथना किहिन। ³⁷सब लोग बहुत रोये

अउर पौलुस केर गले तेरे लपटि कइहां उनका चूमेनि। ³⁸वी खास कइकै यी बात तेरे ज्यादा दुखी भये जउन उन कहेनि कि तम मोहिका फिरि कबहू ना देखि हौ। उइ पौलुस कइहां जहाज तक दूढ़े आये।

यरुसलेम केर तरफ

21 वहिते अलग हुइकै जब हम जहाज क्यार लगर खोलने तक सीधे कोस द्वीप मां आयेन। फिर दुसरे दिन रूदुस द्वीप मां। अउर हुंवा तेई पतरा नगर मां। ²हमका हुंवा एकु जहाज मिला जउन फीनी केर परदेस कइहां जा रहा है हम वहि पर चढ़ि गयेन अउर चल दीन। ³जब हमका साइप्रस द्वीप देखा पर तब हम वहिका बायें तरफ छोड़ि कइहां सीरिया केर दिसा मां चलेन अउर सुर नगर मां उतरेन काहे तेरे हुंवा जहाज क्यार बोझु उतारैक रहै। ⁴चेलन कइहां पाकै हम हुंवा सात दिन तक रहेन उन आतमा केर अगुवायी ते पौलुस ते कहेन, “यरुसलेम मा न जायेव”। ⁵जब हुंवा रहै क्यार दिन पूरे हुइगै तब हम चल दीन सगरे चले अउर उनकी मेहरारू अउर बच्चे हमका नगर तेरे बाहर तक पहुंचावै आये हम समुंदर केर किनारे घुटना टेकि कइहां पराथना कीन। ⁶तब हम याक दुसरे तेरे विदा भयेन हम जहाज पर चढ़ि गेन अउर उइ अपने—अपने घरै लउटि गये।

⁷हम सुर नगर तेरे समुद्री सुर करति—करति पतुलिमईस नगर मां पहुंचेन हुंवा हमका भाई लोगन मिले हम उन क्यार कुसल मंगल पूछा अउर याक दिन उनके साथ रहेन। ⁸दुसे दिनउ हम हुवां तेरे चलेन अउर कैसरिया नगर मा आये हुंवा हमका फिलिपुस सुभ सन्देश परचारक केर घर गयेन जउन सात सेवकन मते एकु रहै हम वहिके हियां रहेन। ⁹वहिके चारि कुंवारी बिटिया रहै जउन भविसवानी करति रहै।

¹⁰जब हम हुवां कइयौ दिन रहि चुकेनि तौ अगवुस नाम क्यार एकु नबी यहूदिया परदेस तेरे आवा। ¹¹ऊ हमरी तीर आ कइहां पौलुस क्यार कमर बांधि लिहैसि अउर अपन हाथ—पावन बांधि कइहां कहेसि, “पवित्तर आतमा कहति है कि जउने मनई क्यार यू कमर बन्द आय वहिका यरुसलेम मां यहूदी लोग अइसहे बंधि है। अउर दुसरी जातिन केर हाथे मां सउपि है।

¹²जब हम ई बातन कइहां सुना तब हम अउर हुंवा केर लोगन पौलुस तेरे विनती कीन्हें कि उइ यरुसलेम कइहां न जाए। ¹³परन्तु पौलुस जवाबु दिहिन, “तुम यू का कहति हौ? तुम रोय—रोये हमार

मन काहे तोरि रहे हौ? मै तो परभु यीसु केर नाम खातिन बल्कि मरैब खातिन तैयार हन।¹⁴जब पौलुस हमारि बात नाई मानेनि तब हम चुपा गयेन हम कहा परभु केर इच्छा पूरी होय।

¹⁵उइ दिनन केर बादि हम तौरी करिकै यरुसलेम कइहां चलि दीन।¹⁶कैसरिया मा रहै वाले कुछ चेलन हमरे साथ हुइ लीहिन कि हमका मना सोन केर घरे केर आये कि हम उनके हियां ठहरी ऊ साइप्रस द्वीप क्यार रहै वाला अउर परभु क्यार चेला रहै। पौलुस क्यार यरुसलेम कइहां पहुंचब

पौलुस का यरुसलेम आयब

¹⁷जब हम यरुसलेम मा पहुंचेन तब भाई बड़े आनन्द केर साथ हमते मिले।¹⁸दुसरे दिन पौलुस हमका लाई केर याकूब केर पास गये जहां सब कलीसिया क्यार पुरनिया यकट्टा रहै।¹⁹पौलुस उनका मस्कारु किहिन जउन काम परमेसुर उनकी सेवा तेरे उसकी जातिन मा कीन रहिन उइ एकु-एकु करिकै उनका बताएनि।

²⁰उइ यू सुनिके परमेसुर केर महिमा कीन्हेन फि उन पौलुस तेरे कहिन ए भाई तुम दयाखति हौ कि हजारन यहूदी बिसवास कीन हइन उइ सब यीसु केर बेवस्था पालन करे केर धुन मां लाग है।²¹उनका तुमरे बारे मां यू बतावा गवा है कि तुम दुसरी जातिन मां रहै वाले यहूदिन कइहां मूसा केर बेवस्था तेरे मुंह मोड़ि लेब सिखावति है। तुम कहति है न तौ अपने लरिकन क्यार खतना करावौ अउर न मूसा केर बेवस्था पर चलौ। तौ का कीन जाय? ²²लोग जरूर सुनिहै कि तुम आए हौ ²³इह बदे जउन हम तुमते कहित हन वही कर, हमरे हियां चारि मनई हौ उइ मन्त मानी हइन।²⁴तुम उनका लइ जाव, अउर उनके साथ अपनव कइहां कुछ करौ तुम उनकी खातिर खर्चा देव कि उइ खोपड़ी मुड़ावै तब सब लोग जानि ली है कि जउन बात लोगन तुमके बारे मां कही हइन वहिमा कुछौ सच्चाई नाहीं हौ अउर तुम खुदै मूसा केर बेवस्था मानति अउर वहिके हिसाब तेरे चलति हौ।²⁵दुसरी जातिन केर बारे मां जाउनेव बिसवासु कीन हइन उनका हम अपन यू निरनय लिखि भेजा है। कि उइ मूरतिन केर सामने क्यार परसादु लोहू तेरे अउर गला घोटें भये पसुअन केर मांस तेरे अउर वेभिचार तेरे बचे रहै।

²⁶पौलुस दुसरे दिन उन चारि मनईन कइहां अपने साथ लीन्हेन अउर उनके साथ सुद्ध होम क्यार दिन कब पूरे हुइ हौ। अउर उनमा तेरे हर एक खातिन कब चढ़ावा चढ़ावा जाई।

पौलुस केर गिरफ्तारी

²⁷जब सुद्ध क्यार सात दिन पूरा होय वाले रहै तब असिया केर यहूदिन पौलुस कइहां मंदिर मां देखेन, उन सब लोगन कइहां भडकायेनि उन पौलुस कइहां पकरि लीन्हेनि।²⁸उइ चिल्ला कइहां कहै लाग है इस राइलियो हमारि मदद करौ यू वहे मनई आय जउन हमरी यहूदी जाति अउर हमरी बेवस्था अउर यी जगह केर विरोध मां हरि जगह सब लोगन कइहां सिखावति है। हियां तक कि यूनानिन कइहां मंदिर मां ला कइहां ई पवित्र जगह कइहां अपवित्र कर दीन हइन।²⁹(यहिते पहिले उन इफिसुस केर रहै वाले लुफियुस कइहां पौलुस केर साथ नगर मां दीख रहौ उन यू समझेनि कि पौलुस उनका मंदिर मां लाये हौ)

³⁰तब पूरे नगर मां होहल्ला मचि गवा लोग चारिव तरफ तेरे दउड़ि-दउड़ि कइहां आए अउर मंदिर मां यकट्टा हुइ गए उइ पौलुस कइहां आए अउर मंदिर मां यकट्टा हुइ गए उइ पौलुस कइहां पकड़ि क मंदिर तेरे बाहर घसीटे लइगे अउर तुरतै मंदिर क्यार दरवाजा बन्द करि दीन्हेनि।³¹उन पौलुस कइहां मारि डारा चाहति रहहै मुला जब रोमी सेनापति कइहां सन्देसु पहुंचा कि पूरे यरुसलेम मा होहल्ला मचि रहा है।³²तब ऊ तुरन्तै कुछ सेना केर अधिकारिन अउर सिपाहिन कइहां मारव-पीटव छोड़ि दिहन।

³³तब सेनापति पास आ कइहां पौलुस कइहां बन्दी बना लीन्हेनि उई पौलुस कइहां दुई जंजीरन मां बान्धे केर आग्या दइ केर पूछेसि, यू कउन आय अउर यी का कीन हइसि? ³⁴भीड़ मते कउनउ कुछ अउर कउनउ कुछ चिल्लाय लाग जब ऊ हुल्लड केर मारे सच्चाई कइहां नाई जानि सका तब पौलुस कइहां ठाढ़ मां लइ जाय केर आग्या दीन्हेसि।³⁵जब पौलुस सीढ़ी पर पहुंचे तब भीड़ केर दबाव केर माने सिपाहिन कइहां उनका उठा कइहां लइ जायक परा।³⁶लोगन केर यह भीड़ चिल्लाति भई उनके पीछे परिगै कि उनका काम तमाम करौ।

पौलुस क्यार भीड़ कइहां भासन

³⁷जब उइ पौलुस कइहां गढ़ मां लइ जाय पर रहै तब पौलुस सेनापति तेरे कहेनि। “का मोहिका कुछ कहै केर इजाजत है?” उइ कहेसि “का तुम यूनानी बोलि लेति हौ? ³⁸का तुम मिसरी निवासी नाई आहिव? जउन कुछ दिन पहिले विद्रोह करिकै चार हजार आतंकवादिन कइहां जंगल मा लइ गवा रहै?

³⁹पौलुस कहेनि हम तौ तरतुस नगर मां एकु यहूदी मनई हौ, किलकिया केर परसिद्ध नगर क्यार

निवासी हन हम तुमते विनती करति हन मोहिका इन लोगन तेरे बातें करि लेबे देव।

⁴⁰जब सेनापति अनुमति दीहेन तब पौलुस सीढ़ी पर खड़े हुई कै लोगन कइहां इसारे तेरे चुपे कीन्हेन तब पौलुस अरामी भासा बोलै लाग।

22 हे भाइयों अउर पितरों हमार जवाबु सुनौ जउन अब हम तुमरे समुहे बताइति हन।

²लोग यू सुनि कै कि ऊ हमते अरामी भासा मा बोलि रहा है अउर ऊ चुपे रहे तब पौलुस कहेनि।
³हम तो यहूदी मनई हन किलकिया केर इबरानी नगर मा पैदा भवा मुला यही नगर केर धरमगुरू गमलीएल केर पायेन तीन बइठि कइहां धरम केर सिच्छा पायी हियै मोहिका पुरिखन केर बेवसथा पर ठीकी तना तेरे चलव सिखावा ग रहै हम परमेसुर खातिन अइसि धुन लगाये रहन जइसि तुम सब आजु लगाये हौ।
⁴हम मनइन अउर औरतन दोनों कइहां बान्धि—बान्धि जेल मा डारति रहन यी पन्थ कइहां तक सतावा कि वहिके वासिन कइहां मरवई हिव डारवाया
⁵यी बात क्यार महापुरोहित अउर सब पुरनिया गवाह है। याक दिन हम उन भाईन केर नाम पर चिठी लइके दमिस्क कइहां जाइत रहन कि हुवों जउन मिलै उनका दन्द देवावे खातिर बान्धि कइहां यरुसलेम कइहां ले आयी।

⁶जब हम चलति—चलति दमिस्क केर नजीके पहुचन तौ अईस भवा दुपहरी केर करीब एकाएक याक बड़ी जोति सरग तेरे मोरि चारिव तरफन चकमी।”
⁷हम जमीन पर गिरि परेन अउर यह आवाह सुनी कि हे साउल! साउल तुई मोहका काहे सतावति हई? हम जवाबु दीन्हेव हे परभु तुम कउन हौ?

⁸उई मोहिते कहेनि हम यीसु नासरी हन जेहिका तुम सता रहे हौ? ⁹मोरे साथिन जोती तो देखेनि मुला जउन मोहिते बाते करति रहै वहिका नाई समझेनि।

¹⁰तब हम कहेन हे परभु हम का करी? परभु मोहिते कहेनि उठिकै दमिस्क कइहां जाव अउर जउन कुछु तुमरे करै खातिर ठहरावा गवा है हुंवा तुमका बतावा जाई। ¹¹जब ऊई जोति केर तेज के मारे मोहिका कुछ दिखाई नाई दीन तब हम अपने साथिन केर हाथेन कइहां पकड़े भये दमिस्क मां आयेन।

¹²हनन्याह नाम क्यार एक मनई मोरी तीर आवा बेवस्था केर मुताबिक ऊ एक भक्तु मनई रहै ऊ हुंवा केर रहै वाले सब यहूदिन मां वहिका बड़ा नाम रहै।
¹³उई खड़े हुई कै मोहिते कहेनि हे भाई साउल फिरि द्याखै लागौ वही घरी मोरी आंखी खुलि गयी अउर

हम वहिका दीखा।

¹⁴तब उन केहनि “हमरे पुरिखन केर परमेसुर तुमका यहके मारे चुना हईनि कि तुम वहिकी इच्छा कइहां जानौ अउर धरमी कइहां द्याखौ अउर वहिके मुहि ते बातें सुनौ। ¹⁵तुम वहिकी तरफ तेरे सब मनइन केर सामने उन बातन क्यार गवाह हुई हौ जऊनी तुम देखी अउर सुनी हौ। ¹⁶अब काहे देर करति है? उठौ बपतिसमा लेव अउर नामें कइहां लईके अपने पापन कइहां धो डारौ।

¹⁷यहिके बादि जब हम फिरि यरुसलेम मा आ कइहां मंदिर मा पराथना करित रहन तब हम बेसुद्ध हुई गेन। ¹⁸हम फिर परभु कइहां देख्यो परभु मोहिते कहेनि जल्दी करौ अउर यरुसलेम तेरे तुरन्त निकरि जाओ किाहे तेरे वी मोरे बारे केर तुम्हारि गवाही नाई मनिहै।

¹⁹हम कहेव परभु उई तौ खुदै जानति है कि हम तुम पर बिसवास केर वालेन कइहां वालेन कइहां जेलन मां डारित अउर जगह—जगह आराधनालय मां उनका पिटावाइत रहन। ²⁰जब तुमरे गवाह स्तिफनुस क्यार खून बहावा जा रहा है तब हम हुवै ठाढ़ रहन अउर ई बात म सहमत हम वहिके हतियारन केर कपड़न केर रखवाली करित रहन।

²¹परभु मोहिते कहेनि चले जाव काहे तेरे हम तुमका अउरी जातिन केर पास दूरि—दूरि देसन मां भेजिहौ।

पौलुस रोमी नागरिक

²²अब तक उई पौलुस केर बातें सुनति रहै तब उई ऊंची आवाज मा चिल्लान “अईसे मनई क्यार धरमी पर ते नामौ निसान मिटा देव अहिका जिन्दा रहब ठीक नाई है।

²³जब उई चिल्ला रहे रहै तब अपन कपड़ा फेंकि रहै रहै अउर आकास म धुरि उड़ा रहे रहै। ²⁴तब सेनापति कहेनि इनका गढ़ मा लई जाओ अउर कोड़े मारि कइहां जांचों जहिते हम जानू कि लोग काहे अहिके विरोध मां अईस चिल्ला रहे हैं। ²⁵जब उन लोगन पौलुस कइहां कोड़ा लगावै खातिन जंजीरन तेरे बांधेनि तौ पौलुस उई सूबेदार तेरे जऊन उने तीर ठाढ़ रहै कहेनि का यू उचित है? कि तुम याक रोमी मनई कइहां अउर वगैर दोसी ठहराय कोड़न तेरे मारौ।

²⁶सूबेदार यू सुनिकै सेनापति केर तीर गवा अउर कहेसि आप यू का करि रहे हौ यू तौ एक रोमी नागरिक है।

²⁷तब सेनापति पौलुस केर तीन आवा अउर वहिते पूछेसि मोहिका बतावा का तुम रोमी नागरिक हौ? पौलुस कहेनि हौ।

²⁸यह सुनिकै सेनापति कहेनि “हम तो बहुत रुपया दर्ई केर रोमी नागरिक तो पायी हवै” पौलुस कहेनि हम तो जन्मै तेरे रोमी नागरिक हन।

²⁹जब जऊन लोग पौलुस केर जांच करैवाले रहै उई तुरन्तै वहिके तीर तेरे हटिगे। सेनापति यू सोचि कईहां डेरगो कि पौलुस रोमी नागरिक हवै अउर उई उनका जंजीरन तेरे बान्धा हईनि।

धरम महासभा केर सामने पौलुस

³⁰दुसरे दिन सही सही पता लगावै केर मारि कि यहूदी पौलुस पर काहे दोसु लगा रहे हवै। सेनापति पौलुस क्यार बन्धन खोलि दीन्हेन अउर महापुरोहितन अउर पूरी महासभा केर एकट्ठा होय केर आग्या दीन्हेन उन पौलुस कईहां नीचे लई जा कईहां खड़ा कीन्हेव।

23 पौलुस महासभा केर तरफ टकटकी लगा कईहां देखिनि अउर कहेनि हे भाइयों हम आजु तक परमेसुर केर खातिर बिल्कुल सच्चे मन ते जीवन बितावा है। ²हनन्याह माहपुरोहित जउन पौलुस केर तीर खड़े रहै मुहि पर थप्पड़ मारै केर आग्या दीन्हेन। ³तब पौलुस वहिते कहेनि “हे चूना फिरी भई दीवार परमेसुर तुमका मारी तुम बेवस्था केर खिलाफ मोहिका मारै क्यार हुकुम देति है।

⁴जऊन लोग तीर खड़े रहै उन कहेनि “तुम परमेसुर केर महापुरोहित कईहां बुरा कहति हौ”।

⁵पौलुस कहेनि हे भाइयों हम नाई जानित रहन कि यहि महापुरोहित आही काहे तेरे धरमसास्त्र बुरा न कहेव”।

⁶तब पौलुस यू जानि कईहां कि हियां कुछ फरीसी अउर सदूकी है। महासभा में पुकारि कईहां कहेनि हे भाइयों हम फरीसी अउर फरीसिन केर बंस क्यार अहिन। मरे हुयेन केर आसा अउर पुनुरुथान केर बारे मां मुकदमा हुई रहा है। ⁷जब पौलुस या बात कहेनि तब फरीसी अउर सदूकिन मां झगड़ा होय लाग अउर महासभा मा फूट परिगे। ⁸सदूकी यू मानति है न तौ पुनुरुथान है न सरग दूत अउर न आतमा, मुला फरीसी इन सब बातन कईहां मानति है।

⁹तब बड़ा हो हल्ला मचा कुछु सास्त्री जउन फरीसिन केर दल क्यार रहै सभा मा खड़े हुई केर अउर जोरदार सव्दन तेरे तर्क दे लाग “हम यी मनई

मा कउनिव बुराई नाई पाईति हन यदि कउनव सरगदूत या आतमा अहिते ब्वाला है तौ हमका का मतलब?

¹⁰जब बहुत झगड़ा भवा तब सेनापति डेरा गवा कि कहू अईस न होय कि उई पौलुस क्यार टुकड़ा-टुकड़ा करि डारै। अहिते उई सैनिकन कईहां आग्या दीन्हेनि कि पौलुस कईहां उने बीच मते निकारै अउर गढ़ मा लई जाये।

¹¹वही राति मईहां परभु पौलुस केर पास आये अउर उनके तीन खड़े होई केर कहेनि “पौलुस ढाढ़स बान्धौ काहे तेरे जईसि मोरि गवाही तुम यरुसलेम मा दीनि हौ वईसिही तमका रोम मा दे कईहां होई।

पौलुस केर हतिया क्यार सडयन्त्र

¹²जब दिन भवा तौ यहूदिन एका किन्हेनि अउर कसम खायेनि कि जब तक हम पौलुस कईहां मारि न डारी तब तक न तौ खईबे न पीबे। ¹³जिन लोगन आपस मां कसम खायी रहनि उई चालिस तेरे ज्यादा रहै। ¹⁴उई महापुराहित अउर धरमी पुरनियन केर तीर आये अउर कहेनि “हम यू ठाना है कि जब तक हम पौलुस कईहां मारि न डारी तब तक न तौ हम कुछ खईबे न पीबे। ¹⁵अहिते महासभा मेरे सदस्यन अउर सेनापति का समझाओ कि उई वहिका तुमरे तीर लावै मानों तुम उनके बारे म अउर ठीक तरह जांच करा चहति हौ हम उनके हिये आवै केर पहिलहे राह म उनका मारि डारै खातिन तैयार रहिबे।

¹⁶पौलुस केर भांजे सुनेसि कि उई पौलुस कईहां मारि डारै केर ताक म है ऊ गढ़ मा गवा अउर या बात पौलुस कईहां बता दीन्हेसि।

¹⁷पौलुस एक सुबेदार कईहां अपने पास बुलायेनि अउर वहिते कहेनि यी जवान कईह सेनापति केर तीन लई जाओ यू वहिते कुछु कहा चहति है। ¹⁸सुबेदार पौलुस केर भांजि कईहां सेनापति केर तीर लईगे अउर वहिते कहेनि “बन्दी पौलुस मोहिका बुला कईहां विनती कीन हईनि कि यहिका आप केर तीर लई जाओ यू जवान आप तेरे कुछु कहा चहति है।

¹⁹सेनापति वहिका हाथ पकरि केर अलग लईगे अउर वहिते पूछेनि “तुम मोहिते का कहा चहति हौ।

²⁰उई कहेसि यहूदिन एका कीन हईन कि उई आप तेरे विनती करै कि कल पौलुस कईहां महासभा मा लावा जाय मानौ आप अउर ठीक तरह तेे उनकी जांच करा चहति हौ। ²¹मुला आप उनकी बात न मानेव काहे तेरे उनमा तेरे चालीस तेरे ज्यादा मनईन यह कसम खाई हईनि कि जब तक पौलुस कईहां

मारि न डारै तब तक न कुछ खाये न पियै उई आग्या तैयार है अउर आप केर राह देखि रहे हैं।

²²तब सेनापति पौलुस करे भाजे कईहां यह आग्या दईके बिदा करि दीन्हेनि कि कहिव तेरे न कहेव कि यी बातें तुम मोहिका बताईहौ।

पौलुस कईहां केसरिया लई जावा गवा

²³फिरि उई सूबेदारन कईहां बोला कईहां कहेनि ‘दुई सौ सिपाही, सत्तर सवार, दुई भल्लेत पहर राति बीते केसरिया कईहां जांय खातिन तैयार राखौ। ²⁴पौलुस केर सवारी खातिन घोड़े तैयार राखौ कि उनका राज्यपाल फेलिक्स केर तीर कुसल तेरे पहुंचा दीन जाय।

²⁵उन यह चिट्ठी लिखी।

²⁶राज्यपाल महाप्रतापी फेलिक्स कईहां क्लौदियुस लूसियास क्यार नकस्कार।

²⁷ई मनई कईहां यहूदी पकरि कईहां मारि डारा चाहित रहै मुला जब मोहिका मालुम परा क यू रोमी नागरिक हवै तो पलटन लई केर छोड़ा लायने। ²⁸हम यू जाना चाहित रनह उई यहि पर कउने कारन दोसु लगा रहे हैं यहि केर मारे इनका उनकी महासभा मा लई गयेन। ²⁹जब मोहिका पता चला कि उई अपनी बेवस्था केर बिबादन केर बारे मा यहि पर दोसु लगावति है। मुला मारि डारै या बन्दी बनाये जाये लायक यहिमा कऊनव दोसु नाई है। ³⁰जब मोहिका बतावा कि उई यी मनई केर घत मां लाग है। तौ हम तुरन्तै यहिका आप केर पास भेजि दीन्ह हवै अउर मुद्दईन कईहां आग्या दीनि हौ कि उई आप केर सामने इन पर अभियोग लगावै।

³¹जईसि सिपाहिन कईहां आग्या दीनि गै रहै उन वईसै कोनहेनि उई पौलुस कईहां रातिव राति अन्ति पतीरस मां लईके आये। ³²दूसरे दिन उई सवारन कईहां पौलुस केर साथ जाय खाति छोड़ि कईहां खुद गढ़ कईहां लऊटि आये। ³³घुड़सवार केसरिया मां पहुंचे अउर राज्यपाल फेलिक्स कईहां चिट्ठी दीन्हेनि। ³⁴राज्यपाल चिट्ठी पढ़िके पूछेनि कि ई कउने परदेस क्यार आही उनका बतावा गवा किलकिया क्यार। ³⁵उन पौलुस तेरे कहेनि जब तुम्हार मुद्दई अईहै तब हम तुम्हार मुकदिमा करिहौ। उन पौलुस कईहां हेरोदेस केर किले मा पहले म रखे केर आग्या दीन्हेनि।

फेलिक्स केर सामने मुकदिमा

24 पांच दिन केर बादि महापुरोहित हननयाह कुछ पुरनियन कईहां अउर तिरतुल्लुस नाम केर

वकील कईहां साथ लइके केसरिया कईहां गये उन राज्यपाल केर समुहे पौलुस पर अभियोग लगायनि।

²जब पौलुस बोलाये गे तौ वकील तिरतुल्लुस फेलिक्स केर समुहे अपन मुकदिमा पेस करिके कहेनि। ‘हे महाप्रतापी फेलिक्स आप केर राजि मां हमका बड़ी सान्ति मिलती रही है आप केर परबंध तेरे यहूदी जाति—मां बहुत समाज सुधार भये हैं।’ ³यी बात कईहंहां हम हर जगह अउर हर तरह तेरे धन्यवाद केर साथ मानित हन। ⁴मै आप क्यार अउर समय नाई लीन चाहित हन अउर आप तेरे विनती करिति हन कि किरपा करिके हमरी याक दुई बातें सुनि लेव।

⁵‘हम यी मनई कईहं उपदरवी अउर दुनिया केर सगरे यहूदिन मा विद्रोह करवा वाला अउर नासरियन केर कुपन्थ क्यार नेता पावा है। ⁶यी हमरे मंदिर कईहां असुद्ध करा चहा रहसि मुला हम ओहिका पकरि लीन। ⁷हम अपनी धर्म बेवस्था केर मुताबिक यहिका नियाव करा चाहित रनह। मुला सेनापति लूसियास आ कईहां जबरदस्ती हमरे हाथेन तेरे छुड़ा लीन्हेसि अउर ओहिका अभियोगन कईहां आप तीर भेजि दीन्हेनि। ⁸इन सब बातन क्यार जिनके बारे म हम इन पर दोसु लगाइति हन आप खुदै जांच करिके जानि ल्याहौ।

⁹यहूदिन वकील केर बातन क्यार समर्थन करति भये कहेनि ‘ई बातें अईसिही है’।

¹⁰जब राज्यपाल पौलुस कईहां ब्वाले खातिर इसारा कीन्हेनि तब पौलुस जवाबु दीन्हेनि ‘हम यू जानि कईहां कि आप कईयौ साल तेरे यी जाति क्यार नियाव करति आये हैं खुसी तेरे आपनि बात कहित हन। ¹¹आप यी बात कईहां जानि सकति हौ कि बारह दिन ते ज्यादा नाई में हई है। कि हम यरुसलेम मा आराधना करै खातिन आयेन। ¹²उन मोहिका न तौ मंदिर मा अउर न तौ सभा घर मा अउर न नगर माकहिव तेरे बाद बिवाद करति या भीड़ लगावति पायेनि। ¹³उन बातन क्यार जिनका ई मोहि पर दोसु लगावति है उनका आप केर समुहे सांची नाई ठहरा सकति है। ¹⁴या बात हम आप केर सामने मानि लेइत हन कि जउने पन्थ कईहां उई कुपन्थ कहति है वही केर रीति पर हम अपने पुरिखन केर परमेसुर केर सेवा करिति हन। जऊनी बातें धर्म बेवस्था अउर नबियन केर किताब मां लिखी है उन सब पर बिसवास करिति हन। ¹⁵हम परमेसुर तेरे आसा करित हन जईसि उई खुदै करति हैं कि धरमी अउर अधरमी दोनुहुन क्यार जी उठवु होई। ¹⁶यहि केर मारे हम खुदै कोसिस करति हन कि परमेसुर अउर मनइन

केर तरफ हमार मनु निरदोस रहै।

¹⁷बहुत सालन बादि अपने गरीब भाईन कईहां दानु पहुँचावै अउर भेंट चढ़ावै आय रहय। ¹⁸उइ ने हमका मंदिर मा सुद्ध दसा मां बिना भीड़ केर साथ अउर बिना दंगा करति भये यी काम कईहां करति भये पायेन हां आसिया क्यार कई यहूदी रहै। उनका उचित रहै। ¹⁹कि अगर मारे विरोध मां उनकी कोय बात होय तौ हिया आय कईहां आप केर सामने मोहि पर दोसु लगउति। ²⁰या यी जऊन आजु हियां मौजूदहै उई खुदै कि जब हम महासभा केर समुहे खड़ा रहन तब उन मोहिमा कउन अपराधु पायेनि। ²¹यी याक बात कइहां छोड़ि रइहां जउनी हम उनके बीच मां खड़े हुइके पुकारि कइहां कही रहै। “कि मरे हुएन केर जी उठे केरे बारे मां आजु हमार अउर तुमार मुकदिमा हुइ रहा है।

²²राज्यपाल फेलिक्स जउन ई पन्थ केर बाते ठीक-ठीक जानति रहै उइ मुकदिमा केर कार्यवाही रोकि दीन्हेनि अउर कहेनि जब सेनापति लूलियास आयी तब हम तुमरे मुकदिमा क्यार फँसला करिहौ। ²³उन सूबेदार कइहां आदेसु दीन्हेनि कि पौलुस कइहां हवालति मां रखा तौ जाय मुला उनकी सुख सुविधा क्यार पूरा ख्याल रखा जाय अउर उकने दोस्तन कइहां उनकी सेवा सत्कार करै तेरे न रोका जाय।

²⁴बहुत दिनन बादि फेलिक्स अपनी मेहरारु प्रिसिल्ला कइहां साथ ला केर आये। प्रिसिल्ला यहूदिन रहै उन पौलुस कइहां बुलवायेन अउर उनके बिसवास करे केर बारे मां जउन यीसु मसीह पर रहै सुनेन। ²⁵जब पौलुस धरम, आतम संयम अउर आवै वाले न्याय केर चरचा कीहिन तौ फेलिक्स डेरान उन कहेनि आवै खातिन एतै बहुत है फिरि मौका तब तुमका बोलाइब। ²⁶उई पौलुस तेरे घूस पावै केर आसा लगाये रहे यहिके मारे पौलुस कइहां बातें करति रहे।

²⁷जब दुई साल बीतिगे तब फेलिक्स केर जगह पर पुरिकियुस फेस्तुस राज्यपाल बनिके आये। फेलिक्स यहूदिन कइहां खुस करै केर इच्छा तेरे पौलुस कइहां बन्धुवै छोड़िगै।

फेस्तुस केर सामने मुकदिमा

25 फेस्तुस उइ परदेस मां आवै केर तीन दिन केर वादि कैसरिया तेरे यरुसलेम कईहां गे। ²तब महापुरोहितन अउर यहूदिन केर बड़े लोगन उनके सामने पौलुस पर अभियोग लगायेन। ³उइ लोगन वहिते विनती करिके पौलुस केर खिलाफ यू चहेनि कि उइ यरुसलेम मां उनका बोलवावै काहे तेरे उइ

रास्ते मां उनका मारि डारै खातिन गाड़ा लगाये रहै। ⁴फेस्तुस जवाबु दीन्हेनि “पौलुस केसयिम पहेरे मा है अउर हम खुदै हुवा जल्दि ही जइवै।” ⁵तुम्हार कुछ अगुवा मोरे साथ चलै अउर अगर ई मनई कुछ अनुचित काम कीन हइस तो वहि पर दोसु लगावै।

⁶फिस्तुत उनके बीच आठ दस दिन रहि केर केसरिया कइहां चलेगें। उइ दुसरे दिन न्याय केर गद्दी पर बइठ अउर पौलुस कइहां लावै क्यार हुकुम दहिन। ⁷जब पौलुस आए तब जउन यहूदी यरुसलेम तेरे आये रहै उइ पौलुस केर आसपास खड़े हुइ केर उन पर कइयों गम्भीर दोस लगायेनि जिन क्यार परमान उइ नाई दइ सकति रहै।

⁸पौलुस जवाबु दिहिन कि मै तौ न तौ यहूदिन केर धरम बेवस्था क्यार, न तौ मंदिर क्यार अउर न समराट क्यार कुछव अपराध कीन है।

⁹तब फेस्तुस यहूदिन कइहां खुस करै केर इच्छा तेरे पौलुस ते कहेनि “का तुम चहति हौ कि तुम यरुसलेम मां जाओ अउर हुवा मोरे सामने तुम्हार मुकदिमा तय कीन जाय?”

¹⁰पौलुस कहेनि “समराट केर न्याय आसन केर ठाढ़हन मोरे मुकदिमें क्यार फँसला हियै होयक चही आप नीकी तना जानति हौकि यहूदिन क्यार हम कउनव अपराधु नाई कीन्हेनि।” ¹¹अगर हम अपराधी हनु अउर मारि डारे जाय लायक कउनव काम कीन है तो मरे तेरे इनकार नाई करति हन मुला जिन बातन क्यार दोसु ई मोहि पर लगावति है यदि वहिमा तेरे कउनउ बात सांचि न ठहरै ते कउनव मोहिका उनके हाथ नाई संउपि सकति है। हम कैसर केर दोहाई देइति हन।

¹²तब फेस्तुस अपने मन्तरीन तेरे सलाह मसविरा करिके पौलुस तेरे कहेनि “कैसर केर दोहाई दीन है तुम कैसरिया तीन जइहौ”।

राजा अग्रिपा अउर फेस्तुस क्यार विचार मसविरा

¹³कुछ दिन केर बाद राजा अग्रिपा अउर रानी बिरनीके कैसरिया मां आये ऊ फेस्तुस तेरे भेंट कीन्हेनि। ¹⁴उइ हुवां बहुत दिन रहै वाले रहे, वोहिक मारे राज्यपाल फेस्तुस पौलुस केर कहानी राजा अग्रिपा कइहां बतायेनि उइ कहन “मनई जेल मा है फेलिक्स वहिका कैद मां छोड़ि गये रहै।” ¹⁵जब हम यरुसलेम हतेन तब महापुरोहितन अउर यहूदी धरम गुरुवन वहि पर आग्या दीन जाय।

¹⁶मुला हम उनका जवाबु दीन कि रोमिन केर यह रीति नाइ है कि कउनेउ मनई कइहां दन्ड खातिन

सउपि दे जब तलक कइहां अपने परतिवादिन केर आमने सामने ठाढ़ हुइके अभियोग क्यार अउर दे क्यार कोई मौका न मिलै।¹⁷जब उइ हियां आये तौ हम बिना देर कीन्हे दुसरेहे दिन न्याय केर गद्दी पर बइठि कइहां उइ मनई कइहां लावै केर आग्या दीन।¹⁸जब वहिके परतिवादी खड़े भये तब उन अईसी गम्भीर बातन क्यार दोसु नाई लगायेनि जइस मै समझति रहनु।¹⁹उइ अने मत क्यार अउर यीसु नाम ते कउनेउ मनई केर बारे मां जउन मरि गवा रहै। अउर पौलुस उनका जिन्दा बतावति रहै विवद करति रहै।²⁰हम उलझन मा हतेन वहिते पूछेन। का तुम यरुसलेम जइहां कि इन बातन क्यार फँसला हुवै होये।²¹मुला पौलुस दुहाई दीन्हेनि कि उनके मुकदमें क्यार फँसला राजाधिराज केर हियां होय यहिके मारे हम आग्या दीन्हेनि कि जब तक वहिका समराट कैसर केर पास न भेजि देव वहिकी रखवाली कीन्दि जाय।

²²राजा अग्रिपा कहेनि हम उइ मनई केर बातें खुद सुना चाहित हन राज्यपाल फेस्तुस कहेनि आप काल्हि सुनि लेहव।

पौलुस अग्रिपा केर सामने

²³दुसरे दिन अग्रिपा अउर बिरनी केर बड़ी धूम—धाम तेरे आये उइ सेनापतिन अउर नगर केर बड़े लागन केर साथ दरबार मां हाजिर कीन जाय।²⁴फेस्तुस कहिन “हे महाराजा अग्रिपा अउर हे सब परतिस्ठावान लोगो आप सब जउन हियां हौ ई मनई कइहां देखि रहे हो जेहिके बारे मां सगरे यहूदिन यरुसलेम मां अउर हियाँ चिल्लाय—चिल्लाय मोहिते कहाइन कि यी मनई क्यार जिन्दा रहबु अच्छा नाई है।²⁵मुला हम पता लगावा है कि ई कउनव अपराध नाई कीन हइस जेहिके कारन उहिका मारि डरा चाहिते महाराज केर दोहाई दी हइस हम उहिका महाराजा तीर रोम भ्याजै क्यार निश्चय कीन हैं²⁶मुला अहिके बारे मां हम समराट कैसर कइहां का लिखि भेजी मोहिका कउनव अइसि बात नाई मिली है अहिके बारे मा आप लोगन केर सामने पेस कीन है। कि यहिकी जांच केर बादि मोहिका कुछ लिखै खातिन कारन मिलै।²⁷काहे तेरे याक कैदी कइहां स्वामी केर पास भ्याजब अउर जउन आरोप वहि पर है उनका न बताओब मोहिका ठीक नाई समझि परित है।

26 रजा अग्रिपा पौलुस तेरे कहिन “तुमका अपने बारे म ब्वालै केर इजाजत” तब पौलुस

हाथ फइलाएनि अउर अपने बचाव मां ई तरह तेरे जवाबु दिहन कि

²“हे राजा अग्रिपा जेत्ती बातन क्यार दोसु यहूदी मोहि पर लगावति है। आजु आप केर सामने जवाबु दे मां हम अपने कइहां धन्य समझित हन।³खास करिके यहिके मारे कि आप यहूदिन केर सब रीती रीवाजन अउर विवादन कइहां जानिति हौ। हम आपन तेरे विनती करित हन कि आप धीरय तेरे मोरि बात सुनौ।

⁴जअसि हमार चाल चलनु सुरुवात तेरे अपनी जाति केर बीच मां अउर यरुसलेम मा रहा हवै यहिका सब यहूदी जानति हवै।⁵अगर उइ गवाही दीन चाहति है तौ दइ सकति है काहे तेरे सुरुवाति तेरे मोहिका पहिचानत है कि हम फरीसी हुई केर अपने धरम केर सबते सरे पन्थ केर हिसाब तेरे चले हन।⁶अब उइ परतिग्या केर आसा केर कारन जउन परमेसुर हमरे पुरखन तेरे कीन रहनि मोहि पर मुकदिमा चलि रहा है।⁷अब उइ परतिग्या केर पूरे होय केर आसा लगाये भये हमार बारहों गोत्र अने पूरे मन ते रातिदिन परमेसुर केर सेवा करति आये हैं। हे महाराज यही आसा केर बारे मां यहूदी मोहि पर दोसु लगावति है।⁸जब परमेसुर मरे भयेन कइहां जियावति है तौ यह बात तुमरे हिया बिसवासु करे लायक काहे नाई समझी जाति है।

⁹यहिव समझेन कि यीसु नासरी केर नाम केर खिलाफ मोहिका बहुत कुछ करै क चाहीं।¹⁰अउर हम यरुसलेम मां अइसे कीन्हेव हम महापुरोहितन तेरे अधिकार पा कइहां बहुत पवित्र लोगन कइहां जेल मां बंद कीन जब उइ मारि डारे जाति है तब हम उनके विरोधु मां अपनि सम्मति देइन रहन।¹¹हर आराधनालय मां उनका ताड़ना देवाय—देवाय यीसु केर निन्दा करवाइति रहन हियां तक कि गुस्सा केर मारे अइस पागल हुइगे रहन कि बार केर नगरन मा कइहां उनका सतावति रहन।

¹²पौलुस आगे कहिन यही धुन मां जब हम मा पुरोहितन तेरे अधिकार अउर परवाना लइके दमिस्क नगर कइहां जाइत रहन।¹³तबै हे महाराजा रास्ते मां दोपहरी केर समय आसमान ते सूरज तेरे वहिके बादि केर याक जोति अपने अउर अपने साथिन केर चारिव तरफ चमकति भई दीखि।¹⁴तब हम सब जमीन परिहां गरि परेन। तब हम आरानी भासा मां मोहि यू कहति भये केहिव केर आवाज सुनी हे साउल हे साउल तुम मोहिका काहे सता रहे हौ। पइने पर लात पारव तुमरी खातिन कठिन है।

¹⁵मै कहेन हे परभु तुम कइन हौ? परभु कहिन मै यीसु हूँ जेहिका तुम सता रहे हौ। ¹⁶मुला अब तुम उठौ अपने पायन पर खड़े हुई जाव हम तुमका यही खातिर दरसन दीन केर कि तुम काउन बातन क्यार सेवक अउर गवाह ठहराई जउनी तुम देखी हौ अउर उनका खातिन जिनके खातिन हम तुमका दरसन दे हौ। ¹⁷हम तुमरे लोगन तेरे अउर दुसरी जातिन तेरे बचावति रहिबे जिनके पास हम अब तुमका भेजिहौ। ¹⁸कि तुम उनकी आंखी ख्वालौ अउर उइ अंधेरे तेरे जोति की ओर अउर सैतान केर सक्ती तेरे परमेसुर केर तरफ लउटे अउर उइ पापन कि माफु उन लोगन केर साथ जउन मोहि पर बिसवास करै तेरे पवित्त कौन गये है पावै।

¹⁹अहिके मारे हे राजा अग्रिपा हम उइ सरगीय दरसन केर बाति नाई टारी। ²⁰हम पहिले दमिस्क केर यरुसलेम केर तब पूरे यहूदिया केर यहूदिन कइहां अउर दुसरी जातिन केर लोगन कइहां समझावति रहेन कि पापन तौ मन फिराओ अउर परमेसुर मेरी तरफ लउअि कइहां न फिरावै लायक काम करौ। ²¹ई बातन केर कारन यहूदी मोहिका मंदिर मां पकरि कइहां मारि डारै केर कोसिस करेनि। ²²परमेसुर केर सहायता ते हम आजु तक जिन्दा हनु छोटन अउर बडेन समुहे गवाही देइत हन। हम उन बातन कइहां छोड़ि कइहां कुछ नाई करति हन जउन नबिन हइन अउर मूसौ कही हइन क ई बातें होय बाकी है नबिन कहा रहिनि कि। ²³मसीह कइहां दुख उठावैक होई वही सबते पहिले मेरे हुएन मां ते जी उठि केर हमरे लोगन मां अउर दुसरी जातिन मां जोति क्यार परचार करि है।

²⁴जब पौलुस ई तरह तेरे जवाबु दे रहे तब फेस्तुस ऊंची आवाज मां कहेनि “पौलुस तुम पागल हौ बहुत ग्यान तेरे तुम पगलाए गये हौ।

²⁵पौलुस कहिन महाप्रतापी फेस्तुस हम पागल नाई हनु मुला हम सच्चाई अउर बुद्धि केर बातें कहि रहे हनु। ²⁶महाराज अग्रिपा जिनके समुहे हम बेधड़क हुइकै बोलि रहे हनु यी बातें जानति है अउर मोहिका बिसवास है कि ई बातें वहिते छिपी नाई है। काहे ते यह घटना कौने मां नाई घटी है। ²⁷हे महाराजा अग्रिपा का आप नबिन पर बिसवासु करति है? हम जानित हन कि आप बिसवासु करति हौ?

²⁸तब अग्रपा पौलुस तेरे कहेनि “का तुम थोरे समय मां समझावै ते मोहिका मसीही बनावा चाहति हौ।

²⁹पौलुस कहिन “परमेसुर तेरे मोरि यह पराथना

हवै कि का थोरे मां, का बहुत मां केवल आपुइ नाई मुला सगरे लोग जउन आजु मोरि बात सुनि रहे हैं इन जंजीरन कइहां छोड़ि उइ मोरे समान जुइ जाय।

³⁰तब राजा अग्रिपा ऊंचे अधिकारी रानी बिरनी केर अउर उनके साथ बइठ भये लोग उठे। ³¹उन अलग जा कइहां आपस म कहेन, “यहु मनई अइस तौ कुछौ नाई करि रहा है जेहिका खातिर अहिका फांसी दीन जाय या जेल मां बंद रखा जाय।

³²राजा अग्रिपा फेस्तुस तेरे कहेनि यहि यहु मनई कैसर केर दोहाई न देतौ तौ छुटि सकति रहै।

रोम केर तरफ कूच

27 जब यू तय भवा कि हम जहाज तेरे इटली देस कइहां जाई। तब उन यूलिमुस नाम केर औगुस्तुस केर सेना केर याक सूबेदार केर हाथे पौलुस अउर कइयौ कै दिन कइहां सौंपि दीन्हेनि। ²हम अद्रमुस्तियुम केर याक जहाज पर चढ़ेन जौनु आसिया केर किनारे केर जगहन मते होईके जाय वाला रहै। हम जहाज क्यार लंगर खोलि दीन।

³दुसरे दिन हम सैदा मा आएन अउर यूलियुस पौलुस पर किरपा कईकै उनका दोस्तन केर हियां जाए दीन्हेन कि वी पौलुस क्यार स्वागत सत्कार करै। ⁴हुवां तेरे जहाज खोलि कइहां हवा खिलाफ होय केर मारे हम साइप्रस द्वीप केर आइ तेरे होईकै चलेन। ⁵हुवां तेरे हम किलकिया अउर पम्फूलिया केर नजदीक समुंदर मा होईकै लूसिया केर मूरा मा उबरेन। ⁶हुवां सूबेदार कइहां सिकन्दरिया क्यार एकु जहाज मिला जौनु इटली देस कइहां जा रहा रहै। उन हमका वहि पर चढ़ा दीन्हेन। ⁷जब हम बहुत दिनन तक चलति भये बहुत कठिनाई तेरे कनिदुस केर समहे पहुचेन। तब हमका तेज हवा क्यार सामना करै क परा। हवा केर मारे हम सलमोने केर समुहे तेरे होईकै क्रते केर आइ—मां चलेन। ⁸वहिके किनारे—किनारे कठिनाई तेरे चला भए हम “सुभ लंगर बारी” नाम केर याक जगह पर पहुचेन जौनि लसिया नगर केर नजीके रहै।

⁹बहुत दिन बीति गै रहै अउर समुंदरी जातरा जोखिम भरी होइगै रहै। उपवास क्यार दिन बीति चुकै रहै। अहिते पौलुस उनका यू कहिके समझाएन।

¹⁰सज्जनौ मोहिका अइस लगति है कि यहि जातरा मा हम पर विपत्ति आवै वाली है न केवल माल अउर जहाज केर हानि होई मुला हमारि जिन्दगी व खतरे म है। ¹¹सूबेदार पौलुस केर बातन तेरे बढिकै माझी अउर जहाज केर मालिक केर बात मानेनि।

¹²ऊहु बन्दरगाह जाड़ा काटे खातिर ठीक नाई है, यहि के मारे बहुतेन क्यार विचार भवा कि हुवा तेरे जहाज खोलि कईहां, अउर कौनिव तरह होई सकति है, तो फीनिक्स मा पहुँचि कईहां जाड़ा काटे। फीनिक्स क्रेते क्यार एकु बन्दरगाह रहै जौनु दक्खिन—पस्चिम कईहां खुलति रहै।

तुफान मां

¹³जब धीरे—धीरे दक्खिनी हवा बहै लागि तौ हम समझेनि कि हमार काम बनि गवा। हम जहाज खोलि कईहां किनासे—किनारे क्रेते पास ते जाए लागेन। ¹⁴मुला थोरी द्यार मां हुवां तेरे याक बड़ी आंधी उठी जौनि यूर कुलीन कही जाति है। ¹⁵जब वह जहाज पर लागि तौ जहाज हवा केर सामने ठहरि नाई सका। हम वहिका बहै दीन अउर ई तरह तेरे बहति चले गएन। ¹⁶तब कौदा नाम केर याक छोटे टापू केर आड़ मां बहति—बहति हम कठिनाई तेरे डोंगी कईहां उपर खींचि सकेन। ¹⁷वहिका उठावै केर बादि मल्लाहन कइयौ उपाय कइकै जहाज कईहां नीचे तेरे बांधि दीन्हेन उनका डेरू रहे कि जहाज सुरतीस नाम केर रेती म फंसि जाई। अहिते उन पाल उतारि कइहां अइसेहे बहै दीन। ¹⁸जब हम आंधी म बहुत हिचक्वाला अउर धक्का खा चुकेन तौ दुसरे दिन उन जहाज क्यार माल समुंदर मां फेकब सुरु कई दीन्हेन। ¹⁹तीसरे दिन उन अपने हाथेन जहाज क्यार सगरा सामान फेकि दीन्हेन। ²⁰हमका बहुत दिनन तक न तौ सूरज अउर न तौ तारा देख परे। बड़ी आंधी चलि रही रहै। आखिर म हमरे बचै केर तिनकिव उम्मीद नाई रहिगै।

²¹जब वी बहुत दिन उपवास कई चुके तब पौलुस उनके बीच म खड़े होईकै कहेनि कि “चाही तौ यूह रहै कि तुम हमरि बाति मानि कईहां क्रेते तेरे जहाज न रखना करतिव अउर न यह विपत्ति हम पर अउतै अउर न यह हानी उड़ावैक परति। ²²अब हम तमका समझाईति है कि ढाढ़स बांधौ काहे तेरे तुम मा मते कहिव केर परागन केर हानि नाई होई केवल जहाज केर होई। ²³काहे तेरे परमेसुर जहिका हम आहिव अउर जहिकी सेवा करिति हन, वहिके सरग दूत आजु रति म मोरे, पास आ कइहां कहेसि। ²⁴पौलुस डेराव न तुमका समराट केर समुहे खड़ा होयक जरूर परी। अउर द्याखौ परमेसुर इन सबका जौनु तुमरे साथ सफर कर रहे हवै, तुमका दै दीन हइन। ²⁵पौलुस केर बात क्यार भरोसा करिति हन। जैसे मोहिते कहा गवा वैसे होई। ²⁶हम कउनिव तरह तेरे कउनेव टापू पर जा टिकिबे।

जहाज टूटि गवा

²⁷जब चौदहवी राति आई तब हम अद्रिया समुंदर मां इधर—उधर भटकति रहनु। तब आधी रात कईहां मल्लाहेन अनुमान लगाएन कि हम कउनेव देस केर नगीचे पहुँचि रहे हन। ²⁸उन पानी केर थाही लीन्हेन तौ पाएन कि हुवा एक सौ बीस फुट गहिर रहै। बारा आगे बढ़िकै फिरि थाही लीन्हेनि तौ नब्बे फुट पाएन। ²⁹इन बातन केर डेरू केर मारे कि कहुँ चट्टान तेरे टकरा न जाई, उन जहाज केर पीछे अलग चारि लंगर डारेनि। अउर सबेरू हो केर राह द्याखै लाग। ³⁰मल्लाह जहाज पर ते भागि जवैया रहै। उन आगे केर तरफ लंगर डारै केर बहाने डोंगी कईहां समुंदर म उतारि दीन्हेन। ³¹पौलुस सूबेदार अऊ सिपाहिन तेरे कहेनि कि अगर मल्लाह जहाज पर ते भागि गै, तौ तुमहुँ लोग नाई बचि पइहौ। ³²तब सिपाहिन रस्सा काटि कईहां डोंगी गिरा दीन्हेन।

³³जब भोरू होय वाला रहै तब पौलुस खाना खाय कइहां समझाएन अउर कहेन आजु चौदह दिन होईगे हैं अउर आस द्याखति—द्याखति तुम लोगन चिन्ता केर मारे खाना नाई खाएव है। ³⁴हम तुमका समझाईति हन कि अरे कुछु तो खा लेव जेहिते तुम जिन्दा रहौ। ³⁵यू कहिकै पौलुस रोटी लइके सबके समुहे परमेसुर क्यार धन्यवाद किहिन अउर रोटी कइहां भोजन करै लाग। ³⁶तब वी सबै ढाढ़स बांधी कै भोजन कीहिन। ³⁷हम सब मिलिकै जहाज पर दुई सौ छिहत्तर जने रहन। ³⁸जब भोजन तेरे उन क्यार पेटु भरि गवा, तब उन रोहू कईहां समुंदर म फेकि कईहां जहाज हल्का कीन्हेन।

³⁹जब सबेरू भवा तौ उन वी देस कईहां नाई पहचानेन। मुला उन याक खाड़ी देखने जेहिका किनारा चौरस रहै। उन सोचेनि कि अगर होई सकै तौ हियै पर जहाजु टिकावा जाय। ⁴⁰तब उन लंगर खोलि कईहां समुंदर मे छोड़ि दीन्हेन। वही समय पतवार क्यार बंधन ढील कई दीन गे। अउर हवा केर समुहे आगे वाला पाल चढ़ा कईहां किनारे केर तरफ चलि दीन। ⁴¹मुला जहाजु बानू म धसि गवा। अहिते उन वहिका वइसेहे रहै दीन्हेन। वहिका आगे वाला हिस्सा तौ गड़ि गवा अउर अटल होईगा। मुला पीछे वाला हिस्सा लहरन केर थपेड़न तेरे टुटै लाग।

⁴²सिपाहिन विचार किन्हेन कि केर दिन कईहां मारि डारा जाय। अइस न होय कि कौनिव कि केर दिन कईहां मारि डारा जाए। अइस न हो कि कौनिव पैरि कईहां भागि जाए। ⁴³मुला सूबेदार पौलुस कईहां केर इच्छा तेरे उनका ई विचार तेरे रोकेनि अउर कहेन

जौनु पैरि सकति है वी पहिले कूदि कईहां किनारे पर निकरि जाए।⁴⁴बाकी लोग लकड़ी केर पटरन परते अउर जहाज केर दुसरी चीजन केर सहारे निकरि जाए। ई तरह तेरे हम सब जीमन पर बचिके किनारे निकरि आएन।

माल्टा द्वीप क्यार किनारा

28जब हम बचि निकरेन तब पता चला कि युह टापु माल्टा कहा जाति है।²द्वीप केर लोगन हम पर आनेखी किरपा किन्हेन पानी बरसि रहा रहै, अउर जाड़ा रहै यहिके मारे उन आगी जला कईहां हम सबका ठहराएन।³जब पौलुस लकड़िन क्यार एकु गड्डा उठा कईहां निकरा अउर पौलुस केर हाथे म लिपटि लगा।⁴जब हुंवा केर लोगन सांप कईहां पौलुस केर हाथ म लिपटा भवा देखेनि तब आपस म कहेनि कि युह मनई सचमुच म हतियारा हवै। समुंदर तेरे तौ बचि गवा मुला परमेसुर तेरे नियाव अहिका जिन्दा रहै नाई दीन्हेसि।⁵तब पौलुस सांप कईहां आगी मा झटकि दीन्हेनि अउर उनका कौनिव हानी नाई भै।⁶मुला द्वीप वासी राह द्याखति रहे कि पौलुस क्यार हाथु सूजि जाई या उहु गिरि केर मारे जाई। मुला जब बहुत देर तक देखति रहै। अउर वहिका कुछौ नाई भवा, तब उन क्यार विचार बदलि गवा। उन कहेनि कि युह तौ कौनव देवता आए।

⁷उई जगह केर आपस पास टापू केर मुखिया पुबुलियुस केर जमीन रहै, उई हमका अपने घरे ले जा कईहां तीन दिन तक हमारि सेवा सत्कार कीन्हेस।⁸पुबुलियुस क्यार बापु बुखार अउर पेचिस आवै केर बीमारी तेरे रोगी रहै। पौलुस वहिके घरे जा कईहां पराथना कीन्हेन अउर वहि पर हाथु रखि कईहां वहिका चंगा कई दीन्हेन।⁹जब अईस भवा तब उई टापू क्यार बाकी बिमार आए अउर चगे कीन गे।¹⁰उन हमार बहुत आदर सत्कार कीन्हेन। अउर जब हम चलै लागेन तब सफर खातिर जौनु कुछु जरूरी रहै तौनु जहाज पर रखि दीन्हेन।

रोम मा पहुंचे

¹¹तीन महीना केर बादि हम सिकन्दरिया केर याक जहाज पर सवार भयेन। जेहि पर जुड़वा देवतन कैस्टर अउर पैलुक्स क्यार चिन्हु बना रहै। युह जहाज उई टापू मा जाड़े भरि रा रहै।¹²सरकुसा मा लंगर डारि कईहां हम तीन दिन हुंवा टिकेन।¹³हुंवा तेरे घुमि कईहां रेगिपुम म आएन याक दिन केर बाद जब दक्खिनी हवा चली तब दूसरे दिन पुलिपली म

आएन।¹⁴हुंवा हमका कुछु भाई मिले अउर उनके कहे तेरे हम उनके हियां सात दिन तक रहेन। यहि तरह तेरे हम रोम कइहां चलेन।¹⁵हुंवा तेरे भाई लोग हमारि खबर सुनिके अप्पिमुस केर चौक अयुर तीन सराय तक हमते भेंट करै खातिन आए। उनका देखि कईहां पौलुस परमेसुर कईहां धन्यवाद दीन्हेन अउर ढाढ़स बाधेनि।¹⁶तब हम रोम म पहुंचेन तक पौलुस कईहां याक सिपाही केर साथ अकेले रहै केर अनुमति मिलिगै। युह सिपाही उनकी रखवाली करति रहै।

पौलुस क्यार पहरे मा रोम सहर कइहां परचार

¹⁷तीन दिनन केर बादि पौलुस यहुदिन केर अगुवन कइहां बुलाएन जब उई इकट्टी भये तब वहिते कहेनि 'हे भाइयो अपनी जाति केर लोगन केर खिलाफ या पुरिखन केर रीति रिवाजन केर खिलाफ कुछौ नाहीं कीन, तौ नव मोहिका यरुसलेम म बन्दी बनावा गवा अउर रोमिन केर हाथ सौंपा गवा।¹⁸रोमिन हमारी जांच कीन्हेन अउर वहिके बादि छोड़ि दीन चहेन, काहे तेरे उनका मोहिका मृत्यु दन्द केर लायक कौनौ दोसु नाई मिला।¹⁹मुला जब यहूदी मोहिका छोड़ि दे केर खिलाफ बोलै लागे, तब समराट कैसर केर दोहाई देक पड़ी यू नाई कि मोहिका अपने जाति भाईन पर कौनव दोसु लगावैक रहै।²⁰हम तुम सब लोगन कईहां बोलावा हइनु कि सबते मिली अउर बातचीत करी, काहे तेरे इसराएली रास्ट्र केर आसा खातिन हम जंजीरन तेरे जकड़ा गवा हन।

²¹उन पौलुस तेरे कहेन हमका तुमरे बारे मा कौनव चिन्ही यहूदिया परदेस तेरे नाई मिली अउर न कौनिव बुरी बात कहिन।²²हम तुम्हार विचार सुना चाहित हन काहे तेरे हम जानिति हन कि ई पंथ क्यार सब जगह विरोधु होई रहा हवै।

²³उन पौलुस खातिन एकु दिन निश्चित कीन्हेन अउर बड़ी संख्या म उनके हियां आये। पौलुस सबेरे तेरे लैके सांझ तक परमेसुर केर राजि केर गवाही दीन्हेन अउर उनका यीसु केर बारे म मूसा केर बेवस्था अउर नबियन केर किताब तेरे समझाएन।²⁴तब कुछु लोगन उनकी बातन कईहां मानि लीन्हेन अउर कुछु बिसवास नाई कीन्हेन।²⁵जब उई आपस मा एकु मति नाई भए, अउर विदा होय लाग तब पौलुस वहिते या बात कहेन 'यसायाह नबी केर जरया तेरे पवित्तर आतमा तुमरे पुरिखन तेरे सचिही कहां रहेन'।

²⁶जा कइहां इन लोगन तेरे कहौ कि तुम सुनति तो रहिहौ मुला समझियौ नाहीं। तुम द्याखति तौ रहिहौ

ACTS 28:31

मुला तुमका सुझाई न परी।

²⁷इन लोगन क्यार मनु मोटा अउर उनके कान भारी होईंगे हैं, इन अपनी आंखी बन्द कई लीन हइनि। ऐसन होय क अपनी आंखिन तेरे द्याखैं, अउर कानन तेरे सुनै अउर मन ते समझै। अउर मोरी तरफ लौटि आवै अउर हम उनका चंगा कई देई।

²⁸अब तुम जानि लेव कि परमेशुर केर यह उद्धार केर कथा दूसरी जातिन तीर भेजी गै है। अउर वी

159**परेरितन केर कामु 28:31**

वहिका सुनि है। ²⁹तब पौलुस यह कहेन तब यहूदी आपस मा बहुत वाद विवाद करै लाग अउर हुवां तेरे चले गै।

³⁰पौलुस पूरे दूई साल तक अपने किराये केर मकान म रहे अउर लोग उनके तीर आवति रहे अउर सब वहिते मिलति रहे। ³¹उई बिना रोक टोक केर, अउर बहुत बेधड़क होईकै परमेशुर केर राज क्यार परचार करति रहै। अउर परभु यीसु मसीह केर बातें सिखावति रहै।